
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>



2

A/c.
242 ²

Aufschläger, F. G.

LIBELLUS PRECUM

AD USUM

STUDIOSAE JUVENTUTIS

a

Fr. Jos. Aufschläger.




NEOBURGI.

SUMPTIBUS JOANNIS PRECHTER.

1848.

1848. 15.



PIA ASPIRATIO MATUTINA.

In nomine Patris et Filii et Spiritus sancti!

Benedicta sit sancta Trinitas atque indivisa Unitas, Pater et Filius et Spiritus sanctus: confitebimur ei, quia fecit nobiscum misericordiam suam.

Adoro Te, sanctissima Trinitas Pater et Filius et Spiritus sanctus! tres personæ, unus solus, verus, æternus, immensus et incomprehensibilis Deus.

In nomine Domini Jesu Christi crucifixi surgo; ipse qui me redemit, me custodiat, protegat atque defendat ab omni malo hodie, semper, et in hora mortis meæ. Indue Deus, animam meam veste innocentiae, ut habitus ejus laudabilis appareat coram Te. Domine, Jesu Christe, qui lavisti nos a peccatis nostris in sanguine tuo; lava

omnes animæ meæ sordes, et supra nivem dealbabor. O Lux, quæ illuminat omnia, absorbe me in caritatis abyssum, ut videam semper Te in Te, et me in Te, et cuncta sub Te; nam sine te omnia mihi sunt tenebræ et nox obscura.

Maria, mater gratiæ, mater misericordiæ, tu me ab hoste protege, et mortis hora suscipe.

O mi sancte Angele custodiens, qui custos es mei; me tibi commissum pietate superna hodie illumina, custodi, rege et gubernas.

Dominica oratio.

Pater noster, qui es in cœlis: sanctificetur nomen tuum: adveniat regnum tuum: fiat voluntas tua, sicut in cœlo, et in terra: panem nostrum quotidianum da nobis hodie: et dimitte nobis debita nostra, sicut et nos dimittimus debitoribus nostris: Et ne nos inducas in tentationem, sed libera nos a malo. Amen.

Ave Maria.

Ave Maria, gratia plena, Dominus tecum; benedicta tu in mulieribus, et benedictus fructus ventris tui Jesus. Sancta Maria, Mater Dei, ora pro nobis peccatoribus nunc, et in hora mortis nostræ. Amen.

Symbolum Apostolicum.

Credo in Deum Patrem omnipotentem, creatorem cœli et terræ. Et in Jesum Christum, Filium ejus unicum, Dominum nostrum: qui conceptus est de Spiritu sancto natus ex Maria Virgine, passus sub Pontio Pilato, crucifixus, mortuus, et sepultus: descendit ad inferos: tertia die resurrexit a mortuis: ascendit ad cœlos, sedet ad dexteram Dei Patris omnipotentis, inde venturus est judicare vivos et mortuos. Credo in Spiritum sanctum, sanctam Ecclesiam Catholicam, Sanctorum communionem, remissionem peccatorum, carnis resurrectionem et vitam æternam. Amen.

Salutatio angelica.

Angelus Domini nuntiavit Mariæ, et concepit de Spiritu sancto. Ave Maria.

Ecce ancilla Domini, fiat mihi secundum verbum tuum. Ave Maria.

Et Verbum caro factum est, et habitavit in nobis. Ave Maria.

Oratio matutina.

Ad Te, Sanctissime Pater, a quo sum, et per quem vivo, sentio et intelligo, Pater omnipotens, æterne Deus, ad Te levo manus meas et cor meum, Teque omni quo possum affectu laudo,

glorifico et adoro. Dignus es, Domine, omni honore et gloria et gratiarum actione, quia, cum non essem, creasti me ad imaginem et similitudinem tuam, et cum perditus essem, pretioso Filii tui sanguine redemisti me et Sancti Spiritus gratia sanctificasti me, a multis malis me preservasti, peccantem tolerasti, et ad pœnitentiam expectasti. Pro his et aliis innumeris beneficiis, præsertim quod ad principium hujus dici me feceris pervenire, ex intimis visceribus Tibi gratias ago.

Dignare Domine, die isto. Sine peccato me custodire. Miserere mei Domine, miserere mei. Fiat misericordia tua Domine super me, quemadmodum speravi in Te.

Domine exaudi orationem meam, et clamor meus ad te veniat.

Oratio.

Infunde mihi timorem Tuum sanctum, fidem vivam, firmam spem, ardentem caritatem, et omnes virtutes, quibus indigeo. Custodi me hac die ab omni malo et doce me facere voluntatem tuam. Dirige omnia verba, cogitationes et opera mea ad majorem Tui gloriam et salutem animæ meæ, et fac me ita creaturis uti, ne me separent ab amore tuo, Per Christum Dominum nostrum.

Adjutorium nostrum in nomine Domini. Qui fecit cælum et terram.

Sit nomen Domini benedictum. Ex hoc, nunc, et usque in sæculum.

Benedictio Dei omnipotentis, Patris et Filii et Spiritus sancti, descendat super me, et maneat semper. Amen.

Matutina oblatio sui ad Beatam Virginem Mariam.

O Domina mea Sancta Maria! Me in tuam benedictam fidem, ac singularem custodiam, et sinum misericordiæ tuæ, hodie et quotidie, et in hora exitus mei, animam meam, et corpus meum, Tibi o Mater mea! omnem spem, et consolationem meam, angustias et misérias meas, vitam et mortem meam committo; ut per tuam sanctissimam intercessionem, et per tua merita, omnia mea dirigantur opera secundum tuam, tuique Filii voluntatem.

Per sanctam virginitatem, et immaculatam conceptionem tuam, purissima Virgo! emunda cor et carnem meam, in Nomine Patris, et Filii et Spiritus sancti. Amen.

Oratio ad sanctum Angelum custodem.

Angele Dei, qui custos es mei, me Tibi commissum pietate superna hodie illumina, custodi,

rege et gubernare. Ego te Patronum veneror, custodem amo, ac tibi trado me gubernandum. Ne ergo me, quamvis ingratum, deseras, sed benignus errantem dirigas; ignorantem erudias; jacentem erigas; afflictum soleris; periclitantem liberares, tandem ad æternam felicitatem perducas. Amen.

Formula intentionis matutinæ.

Omnipotens Deus, qui ad principium hujus diei me pervenire fecisti, Tua me hodie salva virtute, ut in hac die ad nullum declinem peccatum, sed semper ad Tuam justitiam faciendam mea procedant eloquia, dirigantur cogitationes, et opera, quæ omnia et quidquid adversi hodie patiar, Tibi ex amore offero. In unione intentionis, ac meritorum Christi, Deiparæ, et omnium Sanctorum et meorum etiam fructu: In honorem divinæ Majestatis tuæ, Christi nati, Deiparæ sine labe conceptæ, S. S. Petri et Pauli et aliorum S. S. Apostolorum, S. S. Patronorum meorum N. N. et omnium Sanctorum. In gratiarum actionem creationis, et conservationis, omniumque beneficiorum collatorum ad impetrandam fidem, spem et caritatem et gratiam N. (*exprime hic singulis diebus particularem gratiam*) ac pro Ecclesiæ et Patriæ necessitatibus. In Satisfactionem pro peccatis meis, et pro animabus purgatorii, maxime parentum, consanguineorum et amicorum meorum. Amen.

Petitio Benedictionis.

Dignare Domine Jesu in omnibus negotiis et actionibus meis, et præsertim in studiis, largam mihi dare benedictionem, et uberem gratiam, Tibi semper et in omnibus sic placendi, ut Te digne frui merear in terris, et in cœlis. Amen.

Intentio ante quamvis actionem.

Domine Deus omnium Creator et gubernator, in quo vivimus, movemur et sumus, et sine quo nihil possumus! hoc opus, quod adgredior, refero ad gloriam tuam et Filii tui Domini nostri Jesu Christi. Amen.

Gratiarum actio post quamvis actionem.

Suscipe, benignissime Pater, intervenientibus meritis unigeniti Filii tui Jesu Christi et precibus Beatissimæ Mariæ Virginis et omnium Sanctorum, officium servitutis meæ: et si quid laude dignum egi, propitius respice, et quod negligenter actum est, clementer ignosce. Amen.

Preces ante et post Studium.**Oratio ante Studium.**

Deus scientiarum Domine, sapientiæ Dux et sapientium emendator, qui doces hominem scien-

tiam, et linguas infantium facis disertas, qui non tantum scientiam repellentes repellis, sed jubes, ut labia mea custodiant scientiam, et legem requirant ex ore ejus, quia angelus Domini exercituum est, mitte sapientiam de coelis sanctis tuis et a sede Magnitudinis tuæ, ut mecum sit et mecum laboret; ut sciam, quid acceptum sit apud Te. Nam et si quis erit consummatus inter filios hominum, si ab illo abfuerit sapientia tua, in nihilum computabitur. Da mihi intellectum, ut mihi attendens et doctrinæ, devitem profanas vocum novitates et oppositiones falsi nominis scientiæ, et sim operarius inconfusibilis, recte discens verbum Veritatis. Da mihi scientiam Sanctorum, scire etiam supereminentem scientiam caritatis Christi, qui Tecum vivit et regnat in unitate Spiritus Sancti Deus per omnia saecula saeculorum, Amen.

Oratio post Studium.

Ne sinas me, Domine inflari scientia, quæ destruetur; sed da caritatem aedificantem, quæ nunquam excidit, ut non evanescam in cogitationibus meis, nec judicem me scire aliquid inter homines, nisi Jesum Christum et hunc Crucifixum. Amen.

Preces dicendae in principio Scholarum et Studiorum.

Veni sancte Spiritus, reple Tuorum corda fidelium, et Tui amoris in eis ignem accende, qui per diversitatem linguarum cunctarum gentes in unitate fidei congregasti. Emitte spiritum tuum, et creabuntur. Et renovabis faciem terræ. — Domine exaudi orationem meam. Et clamor meus ad te veniat. Oremus. Deus, qui corda fidelium sancti Spiritus illustratione docuisti; da nobis in eodem Spiritu recta sapere, et de Ejus semper consolatione gaudere. Per Christum Dominum nostrum. Amen.

Divinum auxilium maneat semper nobiscum. Amen.

Observanda in Itu ad scholam.

Primum est; ut ad scholam eundo modestiam totius corporis ac præsertim oculorum observes, ut quicumque te vident, agnoscant, te non modo literarum, sed virtutis etiam et verecundiæ esse studiosum;

Alterum, ut obvios quosque reverenter, verbis honorificis, et caput detegendo, salutes; senes præsertim et pauperes; quia omnes sunt creati ad imaginem Dei, et Christi sanguine redempti, quæ duo sola in hominibus amanda, et honoranda sunt.

Tertium est; ut numquam prius pedem in scholam, quam in templum inferas. Deus enim scientiarum est Dominus, et ipsi præparantur cogitationes. Poteris

autem hoc, similive modo, Sanctissimi Sacramenti visitationem instituere:

„Ave, clementissime Jesu Christe, Fili Dei vivi, qui adeo dilexisti me, ut mori volueris pro me et in cibum, sacrificium, et præmium mihi dedens Te.

In Te credo, in Te spero, Te super omnia diligo et diligam in æternum. Sis benedictus ab omnibus, in omnibus, gratis propter Te, super omnia, in æternum. Amen.

Observanda in schola.

In schola te pium, et attentum exhibe. Gratum Te Deo exhibebis, si consuetas preces in initio et fine scholæ, salutationemque angelicam ad sonitum horæ, religiose dixeris. Item si inter scholasticas occupationes suaviter ad Deum mentem elevaveris; sumta occasione, vel ex aspectu piæ alicujus imaginis, vel ex auditu rei cujusdam spiritualis. Quo pertinent aptæ jaculatoriæ orationes; quibus adjungi possunt sequentes:

Propter Te Domine, studeo, propter Te. O! quando Te perfecte cognoscam, et diligam, mi Deus!

Mater Dei, memento mei!

Da mihi Domine, innocentiam cordis mei et sanctitatem vitæ meæ.

Quid prodest hæc, vel illa bona scire, et non facere?

Omnia ad majorem Dei gloriam“ etc.

Ad Signum salutationis angelicæ.

Matutinum, Meridianum et Vespertinum.

Angelus Domini nuntiavit Mariæ, et concepit de Spiritu sancto. Ave Maria.

Ecce ancilla Domini, fiat mihi secundum verbum tuum. Ave Maria.

Et verbum caro factum est, et habitavit in nobis. Ave Maria.

Ora pro nobis sancta Dei Genitrix.

Ut digni efficiamur promissionibus Christi.

Oremus.

Gratiam tuam, quæsumus Domine, mentibus nostris infunde; ut qui Angelo nuntiante Christi Filii Tui Incarnationem cognovimus, per passionem ejus et crucem ad resurrectionis gloriam perducamur. Per eundem Christum Dominum nostrum. Amen.

Et Fidelium Animæ per Misericordiam Dei requiescant in Pace. Amen.

Benedictio Mensæ.

Ante Prandium.

Benedicite, Benedicite! Oculi omnium in Te sperant Domine, et Tu das escam illorum in tempore opportuno, aperis Tu manum tuam, et imples omne animal benedictione. Gloria Patri, et Filio et Spiritui sancto, sicut erat in principio et nunc et semper et in sæcula sæculorum. Amen. Kyrie eleison, Christe eleison. Kyrie eleison. Pater noster. Ave Maria.

Oremus. Benedic, Domine, nos, et hæc Tua dona, quæ de Tua largitate sumus sumturi. Per Christum Dominum nostrum. Amen. Jube Domne benedicere.

Mensæ cœlestis participes faciat nos Rex æternæ gloriæ. Amen.

Post Prandium.

Agimus Tibi gratias, omnipotens Deus, pro universis beneficiis tuis, qui vivis et regnas in sæcula sæculorum. Amen.

Kyrie eleison. Christe eleison. Kyrie eleison. Pater noster. Ave Maria.

Retribuere dignare Domine, omnibus nobis bona facientibus propter nomen Tuum vitam æternam. Amen.

Fidelium animæ per misericordiam Dei requiescant in pace. Amen.

Ante cœnam.

Benedicite. Edent pauperes et saturabuntur, et laudabunt Dominum, qui requirunt Eum: vivent corda eorum in sæculum, sæculi.

Gloria Patri, et Filio et Spiritui sancto, sicut erat in principio, et nunc et semper et in sæcula, sæculorum. Amen.

Kyrie eleison, Christe eleison, Kyrie eleison. Pater noster. Et ne nos inducas in tentationem, sed libera nos a malo. Amen.

Oremus. Benedic, Domine, nos, et hæc tua dona, quæ de Tua largitate sumus sumturi. Per Christum Dominum nostrum. Amen.

Jube Domne benedicere. Ad cœnam vitæ æternæ perducatur nos Rex æternæ gloriæ. Amen.

Post cœnam.

Tu autem Domine miserere nobis. Deo gratias.

Memoriam fecit mirabilium suorum misericors et miserator Dominus.

Escam dedit timentibus se. Gloria Patri, et Filio et Spiritui sancto, sicut erat in principio et nunc et semper et in sæcula sæculorum. Amen.

Benedictus Deus in donis suis, et sanctus in omnibus operibus suis, qui vivit et regnat in sæcula sæculorum. Amen.

Laudate Dominum omnes Gentes; laudate Eum omnes Populi.

Quoniam confirmata est super nos misericordia Ejus; et veritas Domini manet in æternum.

Gloria Patri, et Filio, et Spiritui sancto, sicut erat in principio et nunc et semper et in sæcula sæculorum. Amen.

Kyrie eleison, Christe eleison, Kyrie eleison. Pater noster. Et ne nos inducas in tentationem, sed libera nos a malo.

Dispersit, dedit pauperibus; Justitia Ejus manet in sæculum sæculi.

Benedicam Dominum in omni tempore; semper laus Ejus in ore meo.

In Domino laudabitur anima mea; Audiant mansueti et lætentur.

Magnificate Dominum mecum; et exaltemus nomen Ejus in idipsum.

Sit Nomen Domini benedictum; ex hoc, nunc, et usque in sæculum.

Retribuere dignare, Domine, omnibus, nobis bona facientibus propter Nomen tuum Vitam æternam. Amen.

Benedicamus Domino; Deo gratias.

Fidelium animæ per misericordiam Dei requiescant in pace. Amen.

Pater noster etc.

Dominus det nobis suam pacem. Amen.

EXERCITIUM VESPERTINUM.

Oratio vespertina.

In nomine Patris et Filii et Spiritus sancti. Amen.

Inclinata est dies: nox appropinquavit. Venite extollamus manus nostras in Sancta, et glorificemus Dominum, qui fecit nobiscum misericordiam suam. Benedic anima mea Domino. Et noli oblivisci omnes retributiones ejus.

Oremus.

Deus, qui divitias tuæ immensæ bonitatis in nobis ostendere non desinis; Tibi pro collatis beneficiis gratias agimus, humiliter deprecantes, ut quod immeritis tribuere dignatus es, semper

ad majorem Nominis tui Gloriam referamus. Per Christum Dominum nostrum. Amen.

O Pater misericordiarum, o mi Creator, mi Salvator, mi Redemptor! ex intimis præcordiis gratias ago pro omnibus et singulis animi et corporis donis, liberalissime mihi aliisque collatis, præsertim hodie talibus N. N. Et quid pro his retribui Tibi, aut retribuam?

Illumina me Domine, qui observasti omnes semitas meas, et vestigia pedum meorum considerasti. O veni lux vera, et pelle tenebras cordis mei, ut videam quid desit mihi, et quid displiceat Tibi, ut omnem iniquitatem odio habeam, et per gratiam Tuam serio emendem.

Dignare me Domine nocte ista. Sine peccato me custodire. Miserere mei, Domine. Miserere mei. Fiat misericordia tua Domine super me. Quemadmodum speravi in Te. Domine, exaudi orationem meam. Et clamor meus ad Te veniat. Oremus. Fac nos quaesumus Domine, Tibi servire in sanctitate et justitia omnibus diebus nostris, expectantes beatam spem, ut in pace, consummato vitae cursu, ingrediamur in illam requiem, ubi nox ultra non erit, et videamus faciem tuam, et requiescamus in gloria tua, glorificantes Te in saecula saeculorum. Amen.

Gratiarum actio vespertina.

Gratias Tibi ago infinitas, liberalissime Deus! pro innumeris beneficiis mihi totique mundo, maxime vero Electis tuis, Beatissimae Virgini, ac ss. Humanitati Christi, a paterna providentia ac liberalitate Tua indesinenter collatis. Gratias Tibi ago pro mediis ad salutem aptissimis, mihi et singulis hominibus tam clementer concessis, et pro copiosis naturae et gratiae Donis, quibus nos cumulare nunquam desinis. Utinam tantis Beneficiis Tuis nunquam contra Te abutamur, sed omnia purissima intentione referamus in Te bonorum omnium fontem inexhaustum! In gratiarum actionem offero Tibi, o Pater amantissime, me totum et omnia mea, et ex animo gaudeo, haec omnia infinitis titulis Tibi jamdudum fuisse debita, quae Tibi novo amoris et gratitudinis affectu integerrime consecro. Et quid aliud, nisi me ipsum et omnia mea, retribuam Domino pro omnibus, quae retribuit mihi? Amen.

Aspirationes ante Somnum.

Salva nos Domine vigilantes, custodi nos dormientes, ut vigilemus cum Christo, et requiescamus in pace. — Domine exaudi orationem meam. Et clamor meus ad Te veniat.

2*

Oremus. Visita, quaesumus Domine, habitationem istam, et omnes insidias inimici ab ea longe repelle. Angeli Tui sancti habitent in ea, qui nos in pace custodiant; et benedictio Tua sit super nos semper. Per Christum Dominum nostrum. Amen.

O Domina mea, Sancta Maria, me in Tuam benedictam fidem ac singularem custodiam, et in sinum misericordiae Tuae hac nocte, et in hora exitus mei animam et corpus meum Tibi commendo; omnem spem et consolationem meam, omnes angustias et miserias, vitam et finem vitae meae Tibi committo, ut per Tuam sanctissimam intercessionem et per Tua merita, omnia dirigantur, et disponantur opera secundum Tuam Tuique Filii sanctissimam voluntatem. Amen.

Angele Dei, qui custos est mei, me Tibi commissum pietate superna, hac nocte illumina, custodi, rege, gubernare, et in morte me adjuva, Amen.

O S. S. Patroni mei, N. N. defendite me hac nocte ab omni contraria diaboli potestate. Amen.

In pace in idipsum dormiam et requiescam: quoniam Tu Domine, singulariter in spe constituisti me.

Peto Domine, et desidero, ut singulae respirationes meae hac nocte laudem et honorem Tibi exhibeant.

Illumina oculos meos, ne unquam obdormiam in morte; nequando dicat inimicus meus: praevalui adversus eum.

Maria, Mater gratiae, Mater misericordiae; Tu me ab hoste protege, et mortis hora suscipe.

Pater æterne! per vitam et mortem dilectissimi Filii Tui, perque viscera misericordiae Tuae rogo Te: concede mihi, ut in bono perseverem, et moriar in gratia Tua. Bone Jesu Christe! per caritatem æterni Patris, et ultima in cruce verba, quibus Patri spiritum commendasti, Te rogo: suscipe Spiritum meum in fine vitæ meæ. Spiritus Sancte Deus! miserere mei, et sancta inspiratione Tua me semper, et potissimum in hora mortis meae corrobora Sanctissima Trinitas, unus Deus! Pater et Filius et Spiritus Sanctus! Miserere mei nunc et in hora mortis meae. Amen.

Pater noster. Ave Maria. Credo.

Benedicat et custodiat me omnipotens et misericors Dominus, Pater et Filius et Spiritus Sanctus. Amen.

•

Oratio pro fidelibus defunctis.

De profundis clamavi ad Te, Domine; Domine, exaudi vocem meam.

Fiant aures Tuae intendentes; in vocem deprecationis meae.

Si iniquitates observaveris, Domine; Domine quis sustinebit?

Quia apud Te propitiatio est; et propter legem Tuam sustinui Te, Domine.

Sustinuit anima mea in verbo Ejus; speravit anima mea in Domino.

A custodia matutina usque ad noctem; speret Israel in Domino.

Quia apud Dominum misericordia; et copiosa apud Eum redemptio.

Et ipse redimet Israel; ex omnibus iniquitatibus ejus.

Requiem aeternam dona eis, Domine. Et lux perpetua luceat eis.

A porta inferi. Erue Domine animas eorum. Requiescant in pace. Amen.

Domine exaudi orationem meam. Et clamor meus ad Te veniat.

Oremus. Deus veniae largitor et humanae salutis amator, quaesumus clementiam Tuam, ut nostrae congregationis fratres, propinquos et

benefactores, qui ex hoc saeculo transierunt, beata Maria semper Virgine intercedente cum omnibus Sanctis Tuis, ad perpetuae beatitudinis consortium pervenire concedas.

Fidelium Deus omnium Conditor et Redemptor, animabus famulorum famularumque Tuarum remissionem cunctorum tribue peccatorum; ut indulgentiam, quam semper optaverunt, piis supplicationibus consequantur. Qui vivis et regnas in saecula saeculorum. Amen.

Requiem aeternam dona eis Domine. Et lux perpetua luceat eis. Requiescant in Pace. Amen.

Animae omnium fidelium Defunctorum, per Misericordiam Dei requiescant in Pace. Amen.

Pater noster. Ave.

Actus virtutum Theologicarum.

Actus Fidel.

O mi Deus, suprema et essentialis Veritas! credo Te unum in essentia et Trinum in Personis esse, Patrem et Filium et Spiritum sanctum; credo, teneo ac profiteor fidem illam quam Christus docuit, quam praedicaverunt Apostoli, quam-

que Sancta Romana Ecclesia docet ac profitetur;
et singulos catholicae Fidei articulos paratus sum
sanguine meo subsignare et morte mea confirmare;
quippe testimonia tua credibilia facta sunt nimis.
Amen.

Actus spei.

Omnipotens et misericors Deus, unica spes
et consolatio mea! spero per sanguinem et merita
Jesu Christi Domini nostri ab infinita bonitate ac
misericordia Tua remissionem omnium peccatorum
meorum, quibus Te summum Bonum tam graviter
offendi; spero firmissime me ab infinita pietate
tua obtenturum omnia ad salutem necessaria, gra-
tiam copiosam, et gloriam sempiternam; quoniam
Tu es Domine spes mea, altissimum posuisti re-
fugium meum. Amen.

Actus Caritatis.

Diligo Te, o amabilissime Deus! ex toto
corde meo, diligo super omnia propter infinitam
bonitatem Tuam; et vellem, si possem, diligere Te
amore illo, quo Te diligunt omnes Sancti, Bea-
tissima Virgo Maria, et Jesus Christus Filius
Tuus, illaque caritate, qua Te Ipsum infinite
diligis. Et ex sincerissimo Tui amore doleo,
quod Te saepius offenderim. Quidquid unquam
perpessus fuero vel patiar, omne illud propter

amorem Tuum offero gloriae Tuae. Tibi totum me in holocaustum consecro, o Deus cordis mei, et pars mea Deus in aeternum. Amen.

Gratiarum actio.

Gratias Tibi ago infinitas, liberalissime Deus! pro innumeris beneficiis mihi totique mundo, maxime vero Electis Tuis, Beatissimae Virgini, ac S. S. humanitati Christi, a paterna providentia ac liberalitate Tua indesinenter collatis. Gratias Tibi ago pro mediis ad salutem aptissimis, mihi et singulis hominibus tam clementer concessis, et pro copiosis naturae et gratiae donis, quibus nos cumulare nunquam desinis. Utinam tantis beneficiis Tuis nunquam contra Te abutamur, sed omnia purissima intentione referamus in Te bonorum omnium fontem inexhaustum! In gratiarum actionem offero Tibi, o Pater amantissime, me totum et omnia mea, et ex animo gaudeo, haec omnia infinitis titulis Tibi jam dudum fuisse debita, quae Tibi novo amoris et gratitudinis affectu integerrime consecro. Et quid aliud, nisi me ipsum et omnia mea retribuam, Domino, pro omnibus, quae retribuisti mihi! Amen.

Actus Pœnitentiæ.

O justissime Deus! ego execrabilis peccator coram infinita Majestate Tua et bonitate pro-

stratus, corde contrito et humiliato, confiteor me reum laesae Majestatis Tuae infinitae, veniamque meorum criminum supplex rogo. Detestor ex animo amore Tui omnia peccata mea, quibus Te amabilissimum Deum meum tam saepe offendi; et cum gratia Tua propono firmissime, nunquam deinceps offendere Te Summum Bonum meum. Utinam omnes habitus mei sint gemitus dolentis ac pœnitentis cordis mei, ut per hunc dolorem meum in aliquo saltem Tibi satisfacere possem! O justissime scelerum vindex et misericordissime Pater! hic ure, hic seca, modo in aeternum parcas, a judiciis enim Tuis timui. Amen.

Preces ante et post Missam.

Oratio ante Missam.

Veni Sancte Spiritus, reple Tuorum corda Fidelium, et Tui amoris in eis ignem accende, qui per diversitatem linguarum cunctarum gentes in unitate fidei congregasti.

Emitte Spiritum Tuum et creabuntur.

Et renovabis faciem terrae.

Oremus.

Deus, qui corda Fidelium Sancti Spiritus illustratione docuisti; da nobis in eodem Spiritu recta sapere, et de Ejus semper consolatione gaudere. Per Christum Dominum nostrum. Amen.

Oratio.

Domine Deus, ad cujus imaginem creatus sum, da mihi gratiam, ut imminenti Sacrificio, qua par est reverentia, et devotione intersim, illudque una cum Sacerdote divinae Majestati Tuae gratiose offeram. Ad majorem nominis Tui honorem, et gloriam, Cui soli hoc sacrificium debetur. In memoriam Passionis, et Mortis Tuae, quam ad hujus sacrificii usum fieri praecepisti. In gratiarum actionem pro omnibus mihi collatis beneficiis. In satisfactionem omnium mearum culparum, ac pœnarum, quas sanctissimo Sanguini Tuo in hoc sacrificio immergo. Ad impetrandam gratiam Tuam, et opem in re ista N. N. Pro carissimis parentibus, amicis, propinquis et benefactoribus meis, maxime istis N. N. Pro fidelibus defunctis, potissimum istis N. N. Placeat Tibi Domine, haec intentio mea, et exaudi me. Per Christum Dominum nostrum. Amen.

Gratiarum actio post Missam.

Gratias Tibi ago, omnipotens sempiterno Deus, conservator animarum mundique redemptor, me famulum Tuum ante Majestatem Tuam prostratum benignissime respice, et Sacrificium, quod in honorem nominis Tui pro salute fidelium tam vivorum quam etiam defunctorum, et pro peccatis et offensionibus meis cum sacerdote obtuli, piissime respice; iram Tuam a me remove; gratiam et misericordiam mihi concede; janua Paradisi mihi pande; ab omnibus malis me potenter eripe; et quidquid proprio commisi reatu, clementer indulge. Et sic in hoc saeculo in praeceptis Tuis fac me perseverare, ut dignus Electorum gregi copulari efficiar, Te praestante, Deus meus, Cujus nomen benedictum, honor atque regnum permanet in saecula saeculorum. Amen.

Oratio ad Sanctam B. V. Mariam post Missam.

O sacratissima, o serenissima et inclyta gloriosa Virgo Maria, quae Creatorem omnium creaturarum in Tuo sacratissimo utero faisti digna portare, solaque virgineo ubere lactare, Tuam humiliter deprecor misericordiam, ut apud Ipsum pro me peccatore intercedere digneris; ut quid-

quid in hoc tam ineffabili ac dignissimo Sacrificio per me indignum ignoranter vel negligenter aut accidentaliter seu irreverenter actum est, commissum vel omissum, Tuis sacratissimis precibus indulgere dignetur idem Dominus noster Jesus Christus Filius Tuus, qui cum Patre et Spiritu sancto vivit et regnat in saecula saeculorum. Amen.

Conclusio post Missam.

Anima Christi sanctifica me,
Corpus Christi salva me,
Sanguis Christi inebria me,
Aqua lateris Christi munda me,
Passio Christi conforta me;
O bone Jesu exaudi me,
Intra vulnera Tua absconde me,
Et ne permittas me separari a Te;
Ab hoste maligno defende me,
In hora mortis meae voca me,
Et jube me venire ad Te,
Ut cum Sanctis Tuis laudem Te,
In saecula saeculorum. Amen.

PRECES MISSÆ,
prout
a Sacerdote recitantur.

Sacerdos: In nomine Patris et Filii et Spiritus sancti, Amen.

Antiph. Introibo ad altare Dei.

Minister. resp. Ad Deum, qui laetificat juventutem meam.

Psalmus XLII.

S. Judica me, Deus, et discerne causam meam de gente non sancta: ab homine iniquo et doloso erue me.

M. Quia Tu es Deus, fortitudo mea: quare me repulisti, et quare tristis incedo, dum affligit me inimicus?

S. Emitte lucem tuam et veritatem tuam: ipsa me deduxerunt et adduxerunt in montem sanctum tuum, et in tabernacula tua.

M. Et introibo ad altare Dei: ad Deum, qui laetificat juventutem meam.

S. Confitebor tibi in cithara, Deus, Deus meus: quare tristis es anima mea, et quare conturbas me?

- M.** Spera in Deo, quoniam adhuc confitebor illi,
salutare vultus mei, et Deus meus.
- S.** Gloria Patri et Filio: et Spiritui sancto.
- M.** Sicut erat in principio et nunc et semper:
et in saecula saeculorum. Amen.
- S.** Antiph. rep. Introibo ad altare Dei.
- M.** Ad Deum, qui laetificat juventutem meam.
- S.** Adjutorium nostrum in nomine Domini.
- M.** Qui fecit coelum et terram.
- S.** Confiteor Deo omnipotenti, beatæ Mariæ
semper Virgini, beato Michaeli Archangelo,
beato Joanni Baptistæ, sanctis Apostolis
Petro et Paulo, omnibus Sanctis, et vobis
fratres: quia peccavi nimis cogitatione, verbo
et opere, mea culpa, mea culpa, mea
maxima culpa. Ideo precor beatam Mari-
am semper Virginem, beatum Michaelem
Archangelum, beatum Joannem Baptistam,
sanctos Apostolos Petrum et Paulum, omnes
sanctos, et vos fratres, orare pro me ad
Dominum Deum nostrum.
- M.** Misereatur tui omnipotens Deus et dimissis
peccatis tuis perducatur te ad vitam æternam.
- S.** Amen.
- M.** Confiteor Deo, omnipotenti, beatæ Mariæ
semper Virgini, beato Michaeli Archangelo,

beato Joanni Baptistae, sanctis Apostolis Petro et Paulo, omnibus Sanctis, et tibi Pater: quia peccavi nimis cogitatione, verbo et opere, mea culpa, mea culpa, mea maxima culpa. Ideo precor beatam Mariam semper Virginem, beatum Michaellem Archangelum, beatum Joannem Baptistam, sanctos Apostolos Petrum et Paulum, omnes Sanctos, et te Pater, orare pro me ad Dominum Deum nostrum.

S. Misereatur vestri omnipotens Deus, et dimissis peccatis vestris perducatur vos ad vitam aeternam.

M. Amen.

S. Indulgentiam, absolutionem, et remissionem peccatorum nostrorum tribuat nobis omnipotens et misericors Dominus.

M. Amen.

S. Deus Tu conversus vivificabis nos.

M. Et plebs tua laetabitur in Te.

S. Ostende nobis, Domine, misericordiam tuam.

M. Et salutare tuum da nobis.

S. Domine exaudi orationem meam.

M. Et clamor meus ad te veniat.

S. Dominus vobiscum.

M. Et cum spiritu tuo.

Oremus. Aufer a nobis, quaesumus Domine, iniquitates nostras, ut ad Sancta Sanctorum puris mereamur mentibus introire. Per Christum Dominum nostrum. Amen.

Oramus te Domine, per merita Sanctorum tuorum, quorum reliquiae hic sunt, et omnium Sanctorum: ut indulgere digneris omnia peccata mea, Amen.

Introitus.

Benedicta sit sancta Trinitas atque indivisa Unitas: confitebimur ei, quia fecit nobiscum misericordiam suam. Psalm. Domine Dominus noster, quam admirabile est nomen tuum in universa terra. Gloria Patri. Sicut erat. Benedicta sit sancta Trinitas atque indivisa Unitas: confitebimur ei, quia fecit nobiscum misericordiam suam.

S. Kyrie eleison. M. Kyrie eleison. S. Kyrie eleison. M. Christe eleison. S. Christe eleison. M. Christe eleison. S. Kyrie eleison. M. Kyrie eleison. S. Kyrie eleison.

Hymnus Angelicus.

Gloria in excelsis Deo. Et in terra pax hominibus bonae voluntatis. Laudamus te. Benedicimus te. Adoramus te. Glorificamus te. Gratias agimus tibi propter magnam Gloriam tuam. Do-

mine Deus, Rex coelestis, Deus, Pater omnipotens. Domine Fili unigenite, Jesu Christe. Domine Deus, Agnus Dei, Filius Patris. Qui tollis peccata mundi, Miserere nobis. Qui tollis peccata mundi, suscipe deprecationem nostram. Qui sedes ad dexteram Patris, miserere nobis. Quoniam tu solus sanctus, tu solus Dominus, tu solus altissimus, Jesu Christe, cum sancto Spiritu in gloria Dei Patris, Amen.

S. Dominus vobiscum. M. Et cum Spiritu Tuo.

Collecta.

Oremus. Omnipotens sempiterne Deus, qui dedisti famulis tuis in confessione verae fidei aeternae Trinitatis gloriam agnoscere, et in potentia majestatis adorare Unitatem: quaesumus, ut ejusdem fidei firmitate ab omnibus muniamur adversis. Per Dominum nostrum Jesum Christum Filium tuum, qui tecum vivit et regnat in unitate Spiritus sancti Deus, per omnia saecula saeculorum. M. Amen.

Epistola.

Lectio Epistolae beati Pauli Apostoli ad Corinthios.

Fratres, gaudete, perfecti estote, exhortamini, idem sapite, pacem habete: et Deus pacis et dilectionis erit vobiscum. Gratia Domini nostri

Jesu Christi et caritas Dei, et communicatio sancti Spiritus sit cum omnibus vobis. Amen.

M. Deo gratias.

Graduale. Benedictus es Domine, qui intueris abyssos, et sedes super Cherubim. Benedictus es, Domine, in firmamento coeli, et laudabilis in saecula. Alleluja, Alleluja. Benedictus es, Domine, Deus patrum nostrorum, et laudabilis in saecula. Alleluja.

Munda cor meum ac labia mea, omnipotens Deus, qui labia Isaiae Prophetae calculo mundasti ignito: ita me tua grata miseratione dignare mundare, ut sanctum Evangelium tuum digne valeam nunciare. Per Christum Dominum nostrum. Amen.

Jube Domne benedicere.

Dominus sit in corde meo et in labiis meis: ut digne et competenter annunciem Evangelium suum, Amen.

Evangelium.

S. Dominus vobiscum. M. Et cum spiritu tuo.

S. Sequentia s. Evangelii secundum Joannem.

M. Gloria tibi Domine.

In illo tempore dixit Jesus discipulis suis: Cum venerit Paraclitus, quem ego mittam vobis a Patre, Spiritum veritatis, qui a Patre procedit:

3 *

ille testimonium perhibebit de me. Et vos testimonium, perhibebitis, quia ab initio mecum estis. Haec locutus sum vobis, ut non scandalizemini. Absque synagogis facient vos: sed venit hora, ut omnis qui interficit vos, arbitretur obsequium se præstare Deo. Et haec facient vobis, quia non noverunt Patrem neque me. Sed haec locutus sum vobis, ut cum venerit hora, eorum reminiscamini, quia ego dixi vobis.

M. Laus tibi Christe.

S. Per evangelica dicta deleantur nostra delicta.

Symbolum.

Credo in unum Deum, Patrem omnipotentem, factorem coeli et terrae, visibilium omnium et invisibilium. Et in unum Dominum Jesum Christum Filium Dei unigenitum. Et ex Patre natum ante omnia saecula. Deum de Deo, Lumen de Lumine, Deum verum de Deo vero. Genitum, non factum, consubstantialem Patri, per quem omnia facta sunt. Qui propter nos homines et propter nostram salutem descendit de coelis. Et incarnatus est de Spiritu sancto ex Maria Virgine: et homo factus est. Crucifixus etiam pro nobis, sub Pontio Pilato, passus et sepultus est. Et resurrexit

.

tertia die, secundum Scripturas. Et ascendit in coelum: sedet ad dexteram Patris. Et iterum venturus est cum gloria, judicare vivos et mortuos: cujus regni non erit finis. Et in Spiritum sanctum Dominum et vivificantem: qui ex Patre filioque procedit. Qui cum Patre, et Filio simul adoratur et conglorificatur: qui locutus est per Prophetas. Et unam, sanctam, catholicam et apostolicam Ecclesiam. Confiteor unum Baptisma in remissionem peccatorum. Et exspecto resurrectionem mortuorum et vitam venturi saeculi. Amen.

S. Dominus vobiscum. M. Et cum spiritu tuo.

Offertorium.

Oremus. Benedictus sit Deus Pater, unigenitusque Dei Filius, sanctus quoque Spiritus: quia fecit nobiscum misericordiam suam.

Suscipe, sancte Pater, omnipotens aeternae Deus, hanc immaculatam Hostiam, quam ego indignus famulus tuus offero tibi Deo meo vivo et vero, pro innumerabilibus peccatis et offensionibus et negligentis meis, et pro omnibus circumstantibus, sed et pro omnibus fidelibus Christianis, vivis atque defunctis ut mihi et illis proficiat ad salutem in vitam aeternam, Amen.

Deus, qui humanae substantiae dignitatem mirabiliter condidisti et mirabilius reformasti: da

nobis per hujus aquae et vini mysterium ejus divinitatis esse consortes, qui humanitatis nostrae fieri dignatus est particeps, Jesus Christus Filius tuus Dominus noster: Qui tecum vivit et regnat in unitate Spiritus sancti Deus. per omnia saecula saeculorum. Amen.

Offerimus tibi, Domine, Calicem salutaris, tuam deprecantes clementiam: ut in conspectu divinae majestatis tuae pro nostra et totius mundi salute cum odore suavitates ascendat. Amen.

In spiritu humilitatis et in animo contrito suscipiamur a te Domine: et sic fiat Sacrificium nostrum in conspectu tuo hodie, ut placeat tibi, Domine Deus.

Veni sanctificator omnipotens aeterne Deus, et benedic hoc Sacrificium tuo sancto nomini praeparatum.

Psalmus XXV.

Lavabo inter innocentes manus meas: et circumdabo altare tuum Domine.

Ut audiam vocem laudis: et enarrem universa mirabilia tua.

Domine, dilexi decorem domus tuae: et locum habitationis gloriae tuae.

Ne perdas cum impiis Deus, animam meam: et cum viris sanguinum vitam meam.

In quorum manibus iniquitates sunt: dextera eorum repleta est muneribus.

Ego autem in innocentia mea ingressus sum: redime me et miserere mei.

Pes meus stetit in directo: in ecclesiis benedicam te Domine.

Gloria Patri et Filio: et Spiritui sancto.

Sicut erat in principio, et nunc, et semper: et in saecula saeculorum. Amen.

Suscipe sancta Trinitas, hanc oblationem, quam tibi offerimus ob memoriam passionis, resurrectionis et ascensionis Jesu Christi Domini nostri: et in honore beatæ Mariæ semper Virginis et beati Joannis Baptistæ, et sanctorum Apostolorum Petri et Pauli, et istorum, et omnium Sanctorum: ut illis proficiat ad honorem, nobis autem ad salutem, et illi pro nobis intercedere dignentur in coelis, quorum memoriam agimus in terris. Per eundem Christum Dominum nostrum, Amen.

Orate fratres, ut meum ac vestrum sacrificium acceptabile fiat apud Deum Patrem omnipotentem.

M. Suscipiat Dominus sacrificium de manibus tuis ad laudem et gloriam nominis sui, ad utilitatem quoque nostram totiusque Ecclesiæ suæ sanctæ. S. Amen.

Secreta.

Sanctifica, quaesumus, Domine Deus noster, per tui sancti nominis invocationem, hujus oblationis hostiam: et per eam nosmet ipsos tibi perfice munus aeternum. Per Dominum nostrum Jesum Christum, Filium tuum, qui tecum vivit et regnat in unitate Spiritus sancti Deus:

Praefatio.

Per omnia saecula saeculorum, M. Amen.
Dominus vobiscum. M. Et cum spiritu tuo.
Sursum corda. M. Habemus ad Dominum.
Gratias agamus Domino Deo nostro.

M. Dignum et justum est.

Vere dignum et justum est, aequum et salutare, nos tibi semper et ubique gratias agere, Domine sancte, Pater omnipotens, aeternae Deus. Qui cum unigenito Filio tuo et Spiritu sancto unus es Deus, unus es Dominus: non in unius singularitate personae, sed in unius Trinitate substantiae. Quod enim de tua gloria revelante te credimus, hoc de Filio tuo, hoc de Spiritu sancto sine differentia discretionis sentimus: ut in confessione verae sempiternaeque Deitatis, et in Personis proprietates et in Essentia unitas, et in Majestate adoretur aequalitas. Quam laudant Angeli atque Archangeli, Cherubim quoque ac

Seraphim, qui non cessant clamare quotidie una voce dicentes:

Sanctus, Sanctus, Sanctus, Dominus Deus Sabaoth. Pleni sunt coeli et terra gloria tua. Hosanna in excelsis. Benedictus, qui venit in nomine Domini. Hosanna in excelsis.

Canon Missae.

Te igitur, clementissime Pater, per Jesum Christum Filium tuum Dominum nostrum, supplices rogamus ac petimus, uti accepta habeas et benedicas haec dona, haec munera, haec sancta Sacrificia illibata: inprimis quae tibi offerimus pro Ecclesia tua sancta catholica, quam pacificare, custodire, adunare et regere digneris toto orbe terrarum una cum famulo tuo Papa nostro N. et Antistite nostro N., et omnibus orthodoxis atque catholicae et apostolicae fidei cultoribus.

Commemoratio pro Vivis. Memento Domine, famulorum famularumque tuarum N. N., et omnium circumstantium, quorum tibi fides cognita est et nota devotio: pro quibus tibi offerimus, vel qui tibi offerunt hoc sacrificium laudis pro se suisque omnibus, pro redemptione animarum suarum, pro spe salutis et incolumitatis suae, tibiique reddunt vota sua aeterno Deo, vivo et vero.

Communicantes et memoriam venerantes in-
primis gloriosae semper Virginis Mariae, Gene-
tricis Dei et Domini nostri Jesu Christi: sed et
beatorum Apostolorum ac Martyrum tuorum:
Petri et Pauli, Andreae, Jacobi, Philippi, Bartho-
lomaei, Matthaei, Simonis et Thaddaei, Lini, Cleti,
Clementis, Xysti, Cornelii, Cypriani, Laurentii,
Chrysogoni, Joannis et Pauli, Cosmae et Damiani,
et omnium Sanctorum tuorum: quorum meritis
precibusque concedas, ut in omnibus protectionis
 tuae muniamur auxilio. Per eundem Christum
Dominum nostrum, Amen.

Hanc igitur oblationem servitutis nostrae,
sed et cunctae familiae tuae quaesumus, Domine,
ut placatus accipias, diesque nostros in tua pace
disponas, atque ab aeterna damnatione nos eripi,
et in electorum tuorum jubeas grege numerari.
Per Christum Dominum nostrum. Amen.

Quam oblationem tu Deus in omnibus, quae-
sumus, benedictam, adscriptam, ratam, rationabi-
lem, acceptabilemque facere digneris: ut nobis
Corpus et Sanguis fiat dilectissimi Filii tui, Do-
mini nostri Jesu Christi.

Qui pridie, quam pateretur, accepit panem
in sanctas ac venerabiles manus suas, et elevatis
oculis in coelum ad te Deum Patrem suum omni-

potentem, tibi gratias agens, benedixit, fregit, deditque discipulis suis, dicens; Accipite et manducate ex hoc omnes.

Hoc Est Enim Corpus Meum.

Simili modo postquam coenatum est, accipiens et hunc praeclarum calicem in sanctas ac venerabiles manus suas item tibi gratias agens, benedixit, deditque discipulis suis dicens: Accipite et bibite ex eo omnes:

Hic Est Enim Calix Sanguinis Mei, Novi Et Aeterni Testamenti, Mysterium Fidei, Qui Pro Vobis Et Pro Multis Effundetur In Remissionem Peccatorum.

Haec quotiescunque feceritis, in mei memoriam facietis. (Facta adoratione pergit Sacerdos.)

Unde et memores, Domine, nos servi tui, sed et plebs tua sancta ejusdem Christi Filii tui Domini nostri tam beatae passionis nec non ab inferis resurrectionis, sed et in caelos gloriosae ascensionis, offerimus praeclarae majestati tuae de tuis donis ac datis hostiam puram, hostiam sanctam, hostiam immaculatam, Panem sanctum vitae aeternae, et Calicem salutis perpetuae. — Supra quae propitio ac sereno vultu respicere digneris et accepta habere, sicuti accepta habere dignatus es munera pueri tui justii Abel, et sacri-

ficium Patriarchæ nostri Abrahæ, et quod tibi obtulit summus sacerdos tuus Melchisedech sanctum sacrificium, immaculatam hostiam. Supplices te rogamus, omnipotens Deus: jube hæc perferri per manus sancti Angeli tui in sublime altare tuum, in conspectu divinæ majestatis tuæ: ut quotquot ex hac altaris participatione sacrosanctum Filii tui Corpus et sanguinem sumserimus, omni benedictione cœlesti et gratia repleamur. Per eundem Christum Dominum nostrum.

Commemoratio pro Defunctis. Memento etiam, Domine, famulorum famularumque tuarum N. et N., qui nos præcesserunt cum signo fidei, et dormiunt in somno pacis. Ipsis Domine, et omnibus in Christo quiescentibus, locum refrigerii, lucis et pacis ut indulgeas, deprecamur. Per eundem Christum Dominum nostrum, Amen.

Nobis quoque peccatoribus, famulis tuis de multitudine miserationum tuarum sperantibus, partem aliquam et societatem donare digneris cum tuis sanctis Apostolis et Martyribus: cum Joanne, Stephano, Matthia, Barnaba, Ignatio, Alexandro, Marcellino, Petro, Felicitate, Perpetua, Agatha, Lucia, Agnete, Caecilia, Anastasia, et omnibus Sanctis tuis: intra quorum nos consortium non aestimator meriti, sed veniæ, quaesumus, largi-

tor admitte. Per Christum Dominum nostrum. —
 Per quem haec omnia Domine, semper bona creas,
 sanctificas, vivificas, benedicis et praestas nobis.
 Per ipsum et cum ipso et in ipso est tibi Deo
 Patri omnipotenti in unitate Spiritus sancti omnis
 honor et gloria: Per omnia saecula saeculorum.
 Amen.

Oremus. Praeceptis salutaribus moniti, et
 divina institutione formati audemus dicere:

Pater noster, qui es in cœlis: sanctificetur
 nomen tuum: adveniat regnum tuum: Fiat volun-
 tas tua, sicut in cœlo et in terra. Panem no-
 strum quotidianum da nobis hodie: et dimitte
 nobis debita nostra, sicut et nos dimittimus
 debitoribus nostris. Et ne nos inducas in tenta-
 tionem. M. sed libera nos a malo.

Amen. Libera nos, quaesumus Domine, ab
 omnibus malis, praeteritis, praesentibus et futuris:
 et intercedente beata et gloriosa semper Virgine
 Dei Genitrice Maria cum beatis Apostolis tuis
 Petro et Paulo, adque Andrea et omnibus Sanctis,
 da propitius pacem in diebus nostris: ut ope
 misericordiae tuae adjuti, et a peccato simus
 semper liberi, et ab omni perturbatione securi.
 Per eundem Dominum nostrum Jesum Christum
 Filium tuum, qui tecum vivit et regnat in unitate

Spiritus sancti Deus: Per omnia saecula saeculorum. M. Amen.

Pax Domini sit semper vobiscum. M. Et cum spiritu tuo.

Haec commixtio et consecratio Corporis et Sanguinis Domini nostri Jesu Christi fiat accipientibus nobis in vitam aeternam, Amen.

Agnus Dei, qui tollis peccata mundi: miserere nobis.

Agnus Dei, qui tollis peccata mundi: miserere nobis.

Agnus Dei, qui tollis peccata mundi: dona nobis pacem.

Domine Jesu Christe, qui dixisti Apostolis tuis: Pacem relinquo vobis, pacem meam do vobis: ne respicias peccata mea, sed fidem Ecclesiae tuae, eamque secundum voluntatem tuam pacificare et coadunare digneris: Qui vivis et regnas Deus per omnia saecula saeculorum. Amen.

Domine Jesu Christe, Fili Dei vivi, qui ex voluntate Patris cooperante Spiritu sancto per mortem tuam mundum vivificasti: libera me per hoc sacrosanctum Corpus et sanguinem tuum ab omnibus iniquitatibus meis et universis malis; et fac me tuis semper inhaerere mandatis, et a te nunquam separari permittas: Qui cum eodem Deo Patre et Spiritu sancto vivis et regnas in saecula saeculorum. Amen.

Perceptio Corporis tui Domine Jesu Christe, quod ego indignus sumere praesumo, non mihi proveniat in iudicium et condemnationem, sed pro tua pietate prosit mihi ad tutamentum mentis et corporis, et ad medelam percipiendam: Qui vivis et regnas cum Deo Patre in unitate Spiritus sancti Deus, per omnia saecula saeculorum. Amen.

Panem cœlestem accipiam, et nomen Domini invocabo.

Domine, non sum dignus, ut intres sub tectum meum: sed tantum dic verbo, et sanabitur anima mea.

Domine, non sum dignus, ut intres sub tectum meum: sed tantum dic verbo, et sanabitur anima mea.

Domine, non sum dignus, ut intres sub tectum meum: sed tantum dic verbo, et sanabitur anima mea.

Corpus Domini nostri Jesu Christi custodiat animam meam in vitam aeternam. Amen.

Quid retribuam Domino pro omnibus, quae retribuit mihi? Calicem salutaris accipiam, et nomen Domini invocabo. Laudans invocabo Dominum et ab inimicis meis salvus ero.

Sanguis Domini nostri Jesu Christi custodiat animam meam in vitam aeternam. Amen.

Quod ore sumsimus, pura mente capiamus: et de munere temporali fiat nobis remedium sempiternum.

Corpus tuum, Domine, quod sumsi et Sanguis, quem potavi, adhaereat visceribus meis: et praesta, ut in me non remaneat scelerum macula, quem pura et sancta refecerunt Sacramenta: Qui vivis et regnas in saecula saeculorum. Amen.

Communio.

Benedicimus Deum cœli, et coram omnibus viventibus confitebimur ei: quia fecit nobiscum misericordiam suam. — Dominus vobiscum. M. Et cum spiritu tuo.

Pestcommunio.

Oremus. Proficiat nobis ad salutem corporis et animae, Domine Deus noster, hujus Sacramenti susceptio: et sempiternae sanctae Trinitatis ejusdemque individuae Unitatis confessio. Per Dominum nostrum Jesum Christum Filium tuum, qui tecum vivit et regnat in unitate Spiritus sancti Deus: per omnia saecula saeculorum. M. Amen. — Dominus vobiscum. M. Et cum spiritu tuo. Ite missa est. (Vel: Benedicamus Domino.) M. Deo Gratias.

Placeat tibi sancta Trinitas obsequium servitutis meae, et praesta: ut Sacrificium, quod

oculis divinae majestatis tuae indignus obtuli, tibi sit acceptabile, mihi et omnibus, pro quibus illud obtuli, sit te miserante propitiabile. Per Christum Dominum nostrum. Amen.

Benedicat vos omnipotens Deus: Pater, et Filius et Spiritus sanctus. M. Amen.

Dominus vobiscum. M. Et cum spiritu tuo.

Initium sancti Evangelii secundum Ioannem.

M. Gloria tibi Domine.

In principio erat Verbum et Verbum erat apud Deum, et Deus erat Verbum. Hoc erat in principio apud Deum. Omnia per ipsum facta sunt: et sine ipso factum est nihil, quod factum est. In ipso vita erat, et vita erat lux hominum: et lux in tenebris lucet, et tenebrae eam non comprehenderunt. Fuit homo missus a Deo, cui nomen erat Ioannes. Hic venit in testimonium, ut testimonium perhiberet de lumine, ut omnes crederent per illum. Non erat ille lux, sed ut testimonium perhiberet de lumine. Erat lux vera quae illuminat omnem hominem venientem in hunc mundum. In mundo erat, et mundus per ipsum factus est, et mundus eum non cognovit. In propria venit et sui eum non receperunt. Quotquot autem receperunt eum, dedit eis potestatem filios Dei fieri, his qui credunt in nomine

ejus: qui non ex sanguinibus neque ex voluntate carnis, neque ex voluntate viri, sed ex Deo nati sunt. Et Verbum Caro Factum Est, et habitavit in nobis: et vidimus gloriam ejus, gloriam quasi Unigeniti a Patre plenum gratiae et veritatis. M. Deo gratias!

Orationes sub sacrificio Missae.

Oratio Præparatoria.

Domine Jesu Christe, Verbum Patris, qui Corporis et Sanguinis tui Sacramentum in ultima cœna instituisti, illudque in passionis et mortis tuae memoriam a fidelibus tuis offerri et frequentari voluisti: fac me, quaeso, participem meritorum et beneficiorum tuorum, quae in hac Missa rememorantur, et concede, ut cum gustu et fructu spirituali devote et attente intersim huic sanctissimo Sacrificio, quod tibi humiliter nunc offero in memoriam amarissimae tuae passionis et mortis, ad honorem sanctissimae Virginis Matris tuae Mariae, omniumque Sanctorum tuorum, pro delictorum meorum remissione et purgatione, pro animae meae salute, pro totius Ecclesiae pro-

fectu, et pro refrigerio ac liberatione fidelium animarum corpore exutarum. Fac me, Domine Jesu Christe, hujus sacri mysterii cum gaudio spirituali participem, et concede ad omnium servire salutem, quod pro redemptione omnium instituere dignatus es. Amen.

Ad Kyrie Eleison.

Benigne, pie et misericors Pater, miserere mei. In remissionem omnium meorum totiusque mundi peccatorum offero tibi vitam, passionem et mortem unigeniti Filii tui, offero tibi omnia merita dulcissimæ Matris illius, omniumque Sanctorum, ut illorum amore mihi ignoscas, et æternam vitam largiaris.

Pie Jesu, Redemptor mi, miserere mei. Oro te, clementissime, fac me omnium meritorum tuorum participem, ut tibi concorporatus et virtute hujus Sacrificii unum quid tecum effectus, tibi per amorem et imitationem sanctissimæ vitæ tuæ ubique conformis vivam, teque ut palmes in vite frui merear.

Spiritus sancte, Consolator optime, miserere mei. Illumina intellectum meum, rege corpus, moderare animum, conforta Spiritum, ut vincat omnes affectus cordis inordinatos. Da fidem certam, spem firmam, et puram perfectamque

caritatem. Fac, ut cum dulcedine te diligam, et in omni loco atque tempore tuæ voluntati satisfaciam. Amen.

Ad Gloria In Excelsis.

Omnipotens æternæ Deus! Tibi sancti et humiles corde, tibi spiritus et animæ justorum, tibi omnes superni cives et cuncti beatorum spirituum ordines gloriam et honorem suppliciter adorantes concinunt sine fine. Laudant te, Domine, illi magnifice et honorabiliter. Laudat te homo, magna portio creaturæ tuæ. Sed et ego peccator desiderio magno cupio te laudare, amare te opto amore præcipuo. Deus meus, vita mea, fortitudo mea et laudatio mea, dignare me laudare te. Da mihi lumen in corde et verbum in ore, ut cor meum meditetur gloriam tuam et lingua mea tota die cantet laudes tuas. Sed quia non est pulchra laus in ore peccatoris, et quia vir pollutis labiis ego sum, munda, obsecro, cor meum ab omni inquinamento; sanctifica me, sanctificator omnipotens, interius et exterius, et fac me dignum laudibus tuis. Suscipe benigne et laudabiliter de manu cordis et de mentis amore, suscipe sacrificium labiorum meorum, fiatque acceptabile in conspectu tuo, et ascendat ad te in odore suavitatis. Amen.

Ad Collectam.

Omnipotens sempiterne Deus, te suppliciter exoramus, ut respicere digneris de excelso sanctuario tuo super congregationem nostram, Ecclesiaeque tuae preces, pro nobis omnibus ad te Sacerdotis hujus ministerio destinatas, clementer acceptes et exaudias. Ideoque pro immensa tua misericordia largiaris nobis peccatorum nostrorum veniam, integritatem mentis, incolumitatem corporis, necessariam vitae sustentationem, pacem in diebus nostris, aëris temperiem, fertilitatem terrae: catholicae fidei unitatem, extirpationem omnium haeresium, consiliorum impiorum destructionem, verae orthodoxaeque religionis incrementum, caritatis ac pietatis fervorem, sinceram animi devotionem, tolerantiam longanimitatemque in afflictionibus, in spe gaudium et laetitiam: omnia denique ad salutem tum animae tum corporis utilia, et ad tuae inprimis gloriae augmentum idonea. Per Dominum.

Ad Epistolam.

O aeternae Deus, qui nunquam desinis nos indignos famulos tuos publico Ecclesiae tuae ministerio Apostolicis, Propheticis, aliisque sacris doctrinis et monitis ad cultum et amorem tui

Nominis excitare, et adversus mundi, carnis et daemonis insidias praemunire: da, quaesumus, ut salutaria dogmata ac monita omnes ex animo semper amplectamur, eisque mores et omnem vitam nostram serio conformare conemur. Et ne tandem nobis ad cumulum damnationis cedat, viam veritatis seu voluntatem tuam per tot interpretes ac praecones tuos cognovisse, et non fecisse: da nobis gratiam et vires, ut, quae facienda toties cognoscimus, efficaciter facere valeamus. Amen.

Ad Evangelium.

Domine Jesu Christe, qui a Deo venisti Magister, et viam Dei nos in veritate docuisti, olim quidem visus in terris et cum hominibus conversatus, hodie etiam per Evangelistarum scripta et praecones verbi tui docere non cessans: da nobis intellectum capacem salutaris doctrinae tuae; accende et affectum zelo sapientiae caelestis, et doce nos facere voluntatem tuam: ut fidem, quae ex auditu Evangelii nascitur et quam lingua nostra loquitur, etiam moribus vita fateatur. Solius enim gratiae tuae opus est, ut sciamus voluntatem tuam et faciamus: quia ex nobis servi inutiles sumus, ex te autem est omnis sufficientia nostra. Amen.

Ad symbolum.

Credo in Deum vivum et verum, trinum et unum, Creatorem, Redemptorem et Sanctificatorem meum. Credo Patrem ingenitum, Filium unigenitum, Spiritum sanctum ab utroque procedentem. Credo Dei Filium humanam naturam assumpsisse, et nos in cruce morte acerbissima redemisse. Credo Deum remuneratorem bonorum et vindicem malorum, qui reddet unicuique secundum opera ejus: bonis aeterna præmia, malis vero aeterna supplicia. Credo animam meam esse immortalem, meque felicitatem aeternam sine Dei gratia consequi non posse. Credo et confiteor fidem illam sanctissimam, quam Jesus Christus docuit, quam Apostoli prædicarunt, quam sancta romana tenet et profitetur Ecclesia: in quam fidem ex gratia vocatus, natus et baptizatus sum. Huic me hodie fidei obstringo et fateor, me ab ea ne unguem latum discedere velle, usque dum in patriam, ubi nulla amplius fides, sed clara erit visio, me vocet. Quodsi autem ex tentatione diabolica aut ex ignorantia mea aliquid in hujus fidei præjudicium dixero vel cogitavero, id nunc revoco et quasi non dictum aut non cogitatum habere volo: nunquam enim tali dicto aut cogitationi sciens et volens assensum præbebo, adjuvante me, omnipotens Deus, tua gratia. Amen.

Ad Offertorium.

Piissime Pater, in unione illius excellentissimæ caritatis, qua Unigenitus tuus omnem influxum divinitatis, qui in ejus humanitatem descendit, cum plena gratitudine offerens refudit in abyssum originis suæ, offero tibi omnia et singula bona, quæ ex ineffabili benignitate tua mihi unquam contulisti, eaque in summum gratitudinis affectum una cum meritis et virtutibus ejusdem Filii tui super altari tuo in sempiternæ laudis sacrificium immolo. Maxime vero offero tibi cor meum, sed heu! nimis pravum et improbum, illudque sacro huic Calici immergo ea intentione et desiderio, ut omnes illæ orationes et benedictiones, quæ super hunc Calicem fient, etiam super cor meum pronuncientur, atque per virtutem istius ineffabilis Consecrationis qua vinum in Filii tui Sanguinem convertetur, id ipsum in tui amorem efficaciter convertatur. — Ad hæc in unione amoris et gratitudinis illius, qua Filius tuus omnes adversitates suas tibi obtulit, offero tibi super altare tuum, quicquid adversi tam mihi quam ulli hominum e corde tuo paterno ad salutem nostram misisti: rogans, ut id omne una cum hoc sacrificio in odorem suavitatis suscipias, nobisque ad salutem provenire

concedas. Demum in unione resignationis Unigeniti tui offero et resiguo me in tuam sanctissimam voluntatem, ex toto corde desiderans ut per me, in me, et circa me tuum in omnibus laudabilissimum beneplacitum semper perficias: ad quod perficiendum praebeo tibi Regi regum, Domine, totam substantiam corporis et animae meae, ad serviendum tibi pro gloria tuae colendae Majestatis. Amen.

Ad Canonem.

O Deus ineffabilis! jam incipiunt illa tremenda Mysteria, quae nec Cherubim, nec Seraphim, nec omnes Virtutes cœlorum plene valent comprehendere: cum tibi soli cognitum sit, cum quanta amoris magnitudine te indies pro salute fidelium Deo Patri super altare in hostiam laudis et placationis offeras. Ideoque haec sacrosancta arcana universi Angelorum ordines summa demissione venerantur: et quod videant Regem suum et Dominum, qui olim hominem redempturus summo amore descenderat, nunc iterum pro salute ejusdem hominis ineffabili quodam modo super altare descendere, atque sub vilissimis panis et vini speciebus se abdere. O bone Jesu, tam inaestimabiliter tamque excellenter reverendum

est opus illud, quod nunc operaberis, quod par-
vitas mea nequaquam audet ad hoc vel respicere.
Unde demergens me jacebo in profundissima
valle humilitatis, quam potero investigare, ex-
pectans ibidem portionem meam, quia omnibus
electis inde salus proveniet. O utinam, piissime
Jesu, in hoc opere tuo te adjuvare, efficereque
possem, ut haec oblatio sacratissima secundum
dignitatem suam plenum sortiretur effectum!
Certe libentissime quantumcunque difficili labore
ad hoc inservire vellem. Rogo ergo te: da Sa-
cerdoti huic, ut tali dignitate te tractet et offerat,
quatenus haec oblatio omnibus fidelibus vivis
atque defunctis summe prodesse valeat. Amen.

Ad Elevationem s. Hostiae.

Ave Corpus Christi natum de Maria Virgine,
Vere passum, immolatum in cruce pro homine!
Esto mihi praegustatum mortis in examine.

O dulcis,

O pie,

O Jesu Fili Mariae! esto mihi Jesus, et salva me.

Ad Elevationem s. Calicis.

Ave Sanguis Jesu Christi in hoc sacro Calice,
Qui in cruce profluxisti ex aperto latere,
Et ab omni abluisti totum mundum crimine.

Ablue,
sanctifica, et
custodi animam meam in vitam aeternam ! Amen.

Post Elevationem.

Sanctissime Pater ! cum Unigenitus tuus jam vere in altari praesens, semetipsum fecerit sacrificium et victimam pro peccatis nostris ; ideo in unione amoris illius , quo ille se ipsum olim in cruce, et modo in altari obtulit, offero tibi sanctissimum ejus Corpus et Sanguinem, humanitatem, et divinitatem, virtutes et perfectiones, passionem et mortem : et in unione horum offero tibi omnes virtutes merita et gratias B. Virginis Mariae, omniumque Sanctorum, nec non et omnia bona opera cunctorum hominum totumque thesaurum sanctae Ecclesiae. Quibus specialiter addo, quidquid ego meique speciales amici unquam boni peregrimus, aut mali pro tua gloria sustinuimus. Et hanc oblationem unacum hoc et totius orbis Sacrificiis offero tibi, o Pater aeternae, per dilectum Filium tuum in virtute Spiritus sancti ad tuam supremam laudem et gloriam, in recognitionem tuae supremae majestatis et domini, in gratiarum actionem pro omnibus beneficiis ulli unquam creaturae collatis, et in plenam aboli-

tionem omnis injuriae ab ullo unquam tibi irrogatae. Deinde offero tibi eandem in augmentum gaudii et gloriae humanitatis Domini nostri Jesu Christi, in cultum et venerationem omnium mysteriorum vitae et mortis ejus, et in augmentum gloriae et beatitudinis B. Virginis Mariae, omniumque Sanctorum, maxime Patronorum meorum, et quorum hodie memoria colitur. Tertio offero tibi eandem pro me misero peccatore, et pro omnibus meis spiritualibus et carnalibus amicis (maxime pro N. N.) et pro omnibus Christianis vivis atque defunctis (maxime pro N. N.) rogans, ut illam suscipere digneris in condignam gratiarum actionem pro omnibus bonis in corpore et anima nobis impensis, ad impetrandam omnem gratiam nobis necessariam, ad avertendum omne malum corporale et spirituale, quod saluti nostrae officeret et demum in perfectissimam remissionem et satisfactionem omnium peccatorum et negligentiarum nostrarum: pro quibus offero tibi omne beneplacitum, quod tibi exhibuit, omnemque satisfactionem, quam tibi pro debitis nostris persolvit Jesus Christus Filius tuus Dominus noster. Per ipsum et cum ipso et in ipso sit tibi Deo Patri omnipotenti in unitate Spiritus sancti omnis honor et gloria per omnia saecula saeculorum. Amen.

Ad Orationem Dominicam.

Pater noster, qui in coelis es, et in altis habitas, cujus coelum sedes est, terra autem scabellum pedum tuorum: da, ut nomen sanctum tuum invocetur super nos, et a cunctis, qui tuae sunt participes imaginis, digne colatur ac sanctificetur. Regnum tuum, regnum omnium saeculorum, nobis contingat et ad nos perveniat, quo ipsius gaudiis perpetuo consortes efficiamur. Fac Domine, ut tua divina voluntas, quae nostram sanctificationem et salutem requirit, jugiter a nobis fiat, ut, sicuti sancti Angeli in coelis suam voluntatem voluntati tuae divinae uniformem faciunt, ita et nos tuis mandatis obtemperantes, salutem nostram sedulo operemur. Panem quoque nostrum, et quae quotidiano victui sunt necessaria, hodie nobis et quamdiu hac fruimur aura, tribue, ut cum gratiarum actione bonis his temporalibus uti valeamus. Debita nostra, quibus verbo vel opere in te Deum Patrem nostrum, in proximos nostros, vel etiam in nos ipsos peccando obruti et gravati sumus, pro tua ineffabili misericordia clementer dimitte; cor quoque nostrum instiga et eo impelle, ut quaecunque in nos peccavit frater noster, libenter illi et ex animo dimittamus. Nulla nos tentatio diaboli, mundi vel carnis pro-

prie superet; sed fac cum tentatione proventum, ut possimus sustinere: et ab omnibus malis praeteritis, praesentibus et futuris nos clementissime libera. Per Christum Dominum nostrum, Amen.

Communio Spiritualis.

Domine Jesu Christe, Fili Dei vivi, firmissima fide credo et profiteor, te hic corporaliter et substantialiter praesentem in altari, hostiam veram et vivam immolari, qui pro me natus, passus, et in cruce immolatus ac mortuus fuisti. Te ergo Deum meum et Creatorem ac Redemptorem meum supplex adoro et veneror, ac divinae Majestati tuae corde humili et contrito me prosterno. Et per tuam misericordiam ac merita infinita spero remissionem omnium peccatorum, de quibus sincerissime doleo, propter te Deum meum summum bonum offensum, quod amo super omnia. O Deus animae meae! gaudeo de ineffabili gloria et perfectione tua: utinam te una mecum omnes creaturae, ut par est, agnoscant, ament, glorificent! Id certe ego ex nunc desidero, et amore tui me ac mea omnia tibi humillime offero propter infinitam bonitatem et beneficia tua, pro quibus te laudo et benedico, nec aliud quidquam ulterius a te peto et rogo, quam ut tecum unus

spiritus efficiar; et quia sacramentali Communionē tibi nunc uniri non possum, transforma me nihilominus totum in te, ut vivam ego, jam non ego, vivas vero tu in me, et ego in te et maneat tecum, nec a te unquam separari me permittas: Qui vivis.

Postcommunio.

Ecce Pater cœlestis! ad altare tuum misit tibi sancta mater Ecclesia Hostiam istam superdignissimam, quam tu olim misisti immolandam pro nobis. Illam ergo suscipere digneris in amore illo superexcellente, quo Filium tuum de regione nostra ad regnum tuum revertentem, tibi que Deo Patri omnem fructum humanitatis suae gloriosaque vulnera carnis suae praesentantem suscepisti. Non recedant piissime Pater, ab oculis tuis cicatrices ejus in perpetuum, ut memineris, quantum ab eo pro peccatis nostris satisfactionem acceperis. Igitur virtute hujus oblationis incruentae miserere mei, et omnium peccatorum, cunctorumque fidelium vivorum ac defunctorum: da illis gratiam et misericordiam, remissionem peccatorum, et vitam aeternam. Amen.

Oratio Post Missam.

Domine Jesu Christe, qui ascendens in cœlum animas vocasti ad cœlestia, et nobis maximam

spem illa consequendi dedisti: benedic, quaeso, animabus nostris, ut non ad captandam vitae hujus vanissimam jucunditatem, sed ad regni perennis beatitudinem consecrandam eamus. Corpore revertamur ad nostra; mente vero tibi uni omnium Conditori maneamus consociati, ac nunquam a te divelli nos aut distrahi patiamur. Denique praesta, ut cum vivis et defunctis extremo judicii die in illa bonorum multitudine laeti sub aspectum tuum venire possimus: qui vivis et regnas cum Deo Patre in unitate Spiritus sancti Deus per omnia saecula saeculorum. Amen.

MISSA PRO DEFUNCTIS.

Introitus.

Requiem aeternam dona eis Domine; et lux perpetua luceat eis.

Psalm. Te decet hymnus Deus in Sion, et tibi reddetur votum in Jerusalem; exaudi orationem meam, ad te omnis caro veniet.

Requiem aeternam dona eis Domine: et lux perpetua luceat eis.

Oratio.

pro defunctis Fratribus, Propinquis et Benefactoribus.

Deus, veniae largitor et humanae salutis amator : quaesumus clementiam tuam, ut nostrae congregationis Fratres propinquos et benefactores, qui ex hoc saeculo transierant, beata Maria semper Virgine intercedente, cum omnibus Sanctis tuis ad perpetuae beatitudinis consortium pervenire concedas.

Pro omnibus fidelibus defunctis.

Fidelium Deus omnium Conditor et Redemptor : animabus famulorum famularumque tuarum remissionem cunctorum tribue peccatorum; ut indulgentiam, quam semper optaverunt, piis supplicationibus consequantur. Qui vivis.

Epistola.

Lectio libri Apocalypsis beati Joannis Apostoli.

In diebus illis audiavi vocem de coelo dicentem mihi, Scribe: Beati mortui, qui in Domino moriuntur. Amodo jam dicit Spiritus, ut requiescant a laboribus suis: opera enim illorum sequuntur illos.

Graduale.

Requiem aeternam dona eis Domine: et lux perpetua luceat eis.

Psalm. In memoria aeternae erit justus: ab auditione mala non timebit.

Tractus.

Absolve Domine animas omnium fidelium defunctorum ab omni vinculo delictorum. V. Et gratia tua illis succurrente, mereantur evadere judicium ultionis. V. Et lucis aeternae beatitudine perfrui.

Dies irae, dies illa,
Solvat saeculum in favilla
Teste David cum Sibylla.

Quantus tremor est futurus,
Quando Judex est venturus,
Cuncta stricte discussurus!

Tabat mirum spargens sonum
Per sepulcra regionum
Coget omnes ante thronum.

Mors stupebit et natura,
Cum resurget creatura
Judicanti responsura.

Liber scriptus proferetur,
In quo totum continetur,
Unde mundus judicetur.

Judex ergo cum sedebit,
Quidquid latet apparebit,
Nil inultum remanebit.

Quid sum miser tunc dicturus,
Quem patronum rogaturus,
Cum vix justus sit securus?

Rex tremendae majestatis,
Qui salvandos salvas gratis!
Salva me fons pietatis.

Recordare, Jesu pie,
Quod sum causa tuæ viae,
Ne me perdas illa die.

Quaerens me, sedisti lassus;
Redemisti, crucem passus:
Tantus labor non sit cassus.

Iusto Judex ultionis,
Donum fac remissionis,
Ante diem rationis.

Ingemisco tanquam reus;
Culpa rubet vultus meus:
Supplici parce Deus.

Qui Mariam absolvisti,
Et latronem exaudisti:
Mihi quoque spem dedisti.

Preces meae non sunt dignae:
Sed tu bonus fac benigne,
Ne perenni cremer igne.

Inter oves locum praesta,
Et ab hoedis me sequestra,
Statuens in parte dextra.

Confutatis maledictis,
Flammis acribus addictis,
Voca me cum benedictis.

Oro supplex et acclinis,
Cor contritum quasi cinis,
Gere curam mei finis.

Lacrymosa dies illa,
Qua resurget ex favilla
Judicandus homo reus!

Huic ergo parce, Deus:
Pie Jesu, Domine,
Dona eis requiem. Amen.

V. Requiem aeternam dona eis, Domine.

R. Et lux perpetua luceat eis. Oremus.

Oratio.

Fidelium Deus omnium Conditor et Redemptor: animabus famulorum famularumque tuarum remissionem cunctorum tribuae peccatorum: ut indulgentiam, quam semper optaverunt, piis supplicationibus consequantur. Qui vivis et regnas in saecula saeculorum. R. Amen.

Evangelium.

Sequentia sancti Evangelii secundum Joannem.

In illo tempore: Dixit Jesus turbis Judaeorum: Ego sum panis vivus, qui de coelo descendi. Si quis manducaverit ex hoc pane, vivet in aeternum: et panis quem ego dabo, caro mea est pro mundi vita. Litigabant ergo Judaei ad invicem, dicentes: Quomodo potest hic nobis carnem suam dare ad manducandum? Dixit ergo eis Jesus: Amen, amen dico vobis: nisi manducaveritis carnem Filii hominis, et biberitis ejus sanguinem, non habetis vitam in vobis. Qui manducat meam carnem, et bibit meum sanguinem, habet vitam aeternam: et ego resuscitabo eum in novissimo die.

Offertorium.

Domine Jesu Christe, Rex gloriae, libera animas omnium fidelium defunctorum de poenis inferni et de profundo lacu: libera eas de ore leonis, ne absorbeat eas tartarus, ne cadant in obscurum: sed signifer sanctus Michael repraesentet eas in lucem sanctam: Quam olim Abrahae promisisti et semini ejus.

V. Hostias et preces tibi, Domine, laudis offerimus: tu suscipe pro animabus illis, quarum hodie memoriam facimus: fac eas Domine de morte transire ad vitam: Quam olim Abrahae promisisti et semini ejus.

Secreta.

Pro def. Fratribus, Propinquis et Benefactoribus.

Deus, cujus misericordiae non est numerus, suscipe propitius preces humilitatis nostrae: et animabus fratrum propinquorum et benefactorum nostrorum, quibus tui nominis dedisti confessionem, per haec Sacramenta salutis nostrae cunctorum remissionem tribue peccatorum.

Pro omnibus fidelibus Defunctis.

Hostias, quaesumus Domine, quas tibi pro animabus famulorum famularumque tuarum offerimus, propitiatus intende: ut, quibus fidei christianae meritum contulisti, dones et praemium. Per Dominum.

Praefatio.

Vere dignum et justum est, aequum et salutare, nos tibi semper et ubique gratias agere. Domine sancte, Pater omnipotens, aeternae Deus: per Christum Dominum nostrum. Per quem majestatem tuam laudant Angeli, adorant Dominationes, tremunt Potestates; Coeli coelorumque Virtutes, ac beata Seraphim, socia exultatione concelebrant. Cum quibus et nostras voces ut admitti jubeas, deprecamur, supplici confessione dicentes: Sanctus, Sanctus, Sanctus Dominus Deus Sabaoth. Pleni sunt coeli et terra gloria tua. Hosanna in excelsis. Benedictus, qui venit in nomine Domini. Hosanna in excelsis.

Canon Missae.

Te igitur, clementissime Pater, per Jesum Christum Filium tuum Dominum nostrum, supplices rogamus ac petimus, uti accepta habeas et benedicas haec dona, haec munera, haec sancta Sacrificia illibata: inprimis quae tibi offerimus pro Ecclesia tua sancta catholica, quam pacificare, custodire, adunare et regere digneris toto orbe terrarum una cum famulo tuo Papa nostro N. et Antistite nostro N., et omnibus orthodoxis atque catholicae et apostolicae fidei cultoribus.

Commemoratio pro Vivis.

Memento Domine, famulorum famularumque tuarum N. N. et omnium circumstantium, quorum tibi fides cognita est et nota devotio: pro quibus tibi offerimus vel qui tibi offerunt hoc sacrificium laudis pro se suisque omnibus, pro redemptione animarum suarum, pro spe salutis et incolumitatis suae, tibi que reddunt vota sua aeterno Deo, vivo et vero.

Infra Actionem.

Communicantes et memoriam venerantes inprimis gloriosae semper Virginis Mariae, Genetricis Dei et Domini nostri Jesu Christi: sed et beatorum Apostolorum ac Martyrum tuorum Petri et Pauli, Andreae, Jacobi, Joannis, Thomæ, Philippi, Bartholomaei, Matthaei, Simonis et Thadæi, Lini, Cleti, Clementis, Xysti, Cornelii, Cypriani, Laurentii, Chrysogoni, Joannis et Pauli, Cosmae et Damiani, et omnium Sanctorum tuorum; quorum meritis precibusque concedas, ut in omnibus protectionis tuae muniamur auxilio. Per eundem Christum Dominum nostrum. Amen.

Hanc igitur oblationem servitutis nostrae, sed et cunctae familiae tuae quaesumus Domine, ut placatus accipias: diesque nostros in tua pace disponas, atque ab aeterna damnatione nos eripi,

et in electorum tuorum jubeas grege numerari.
Per Christum, Dominum nostrum. Amen.

Quam oblationem tu Deus in omnibus, quaesumus, benedictam, adscriptam, ratam, rationabilem, acceptabilemque facere digneris: ut nobis Corpus et Sanguis fiat dilectissimi Filii tui Domini nostri Jesu Christi.

Qui pridie, quam pateretur, accepit panem in sanctas ac venerabiles manus suas, et elevatis oculis in cœlum ad te Deum Patrem suum omnipotentem, tibi gratias agens, benedixit, fregit, deditque discipulis suis, dicens: Accipite et manducate ex hoc omnes:

Hoc Est Enim Corpus Meum.

Simili modo, postquam cœnatum est, accipiens et hunc praeclarum calicem in sanctas ac venerabiles manus suas, item tibi gratias agens, benedixit, deditque discipulis suis, dicens: Accipite et bibite ex eo omnes:

Hic Est Enim Calix Sanguinis Mei, Novi Et Aeterni Testamenti, Mysterium Fidel, Qui Pro Vobis Et Pro Multis Effundetur In Remissionem Peccatorum.

Haec quotiescunque feceritis in mei memoriam facietis.

Facta adoratione pergit Sacerdos.

Unde et memores, Domine, nos servi tui, sed et plebs tua sancta, ejusdem Christi Filii tui Domini nostri tam beatae passionis, nec non ab inferis resurrectionis, sed et in cœlos gloriosae ascensionis, offerimus præclaræ majestati tuæ de tuis donis ac datis hostiam puram, hostiam sanctam, hostiam immaculatam, Panem sanctum vitae aeternae, et Calicem salutis perpetuae. — Supra quae propitio ac sereno vultu respicere digneris et accepta habere, sicuti accepta habere dignatus es munera pueri tui justî Abel, et Sacrificium Patriarchae nostri Abrahæ, et quod tibi obtulit summus sacerdos tuus Melchisedech, sanctum sacrificium, immaculatam hostiam. — Supplices te rogamus, omnipotens Deus: jube hæc perferri per manus sancti Angeli tui in sublime altare tuum, in conspectu divinæ majestatis tuæ: ut quotquot ex hac altaris participatione sacrosanctum Filii tui Corpus et Sanguinem sumserimus, omni benedictione cœlesti et gratia repleamur. Per eundem Christum Dominum nostrum.

Commemoratio pro Defunctis.

Memento etiam, Domine, famulorum famularumque tuarum N. et N., qui nos præcesserunt cum signo fidei et dormiunt in somno pacis.

Ipsis Domine, et omnibus in Christo quiescentibus, locum refrigerii, lucis et pacis ut indulgeas, deprecamur. Per eundem Christum Dominum nostrum. Amen.

Nobis quoque peccatoribus, famulis tuis de multitudine miserationum tuarum sperantibus, partem aliquam et societatem donare digneris cum tuis sanctis Apostolis et Martyribus: cum Joanne, Stephano, Matthia, Barnaba, Ignatio, Alexandro, Marcellino, Petro, Felicitate, Perpetua, Agatha, Lucia, Agnete, Caecilia, Anastasia, et omnibus Sanctis tuis: intra quorum nos consortium, non aestimator meriti, sed veniae quaesumus largitor admitte. Per Christum Dominum nostrum. —

Per quem haec omnia, Domine, semper bona creas, sanctificas, vivificas, benedicis et praestas nobis. Per ipsum, et cum ipso, et in ipso est tibi Deo Patri omnipotenti in unitate Spiritus sancti omnis honor et gloria: Per omnia saecula saeculorum. M. Amen.

Pater Noster.

Oremus. Praeceptis salutaribus moniti, et divina institutione formati audemus dicere:

Pater noster, qui es in coelis; sanctificetur nomen tuum: **adveniat regnum tuum: fiat volun-**

tas tua sicut in cœlo et in terra. Panem nostrum quotidianum da nobis hodie: et dimitte nobis debita nostra, sicut et nos dimittimus debitoribus nostris. Et ne nos inducas in tentationem. M. Sed libera nos a malo. Amen. Libera nos, quaesumus, Domine ab omnibus malis praeteritis, praesentibus et futuris: et intercedente beata et gloriosa semper Virgine Dei Genitrice Maria cum beatis Apostolis tuis Petro et Paulo, atque Andrea, et omnibus Sanctis, da propitius pacem in diebus nostris: ut ope misericordiae tuae adjuti, et a peccato simus semper liberi, et ab omni perturbatione securi. Per eundem Dominum nostrum Jesum Christum Filium tuum, qui tecum vivit et regnat in unitate Spiritus sancti Deus:

Per omnia saecula saeculorum. Amen.

Pax Domini sit semper vobiscum. M. Et cum spiritu tuo.

Haec commixtio et consecratio Corporis et Sanguinis Domini nostri Jesu Christi fiat accipientibus nobis in vitam aeternam. Amen.

Agnus Dei, qui tollis peccata mundi, dona eis requiem.

Agnus Dei, qui tollis peccata mundi, dona eis requiem.

Agnus Dei, qui tollis peccata mundi, dona eis requiem sempiternam.

Domine Jesu Christe, qui dixisti Apostolis tuis: pacem relinquo vobis, pacem meam do vobis: ne respicias peccata mea, sed fidem Ecclesiae tuae, eamque secundum voluntatem tuam pacificare et coadunare digneris: Qui vivis et regnas Deus, per omnia saecula saeculorum. Amen.

Domine Jesu Christe Fili Dei vivi, qui ex voluntate Patris cooperante Spiritu sancto, per mortem tuam mundum vivificasti; libera me per hoc sacrosanctum Corpus et Sanguinem tuum ab omnibus iniquitatibus meis et universis malis: et fac me tuis semper inhaerere mandatis, et a te nunquam separari permittas: qui cum eodem Deo Patre et Spiritu sancto vivis et regnas in saecula saeculorum. Amen.

Perceptio Corporis tui, Domine Jesu Christe, quod ego indignus sumere praesumo, non mihi proveniat in iudicium et condemnationem, sed pro tua pietate prosit mihi ad tutamentum mentis et corporis, et ad medelam percipiendam: Qui vivis et regnas cum Deo Patre in unitate Spiritus sancti Deus, per omnia saecula saeculorum. Amen.

Panem cœlestem accipiam, et nomen Domini invocabo.

Domine non sum dignus, ut intres sub tectum meum: sed tantum dic verbo, et sanabitur anima mea.

Domine non sum dignus, ut intres sub tectum meum: sed tantum dic verbo, et sanabitur anima mea.

Domine non sum dignus, ut intres sub tectum meum: sed tantum dic verbo, et sanabitur anima mea.

Corpus Domini nostri Jesu Christi, custodiat animam meam in vitam aeternam. Amen.

Quid retribuam Domino pro omnibus, quae retribuit mihi? Calicem salutaris accipiam, et nomen Domini invocabo. Laudans invocabo Dominum, et ab inimicis meis salvus ero.

Sanguis Domini nostri Jesu Christi custodiat animam meam in vitam aeternam. Amen.

Quod ore sumsimus, pura mente capiamus: et de munere temporali fiat nobis remedium sempiternum.

Corpus tuum Domine, quod sumsi, et sanguis quem potavi, adhaereat visceribus meis: et praesta, ut in me non remaneat scelerum macula, quem pura et sancta refecerunt Sacramenta: Qui vivis et regnas in saecula saeculorum.

Communio.

Lux aeterna luceat eis Domine; Cum Sanctis tuis in aeternum, quia pius es.

V. Requiem aeternam dona eis Domine: et lux perpetua luceat eis. Cum Sanctis tuis in aeternum, quia pius es.

Postcommunio.

Pro defunctis Fratribus, Propinquis et Benefactoribus.

Praesta, quaesumus, omnipotens et misericors Deus: ut animae fratrum propinquorum et benefactorum nostrorum, pro quibus hoc Sacrificium laudis tuae obtulimus Majestati, per hujus virtutem Sacramenti a peccatis omnibus expiatae, lucis perpetuae, te miserante, recipiant beatitudinem.

Pro omnibus fidelibus Defunctis.

Animabus, quaesumus Domine, famulorum famularumque tuarum oratio proficiat supplicantium: ut eas et a peccatis omnibus exuas, et tuae redemptionis facias esse participes.

Qui vivis. —

Orationes Diversæ pro Defunctis.

I. In die obitus seu depositionis Defuncti.

Deus, cui proprium est misereri semper et parcere, te supplices exoramus pro anima famuli tui N., quam hodie de hoc sæculo migrare jussisti: ut non tradas eam in manus inimici, neque obliviscaris in finem, sed jubeas eam a sanctis Angelis suscipi, et ad patriam paradisi perducī; ut quia in te speravit et credidit, non pœnas inferni sustineat, sed gaudia æterna possideat. Per Christum Dominum nostrum.

II. In die tertio, septimo, et trigesimo depositionis Defuncti.

Quæsumus Domine, ut animæ famuli tui N., cujus depositionis diem tertium (septimum, trigesimum) commemoramus, Sanctorum atque Electorum tuorum largiri digneris consortium: et rorem misericordiæ tuæ perennem infundas.

III. In Anniversario Defunctorum.

Deus indulgentiarum Domine: da animabus famulorum famularumque tuarum, quorum anniversarium depositionis diem commemoramus, refrigerii sedem, quietis beatitudinem, et luminis claritatem.

IV. Pro def. summo Pontifice.

Deus, qui inter summos Sacerdotes famulum tuum N. ineffabili tua dispositione connumerari voluisti: præsta, quæsumus, ut, qui unigeniti Filii tui

vices in terris gerebat, sanctorum tuorum Pontificum consortio perpetuo aggregetur.

V. Pro def. Episcopo vel Sacerdote.

Deus, qui inter Apostolicos Sacerdotes famulum tuum N. Pontificali (Sacerdotali) fecisti dignitate vigere: præsta, quæsumus, ut eorum quoque perpetuo aggregetur consortio.

VI. Pro uno defuncto.

Inclina, Domine, aurem tuam ad preces nostras, quibus misericordiam tuam supplices deprecamur: ut animam famuli tui N., quam de hoc sæculo migrare jussisti, in pacis ac lucis regione constituas, et Sanctorum tuorum jubeas esse consortem.

VII. Pro una defuncta.

Quæsumus, Domine, pro tua pietate miserere animæ famulæ tuæ N., et a contagiis mortalitatis exutam, in æternæ salvationis partem restitue.

VIII. Pro def. patre et matre.

Deus, qui nos patrem et matrem honorare præcepisti: miserere clementer animabus patris et matris meæ, eorumque peccata dimitte; meque eos in æternæ claritatis gaudio fac videre.

IX. Pro pluribus Defunctis.

Animabus, quæsumus Domine, famulorum famularumque tuarum misericordiam concede perpetuam: ut iis proficiat in æternum, quod in te speraverunt et crediderunt.

X. In depositione parvuli defuncti.

Omnipotens sempiterne Deus, sanctæ puritatis amator, qui animam hujus parvuli ad cœlorum regnum hodie misericorditer vocare dignatus es: digneris etiam, Domine, ita nobiscum misericorditer agere, ut meritis tuæ sanctissimæ passionis, et intercessione beatæ Mariæ semper Virginis et omnium Sanctorum tuorum, in eodem regno nos cum omnibus Sanctis et Electis tuis semper facias congaudere.

XI. Pro his, qui in cœmeterio requiescunt.

Deus, cujus miseratione animæ fidelium requiescunt: famulis et famulabus tuis et omnibus hic et ubique in Christo quiescentibus, da propitius veniam peccatorum; ut a cunctis reatibus absoluti, tecum sine fine lætentur.

XII. Pro absolutione Defuncti.

- R.** Libera me, Domine, de morte æterna in die illa tremenda: Quando cœli movendi sunt et terra; Dum veneris judicare sæculum per ignem.
- V.** Tremens factus sum ego, et timeo, dum discussio venerit atque ventura ira: Quando cœli movendi sunt et terra: Dum veneris judicare sæculum per ignem.
- V.** Dies illa dies iræ, calamitatis et miseræ, dies magna et amara valde: Dum veneris judicare sæculum per ignem.
- V.** Requiem æternam dona eis, Domine, et lux perpetua luceat eis. Libera me, Domine, de morte æterna in die illa tremenda: Quando cœli movendi sunt et terra: Dum veneris judicare sæculum per ignem.

Kyrie eleison. Christe eleison. Kyrie eleison.
Pater noster.

- V.** Et ne nos inducas in tentationem. **R.** Sed libera nos a malo.
- V.** A porta inferi. **R.** Erue Domine animam ejus.
- V.** Requiescat in pace. **R.** Amen.
- V.** Domine exaudi orationem meam. **R.** Et clamor meus ad te veniat.

Oremus.

Absolve, quæsumus Domine, animam famuli tui N., ut defunctus sæculo tibi vivat: et peccata, quæ per fragilitatem carnis humana conversatione commisit, tu venia misericordissimæ pietatis absterge. Per Christum Dominum nostrum. **R.** Amen.

- V.** Requiem æternam dona ei, Domine. **R.** Et lux perpetua luceat ei.
- V.** Requiescat in pace. **R.** Amen.

Ad Vesperas.

Pater noster. Ave Maria. *Secreto.*

- V.** Deus in adjutorium meum intende.
- R.** Domine ad adjuvandum me festina. Gloria Patri. Sicut erat. Alleluja. (A Dominica in Septuagesima usque ad Feriam quintam in Cæna Domini pro Alleluja dicitur: Laus tibi Domine, Rex æternæ gloriæ!)

Antiph. Gloria tibi Trinitas æqualis, una Deitas et ante omnia sæcula et nunc, et in perpetuum.

Psalmus CIX.

Dixit Dominus Domino meo: sede dextris meis.

Donec ponam inimicos tuos: scabellum pedum tuorum.

Virgam virtutis tuæ emittet Dominus ex Sion: Dominare in medio inimicorum tuorum.

Tecum principium in die virtutis tuæ in splendoribus sanctorum: ex utero ante luciferum genui te.

Juravit Dominus; et non pœnitebit eum: Tu es sacerdos in æternum secundum ordinem Melchisedech.

Dominus a dextris tuis: confregit in die iræ suæ reges.

Judicabit in nationibus, implebit ruinas: conquassabit capita in terra multorum.

De torrente in via bibet: propterea exaltabit caput.

Gloria Patri. Sicut erat.

Ant. rep. Gloria tibi Trinitas æqualis, una Deitas, et ante omnia sæcula, et nunc, et in perpetuum.

Antiph. Laus et perennis Gloria Deo Patri et Filio, sancto simul Paraclito in sæculorum sæcula.

Psalmus CX.

Confitebor tibi Domine, in toto corde meo: in consilio justorum et congregatione.

Magna opera Domini: exquisita in omnes voluntates ejus.

Confessio et magnificentia opus ejus: et justitia ejus manet in sæculum sæculi.

Memoriam fecit mirabilium suorum misericors et miserator Dominus: escam dedit timentibus se.

Memor erit in sæculum testamenti sui: virtutem operum suorum annuntiabit populo suo.

Ut det illis hæreditatem gentium: opera manuum ejus veritas et judicium.

Fidelia omnia mandata ejus, confirmata in sæculum sæculi: facta in veritate et æquitate.

Redemptionem misit populo suo: mandavit in æternum testamentum suum.

Sanctum et terribile nomen ejus: initium sapientiæ timor Domini.

Intellectus bonus omnibus facientibus eum: laudatio ejus manet in sæculum sæculi.

Gloria Patri. Sicut erat.

Ant. rep. Laus et perennis gloria Deo Patri et Filio, sancto simul Paraclito in sæculorum sæcula.

Antiph. Gloria laudis resonet in ore omnium Patri genitæque Proli, Spiritui sancto pariter resultet laude perenni.

Psalmus CXI.

Beatus vir, qui timet Dominum: in mandatis ejus volet nimis.

Potens in terra erit semen ejus: Generatio rectorum benedicetur.

Gloria et divitiæ in domo ejus: et justitiæ ejus manet in sæculum sæculi.

Exortum est in tenebris lumen rectis: misericors et miserator et justus.

Jucundus homo qui miseretur et commodat, disponet sermones suos in judicio: quia in æternum non commovebitur.

In memoria æterna erit justus: ab auditione mala non timebit.

Paratum cor ejus sperare in Domino, confirmatum est cor ejus: non commovebitur, donec despiciat inimicos suos.

Dispersit, dedit pauperibus, justitia ejus manet in sæculum sæculi: cornu ejus exaltabitur in gloria.

Peccator videbit et irascetur, dentibus suis fremet et tabescet: desiderium peccatorum peribit.

Gloria Patri. Sicut erat.

Ant. rep. Gloria laudis resonet in ore omnium Patri genitæque Proli, Spiritui sancto pariter resultet laude perenni.

Antiph. Laus Deo Patri parilique Proli et tibi sancte studio perenni Spiritus nostro resonet ab ore omne per ævum.

Psalmus CXII.

Laudate pueri Dominum: laudate nomen Domini.

Sit nomen Domini benedictum: ex hoc, nunc et usque in sæculum.

A solis ortu usque ad occasum: laudabile nomen Domini.

Excelsus super omnes gentes Dominus: et super cælos gloria ejus.

Quis sicut Dominus Deus noster, qui in altis habitat: et humilia respicit in cælo et in terra.

Suscitans a terra inopem: et de stercore erigens pauperem.

Ut collocet eum cum principibus: cum principibus populi sui.

Qui habitare facit sterilem in domo: matrem filiorum lætantem.

Gloria Patri. Sicut erat.

Ant. rep. Laus Deo Patri parilique Proli et tibi
sancte studio perenni Spiritus nostro resonet ab
ore omne per ævum.

Antiph. Ex quo omnia, per quem omnia, in quo
omnia: ipsi gloria in sæcula.

Psalmus CXIII.

In exitu Israel de Aegypto: domus Jacob de populo
barbaro.

Facta est Judæa sanctificatio eos: Israel potestas ejus.
Mare vidit et fugit: Jordanis conversus est retrorsum.
Montes exultaverunt ut arietes: et colles sicut agni
ovium.

Quid est tibi mare, quod fugisti: et tu Jordanis, quia
conversus es retrorsum?

Montes exultastis sicut arietes: et colles sicut agni
ovium.

A facie Domini mota est terra: a facie Dei Jacob.

Qui convertit petram in stagna aquarum: et rupem
in fontes aquarum.

Non nobis Domine, non nobis: sed nomini tuo da
gloriam.

Super misericordia tua et veritate tua: ne quando
dicant gentes: Ubi est Deus eorum?

Deus autem noster in cælo: omnia, quæcunque voluit,
fecit.

Simulacra gentium argentum et aurum: opera ma-
nuum hominum.

Os habent et non loquentur: oculos habent, et non
videbunt.

Aures habent, et non audient: nares habent, et non
odorabunt.

Manus habent, et non palpabunt; pedes habent, et non ambulabunt, non clamabunt in gutture suo.

Similes illis fiant, qui faciunt ea: et omnes, qui confidunt in eis.

Domus Israel speravit in Domino: adjutor eorum et protector eorum est.

Domus Aaron speravit in Domino: adjutor eorum et protector eorum est.

Dominus memor fuit nostri: et benedixit nobis.

Benedixit domui Israel: benedixit domui Aaron.

Benedixit omnibus, qui timent Dominum: pusillis cum majoribus.

Adjiciat Dominus super vos: super vos et super Filios vestros.

Benedicti vos a Domino: qui fecit cælum et terram.

Cælum cæli Domino: terram autem dedit filiis hominum.

Non mortui laudabunt te Domine: neque omnes qui descendunt in infernum.

Sed nos qui vivimus, benedicimus Domino: ex hoc, nunc, et usque in sæculum.

Gloria Patri. Sicut erat.

Ant. rep. Ex quo omnia, per quem omnia, in quo omnia: ipsi gloria in sæcula.

Capitulum.

O altitudo divitiarum sapientiæ et scientiæ Dei: quam incomprehensibilia sunt judicia ejus, et investigabiles viae ejus!

R. Deo gratias.

Hymnus.

Jam sol recedit igneus:
 Tu lux perennis Unitas,
 Nostris, beata Trinitas,
 Infunde lumen cordibus.

Te mane laudum carmine,
 Te deprecamur vespere:
 Digneris, ut Te supplices
 Laudemus inter Cœlites.

Patri simulque Filio,
 Tibique sancte Spiritus,
 Sicut fuit, sit jugiter
 Sæclum, per omne gloria. Amen.

V. Benedictus es Domine, in firmamento cœli.

R. Et laudabilis et gloriosus in sæcula.

Antiph. Te Deum Patrem ingenitum, te Filium unigenitum, te Spiritum sanctum Paraclitum, sanctam et individuum Trinitatem, toto corde et ore confitemur, laudamus atque benedicimus: tibi gloria in sæcula.

Canticum B. V. Mariæ.

Magnificat: anima mea Dominum.

Et exultavit spiritus meus: in Deo salutari meo.

Quia respexit humilitatem ancillæ suæ: ecce enim ex hoc beatam me dicent omnes generationes.

Quia fecit mihi magna qui potens est: et sanctum nomen ejus.

Et misericordia ejus a progenie in progenies: timen-
 tibus eum.

Fecit potentiam in brachio suo: dispersit superbos
 mente cordis sui.

Deposuit potentes de sede: et exaltavit humiles.
Esurientes implevit bonis: et divites dimisit inanes.
Suscepit Israel puerum suum: recordatus misericordiae suae.

Sicut locutus est ad Patres nostros: Abraham et semini ejus in sæcula.

Gloria Patri. Sicut erat.

Ant. rep. Te Deum Patrem ingenitum, te Filium unigenitum, te Spiritum sanctum Paraclitum, sanctam et individuum Trinitatem, toto corde et ore confitemur, laudamus atque benedicimus: tibi gloria in sæcula.

V. Domine exaudi orationem meam.

R. Et clamor meus ad te veniat.

Oremus.

Omnipotens sempiterne Deus, qui dedisti famulis tuis in confessione veræ fidei æternæ Trinitatis Gloriam agnoscere, et in potentia majestatis adorare Unitatem: quæsumus ut ejusdem fidei firmitate ab omnibus semper muniamur adversis. Per Dominum nostrum Jesum Christum Filium tuum, qui tecum vivit et regnat in unitate Spiritus sancti Deus per omnia sæcula sæculorum. Amen.

V. Domine exaudi orationem meam.

R. Et clamor meus ad te veniat.

V. Benedicamus Domino.

R. Deo gratias.

V. Fidelium animæ per misericordiam Dei requiescant in pace. **R.** Amen. Pater noster.

V. Dominus det nobis suam pacem.

R. Et vitam æternam. Amen.

EXERCITIUM CONFESSIONIS.

Oratio ante Confessionem.

Ad Te, piissime Jesu, refugium meum et consolatio mea, ad Te moerens et tristis venio, recogitans Tibi annos meos et delicta mea in amaritudine animae meae. Ad Te verba doloris effundo, misericordiam Tuam implorans, ut facias opus tuum, quod est misereri et parcere, tollens peccata mea, quae sunt maxima miseria mea. Vermis terrae retribuī Tibi mala pro Bonis; et heu, quot mala et quam gravia peccata pro tantis et tam eximiis Bonis! Et tamen loqueris ad me, ut revertar ad Te, et suscipias me; quia misericordia Tua super omnia opera Tua, et major est bonitas tua, quam iniquitas mea. Surgo igitur et venio ad Te corde contrito et humiliato; venio, ut laver, o Fons aeternae vitae, ad quem sitio, sicut cervus ad fontes aquarum; — venio, ut illuminer, o Lux mea, et diligam Te, et confitear adversum me injustitiam meam.

Emitte Lucem tuam et Veritatem tuam, et illumina mentem meam, ut omnia mala mea, quae commisi et bona, quae omisi, distincte co-

gnoscam et integre confitear, nec me permittas computrescere in sordibus meis, Tu qui omnium misereris, et nihil odisti eorum, quae fecisti. Fac me assueta mala relinquere, et Tibi placitis operibus occupari, ut, ubi abundavit delictum, tua gratia superabundet; et sicut fuit sensus meus, ut errarem a Te, decies tantum iterum conversus requiram Te.

Domine, dic animae meae: Salus tua Ego sum! Qui dixisti: Nolo mortem peccatoris, sed magis, ut convertatur et vivat. Converte me, Domine, ad Te, et noli irasci contra me. Deprecor Te, clementissime Deus, propter misericordiam tuam supplico et exoro, ut perducas me ad bonum finem, et ad veram poenitentiam, puram Confessionem, et dignam Satisfactionem omnium peccatorum meorum. Amen.

Invocatio Spiritus Sancti.

Domine Deus, qui illuminas omnem hominem venientem in hunc mundum; illumina, quaeso, splendore gratiae cor meum, ut sufficienter cognoscam defectus et peccata mea, eaque cum vero cordis dolore ac contritione confitear, sicut oportet, coram Te et Sacerdote ministro tuo, ac plene pro iisdem satisfaciam, eademque emendem ad laudem et gloriam tuam et salutem Animae meae. Amen.

Scrutatio Conscientiae.

Priusquam Confessionem accedas, pro Confessione te diligenter praeparabis, reflectendo animum accurate, in quibus contra Dominum Deum tuum, contra Te, et proximum tuum peccaveris: cogitatione, verbo, opere et omissione. Ante hanc praeparationem ora pro more: Pater noster. Ave Maria.

Actus contritionis et Propositi.

O Jesu infinite amabilis! Doleo propter Te, quod toties nunc et tota vita offenderim Te; a peccatis meis in Sanguine tuo lava me.

Doleo, benignissime Jesu, de omnibus et singulis peccatis meis, eaque detestor super omnia mala, non solum arido et imperfecto corde meo, sed corde etiam et affectu omnium vere poenitentium, ex gratuito Tui amore, quia Deus es infinito amore dignissimus; firmiterque propono, quaelibet potius subire mala, quam iterum peccato consentire. Exactissime item confiteri peccata volo, Tibique et proximo integre satisfacere, atque omnes peccandi occasiones deinceps evitare. Quidquid vero mihi deest, suppleat Mors tua, Sanguis tuus et superabundantia merita tua, quibus fretus veniam obtinere spero, et gratiam, mores meos corrigendi, et in bono usque ad finem perseverandi. Et nunc, Domine, qui dedisti mihi cognoscere flagitia mea, perfice contritiouem meam, et perduc ad finem satisfactionem meam.

Ure me igne amoris Tui, et separa a me, quidquid displiceat Majestati Tuae. Purifica omne, quod Tibi pleacet in me, ut in Te vivam, non in me, et in Te moriar et propter Te, Salvator meus, Gratiam tuam uberem largiturus, qua vitam sancte instituere, Tibique perfecte usque in finem servire valeam. Qui cum Patre sanctoque Spiritu vivis et regnas Deus in saecula Benedictus. Amen.

Actualis Confessio.

Ecce Domine, ego vilis peccator, pauper, malus et indignus, venio ad Te superfluentem Abyssum pietatis, ut laver ab omni macula, et munder ab omni peccato. Amen.

In nomine Patris et Filii et Spiritus Sancti. Amen.

Confiteor Deo omnipotenti, Beatae Mariae semper Virgini, Beato Michaeli Archangelo, Beato Joanni Baptistae, Sanctis Apostolis Petro et Paulo, omnibus Sanctis et Reverentiae vestrae: quia peccavi nimis cogitatione, verbo et opere, mea culpa, mea culpa, mea maxima culpa.

Confessus sum ante (hic tempus assigna), nihil in ultima Confessione confiteri omisi, pœnitentiam injunctam absolvi. (Vel dicas) Oblitus sum proxime confiteri, quod etc.

A proxima confessione offendi Deum optimum Maximum sequentibus peccatis etc.

De his et omnibus totius Vitæ meæ peccatis, amore Dei doleo, idque maxime, quia divinæ displicent Majestati, emendationem promitto, peto pœnitentiam et Absolutionem salutare.

(Sub Absolutione dicas) O amabilissime Jesu! Diligo Te super omnia toto corde, ob infinitam Bonitatem, omnesque divinas perfectiones tuas, et si possem, omnium Angelorum et Sanctorum amore Te diligerem; nam omni possibili amore es Dignissimus! Et quia sic Te diligo, pœnitet me, et toto mentis affectu doleo, quod ego vilissima creatura tua, contra Te, optimum Deum meum, cui omne peccatum summe displicet, unquam peccaverim. Heu! pœnitet me iterum atque iterum, et millies, pœnitebitque per totam vitam meam. Amen.

Post Confessionem.

Psalmus CII.

Benedic anima mea Domino; et omnia, quae intra me sunt, nomini sancto ejus.

Benedic anima mea Domino: et noli oblivisci omnes retributiones ejus.

Qui propitiatur omnibus iniquitatibus tuis: qui sanat omnes infirmitates tuas:

Qui redimit de interitu vitam tuam: qui coronat te in misericordia et miserationibus.

Qui replet in bonis desiderium tuum: renovabitur ut aquilae juvenus tua.

Faciens misericordias Dominus, et iudicium omnibus injuriam patientibus.

Notas fecit vias suas Moysi: filiis Israel voluntates suas.

Miserator et misericors Dominus: longanimis et multum misericors.

Non in perpetuum irascetur: neque in aeternum comminabitur.

Non secundum peccata nostra fecit nobis: neque secundum iniquitates nostras retribuit nobis.

Quoniam secundum altitudinem cœli a terra: corroboravit misericordiam suam super timentes se.

Quantum distat Ortus ab Occidente: longe fecit a nobis iniquitates nostras.

Quomodo miseretur pater filiorum, misertus est Dominus timentibus se: quoniam ipse cognovit figmentum nostrum.

Recordatus est, quoniam pulvis sumus: homo sicut fœnum dies ejus, tanquam flos agri sic efflorescit.

Quoniam Spiritus pertransibit in illo, et non subsistet: et non cognoscet amplius locum suum.

Misericordia autem Domini ab aeterno, et usque in aeternum super timentes eum.

Et justitia illius in filios filiorum, his qui servant testamentum ejus: et memores sunt mandatorum ejus ad faciendum ea.

**Dominus in cœlo paravit sedem suam: et regnum
ipsius omnibus dominabitur.**

**Benedicite Domino omnes Angeli ejus, potentes
virtute facientes verbum illius, ad audiendam
vocem sermonum ejus.**

**Benedicite Domino omnes virtutes ejus: ministri
ejus, qui facitis voluntatem ejus.**

**Benedicite Domino omnia opera ejus in omni
loco dominationis ejus: benedic anima mea
Domino.**

Gloria Patri et Filio: et Spiritui sancto.

**Sicut erat in principio, et nunc et semper:
et in saecula saeculorum. Amen.**

Oratio post Confessionem.

**Benignissime Jesu, per cordis Tui contri-
tiones et Tuae Passionis meritum supplere dig-
neris omnem defectum contritionis meae et con-
fessionis, et concede, ut diligentius solito peccata
omnia et eorum occasiones fugiam. Quod, in
Tua gratia confidens, firmiter propono, eligens
potius quodlibet malum aut damnum subire et
perpeti, quam scienter et ex proposito Te offen-
dere, voluntatemque Tuam vel in minimo trans-
gredi. Adjuva me, Domine Deus meus, quia sine
Te nihil possum. Qui vivis et regnas cum Deo
Patre in unitate Spiritus sancti Deus, per omnia
saecula saeculorum. Amen.**

Altera Oratio.

O amabilissime Jesu! Dic mihi, quod dixisti Paralytico: „Ecce sanus factus es, jam noli amplius peccare.“ Dic mihi, obsecro, quod dixisti olim Leproso: „Volo, mundare!“ Ita propono, ita profiteor, et protestor coram divina Tua Majestate, coram B. Virgine Maria, et cuncta coelesti curia: nolo amplius peccare; in aeternum non peccabo, cum Tua gratia! Volo, Domine deinceps, ut Christianum, et Filium tam amabilis Patris decet, bene et pie vivere, ut possim aliquando bene mori; quia talis esse solet mors, qualis fuerit vita. Volo deinceps servare mandata et praecepta omnia, et malo millies mori, quam ullum sponte, et deliberate transgredi.

Respice in me et miserere mei, Domine patiens et misericors, loquere ad petram cordis mei et percutite eam virga virtutis Tuae, ut fluant aquae compunctionis, aquae salutare, quibus sanabitur et dealbabitur anima mea. Confirma hoc, quod operatus es in me, Tibique grata et accepta sit confessio mea, atque omnem ejus defectum suppleat pietas Tua. Misericordiam Tuam imploro, ne patiaris diutius me vagari post vanitatem vitae hujus; transeunt enim dies et dies, anni et anni, et ecce nihil proficio. Convertere ergo et de-

precabilis esto super me indignissimum servum Tuum, et noli sic attendere malum meum, ut obliviscaris bonum Tuum; nam si ego commisi, unde me damnare potes, Tu non amisisti, unde me salves et recipias in gratiam Tuam, Deus meus, adjutor meus. Qui vivis et regnas in saecula saeculorum. Amen.

Gratiarum actio post Confessionem.

Gratias ago Tibi, Domine Pater et Dux vitae meae, quia non secundum peccata mea fecisti mihi, sed superexaltasti misericordiam iudicio, et projecisti in profundum maris misericordiae Tuae omnia delicta mea. Atque utinam possem tantam in me contritionem excitare, quantam haberunt pro peccatis suis sanctus Petrus Apostolorum princeps, Propheta et Rex David, vir secundum cor Tuum, — sancta Magdalena peccatrix et poenitens; — quam libenter totus in lacrymas defluerem, donec lavarentur iniquitates meae, et ostenderes mihi placatum vultum Tuum! Sed facta est anima mea sicut terra sine aqua Tibi, et aruit sicut testa virtus mea; cumque omni virtute destitutus sim, hoc solum habeo residui, ut oculos meos extollam ad Redemptorem meum Ejusque lacrymas offeram Tibi, quas

Ille pro me uberrime effudit, ut iis placatus aperias mihi januas misericordiae Tuae, et suscipias me servum fugitivum venientem ad Te et ab inimicis fugientem.

Sit Tibi, Domine, obsecro, cum meritis B. Mariae Virginis, et omnium Sanctorum, grata et accepta confessio, et quidquid mihi defuit, nunc et alias, de puritate et integritate Confessionis ac Contritionis, suppleat pietas et misericordia Tua, et secundum illam digneris me habere plenius et perfectius absolutum in coelis. Qui vivis et regnas, Deus in saecula saeculorum. Amen.

Deo gratias!

Septem Psalmi poenitentiales.

Antiphona. Ne reminiscaris.

Psalmus VI.

Domine, ne in furore tuo arguas me: neque in ira tua corripas me.

Miserere mei Domine, quoniam infirmus sum: sana me Domine, quoniam conturbata sunt ossa mea.

Et anima mea turbata est valde: sed tu Domine usquequo?

Convertere Domine, et eripe animam meam: salvum me fac propter misericordiam tuam.

7*

Quoniam non est in morte, qui memor sit tui: in inferno autem quis confitebitur tibi?

Laboravi in gemitu meo, lavabo per singulas noctes lectum meum: lacrymis meis stratum meum rigabo.

Turbatus est a furore oculus meus: inveteravi inter omnes inimicos meos.

Discedite a me omnes, qui operamini iniquitatem: quoniam exaudivit Dominus vocem fletus mei.

Exaudivit Dominus deprecationem meam: Dominus orationem meam suscepit.

Erubescant et conturbentur vehementer omnes inimici mei: convertantur et erubescant valde velociter.

Gloria Patri. Sicut erat.

Psalmus XXXI.

Beati, quorum remissae sunt iniquitates: et quorum tecta sunt peccata.

Beatus vir, cui non imputavit Dominus peccatum: nec est in spiritu ejus dolus.

Quoniam tacui inveteraverunt ossa mea: dum clamarē tota die.

Quoniam die ac nocte gravata est super me manus tua: conversus sum in ærumna mea, dum configitur spina.

Delictum meum cognitum tibi feci: et injustitiam meam non abscondi.

Dixi: Confitebor adversum me injustitiam meam Domino: et tu remisisti impietatem peccati mei.

Pro hac orabit ad te omnis sanctus: in tempore opportuno.

Verumtamen in diluvio aquarum multarum: ad eum non approximabunt.

Tu es refugium meum a tribulatione, quæ circumdedit me: exultatio mea erue me a circumdantibus me. Intellectum tibi dabo et instruam te in via hac, qua gradieris: firmabo super te oculos meos.

Nolite fieri sicut equus et mulus: quibus non est intellectus.

In camo et fræno maxillas eorum constringe: qui non approximant ad te.

Multa flagella peccatoris: sperantem autem in Domino misericordia circumdabit.

Lætamini in Domino et exultate iusti: et gloriamini omnes recti corde.

Gloria Patri. Sicut erat.

Psalmus XXXVII.

Domine, ne in furore tuo arguas me: neque in ira tua corripias me.

Quoniam sagittæ tuæ infixæ sunt mihi: et confirmasti super me manum tuam.

Non est sanitas in carne mea a facie iræ tuæ: non est pax ossibus meis a facie peccatorum meorum.

Quoniam iniquitates meæ supergressæ sunt caput meum: et sicut onus grave gravatæ sunt super me.

Putruerunt et corruptæ sunt cicatrices meæ: a facie insipientiæ meæ.

Miser factus sum, et curvatus sum usque in finem: tota die contristatus ingrediebar.

Quoniam lumbi mei impleti sunt illusionibus: et non est sanitas in carne mea.

Afflictus sum et humiliatus sum nimis: rugiebam a gemitu cordis mei.

Domine, ante te omne desiderium meum: et gemitus meus a te non est absconditus.

Cor meum conturbatum est, dereliquit me virtus mea: et lumen oculorum meorum, et ipsum non est mecum.

Amici mei et proximi mei: adversum me appropinquaverunt et steterunt.

Et qui juxta me erant, de longe steterunt: et vim faciebant, qui quærebant animam meam.

Et qui inquirebant mala mihi, locuti sunt vanitates: et dolos tota die meditabantur.

Ego autem tanquam surdus non audiebam: et sicut mutus non aperiens os suum.

Et factus sum sicut homo non audiens: et non habens in ore suo redargutiones.

Quoniam in te, Domine, speravi: tu exaudies me, Domine Deus meus.

Quia dixi, nequando supergaudeant mihi inimici mei: et dum commoventur pedes mei, super me magna locuti sunt.

Quoniam ego in flagella paratus sum: et dolor meus in conspectu meo semper.

Quoniam iniquitatem meam annuntiabo: et cogitabo pro peccato meo.

Inimici autem mei vivunt, et confirmati sunt super me: et multiplicati sunt, qui oderunt me inique.

Qui retribuunt mala pro bonis, detrahebant mihi: quoniam sequebar bonitatem.

Ne derelinquas me Domine Deus meus: ne disceseris a me.

Intende in adjutorium meum: Domine Deus salutis meae. Gloria Patri. Sicut erat.

Psalmus L.

Miserere mei Deus: secundum magnam misericordiam tuam.

Et secundum multitudinem miserationum tuarum: dele iniquitatem meam.

Amplius lava me ab iniquitate mea: et a peccato meo munda me.

Quoniam iniquitatem meam ego cognosco: et peccatum meum contra me est semper.

Tibi soli peccavi, et malum coram te feci: ut justificeris in sermonibus tuis, et vincas cum judicaris.

Ecce enim in iniquitatibus conceptus sum: et in peccatis concepit me mater mea.

Ecce enim veritatem dilexisti: incerta et occulta sapientiæ tuæ manifestasti mihi.

Asperges me hyssopo, et mundabor: lavabis me et super nivem dealbabor.

Auditui meo dabis gaudium et lætitiā: et exultabunt ossa humiliata.

Averte faciem tuam a peccatis meis: et omnes iniquitates meas dele.

Cor mundum crea in me Deus: et spiritum rectum innova in visceribus meis.

Ne projicias me a facie tua: et Spiritum sanctum tuum ne auferas a me.

Redde mihi lætitiā salutaris tui: et spiritu principali confirma me

Docebo iniquos vias tuas: et impii ad te convertentur.

Libera me de sanguinibus Deus, Deus salutis meæ: et exultabit lingua mea justitiā tuam.

**Domine labia mea aperies : et os meum annuntiabit
laudem tuam.**

**Quoniam si voluisses sacrificium, dedissem utique :
holocaustis non delectaberis.**

**Sacrificium Deo spiritus contribulatus : cor contritum
et humiliatum Deus non despicias.**

**Benigne fac Domine in bona voluntate tua Sion : ut
ædificentur muri Jerusalem.**

**Tunc acceptabis sacrificium justitiæ, oblationes et
holocausta : tunc imponent super altare tuum vitulos.**

Gloria Patri. Sicut erat.

Psalmus CI.

**Domine exaudi orationem meam : et clamor meus ad
te veniat.**

**Non avertas faciem tuam a me : in quacunque die
tribulor, inclina ad me aurem tuam.**

In quacunque die invocavero te : velociter exaudi me.

**Quia defecerunt sicut fumus dies mei : et ossa mea
sicut cremium aruerunt.**

**Percussus sum ut fœnum, et aruit cor meum : quia
oblitus sum comedere panem meum.**

A voce gemitus mei : adhæsit os meum carni meæ.

**Similis factus sum pelicano solitudinis : factus sum
sicut nycticorax in domicilio.**

Vigilavi : et factus sum sicut passer solitarius in tecto.

**Tota die exprobrabant mihi inimici mei : et qui lau-
dabant me, adversum me jurabant.**

**Quia cinerem tanquam panem manducabam : et potum
meum cum flectu miscebam.**

**A facie iræ et indignationis tuæ : quia elevans alli-
sisti me.**

Dies mei sicut umbra declinaverunt: et ego sicut fœnum arui.

Tu autem Domine in æternum permanes: et memoriale tuum in generationem et generationem.

Tu exurgens misereberis Sion: quia tempus miserendi ejus, quia venit tempus.

Quoniam placuerunt servis tuis lapides ejus: et terræ ejus miserebuntur.

Et timebunt Gentes nomen tuum, Domine: et omnes reges terræ gloriam tuam.

Quia ædificavit Dominus Sion: et videbitur in gloria sua. Respexit in orationem humilium: et non sprexit precem eorum.

Scribantur hæc in generatione altera: et populus qui creabitur, laudabit Dominum.

Quia prospexit de excelso sancto suo: Dominus de coelo in terram aspexit.

Ut audiret gemitus compeditorum: ut solveret filios interemtorum.

Ut annuntient in Sion nomen Domini: et laudem ejus in Jerusalem.

In conveniendo populos in unum: et reges, ut serviant Domino.

Respondit ei in via virtutis suæ: Paucitatem dierum meorum nuntia mihi.

Ne revoces me in dimidio dierum meorum: in generationem et generationem anni tui.

Initio tu, Domine, terram fundasti; et opera manuum tuarum sunt coeli.

Ipsi peribunt, tu autem permanes: et omnes sicut vestimentum veterascent.

Et sicut opertorium mutabis eos, et mutabuntur: tu autem idem ipse es, et anni tui non deficient.

Filii servorum tuorum habitabunt: et semen eorum in sæculum dirigetur.

Gloria Patri. Sicut erat.

Psalmus CXXIX.

De profundis clamavi ad te, Domine: Domine, exaudi vocem meam.

Fiant aures tuæ intendentes: in vocem deprecationis meæ.

Si iniquitates observaveris, Domine: Domine, quis sustinebit?

Quia apud te propitiatio est: et propter legem tuam sustinui te, Domine.

Sustinuit anima mea in verbo ejus: speravit anima mea in Domino.

A custodia matutina usque ad noctem: speret Israel in Domino.

Quia apud Dominum misericordia: et copiosa apud eum redemptio.

Et ipse redimet Israel: ex omnibus iniquitatibus ejus.

Gloria Patri. Sicut erat.

Psalmus CXLII.

Domine, exaudi orationem meam; auribus percipe obsecrationem meam in veritate tua: exaudi me in tua justitia.

Et non intres in iudicium cum servo tuo: quia non justificabitur in conspectu tuo omnis vivens.

Quia persecutus est inimicus animam meam: humiliavit in terra vitam meam.

Collocavit me in obscuris, sicut mortuos seculi: et
anxiatus est super me spiritus meus, in me tur-
batum est cor meum.

Memor fui dierum antiquorum, meditatus sum in om-
nibus operibus tuis: in factis manuum tuarum
meditabar.

Expandi manus meas ad te: anima mea sicut terra
sine aqua tibi.

Velociter exaudi me, Domine: defecit spiritus meus.
Non avertas faciem tuam a me: et similis ero de-
scendentibus in lacum.

Audiam fac mihi mane misericordiam tuam: quia in
te speravi.

Notam fac mihi viam, in qua ambulem: quia ad te
levavi animam meam.

Eripe me de inimicis meis Domine, ad te confugi:
doce me facere voluntatem tuam, quia Deus meus
es tu.

Spiritus tuus bonus deducet me in terram rectam:
propter nomen tuum, Domine, vivificabis me in
æquitate tua.

Educes de tribulatione animam meam: et in misericordia
tua disperdes inimicos meos.

Et perdes omnes, qui tribulant animam meam: quo-
niam ego servus tuus sum.

Gloria Patri. Sicut erat.

Antiph. Ne reminiscaris, Domine, delicta nostra
vel parentum nostrorum: neque vindictam sumas de
peccatis nostris.

Litaniæ Majores.

Kyrie eleison. Christe eleison. Kyrie eleison.

Christe audi nos. Christe exaudi nos.

Pater de cœlis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Sancta Maria, Ora pro nobis.

Sancta Dei Genitrix, Ora pro nobis.

Sancta Virgo Virginum, Ora pro nobis.

Sancte Michael, Ora pro nobis.

Sancte Gabriel, Ora pro nobis.

Sancte Raphael, Ora pro nobis.

Omnes sancti Angeli et Archangeli, Orate pro nobis.

Omnes sancti beatorum Spirituum ordines, Orate
pro nobis.

Sancte Joannes Baptista, Ora pro nobis.

Sancte Joseph, Ora pro nobis.

Omnes sancti Patriarchæ et Prophetæ, Orate pro nobis.

Sancte Petre,

Sancte Paule,

Sancte Andrea,

Sancte Jacobe,

Sancte Joannes,

Sancte Thoma,

Sancte Jacobe,

Sancte Philippe,

Sancte Bartholomæe,

Sancte Matthæe,

Sancte Simon,

Sancte Thaddæe,

Sancte Matthia,

Sancte Barnaba,

Sancte Luca,

Sancte Marce,

Omnes sancti Apostoli et Evangelistæ, Orate pro nobis.

Omnes sancti Discipuli Domini, Orate pro nobis.

Ora pro nobis.

Omnes sancti Innocentes, Orate pro nobis.

Sancte Stephane, Ora pro nobis.

Sancte Laurenti, Ora pro nobis.

Sancte Vincenti, Ora pro nobis.

Sancti Fabiane et Sebastiane, Orate pro nobis.

Sancti Joannes et Paule, Orate pro nobis.

Sancti Cosma et Damiane, Orate pro nobis.

Sancti Gervasi et Protasi, Orate pro nobis.

Omnes sancti Martyres, Orate pro nobis.

Sancte Sylvester,

Sancte Gregori,

Sancte Ambrosi,

Sancte Augustine,

Sancte Hieronyme,

Sancte Martine,

Sancte Nicolae,

Ora pro nobis.

Omnes sancti Pontifices et Confessores, Orate pro nobis.

Omnes sancti Doctores, Orate pro nobis.

Sancte Antoni,

Sancte Benedicte,

Sancte Bernarde,

Sancte Dominice,

Sancte Francisce,

Ora pro nobis.

Omnes sancti Sacerdotes et Levitæ, Orate pro nobis.

Omnes sancti Monachi et Eremitæ, Orate pro nobis.

Sancta Maria Magdalena,

Sancta Agatha,

Sancta Lucia,

Sancta Agnes,

Sancta Cæcilia,

Sancta Catharina,

Sancta Anastasia,

Ora pro nobis.

Omnes sanctæ Virgines et Viduæ, Orate pro nobis.

Omnes Sancti et Sanctæ Dei, Intercedite pro nobis.

Propitius esto, Parce nobis Domine.

Propitius esto, Exaudi nos Domine.

Ab omni malo, Libera nos Domine.

Ab omni peccato, Libera nos Domine.

Ab ira tua, Libera nos Domine.

A subitanea et improvisa morte,
 Ab insidiis diaboli,
 Ab ira et odio et omni mala voluntate,
 A spiritu fornicationis,
 A fulgure et tempestate,
 A peste, fame et bello,
 A morte perpetua,
 Per Mysterium sanctæ Incarnationis tuæ,
 Per Adventum tuum,
 Per Nativitatem tuam,
 Per Baptismum et sanctum Jejunium tuum,
 Per Crucem et Passionem tuam,
 Per Mortem et Sepulturam tuam,
 Per sanctam Resurrectionem tuam,
 Per admirabilem Ascensionem tuam,
 Per adventum Spiritus sancti Paralicti,
 In die judicii,
 Peccatores, Te rogamus, audi nos.
 Ut nobis parcas,
 Ut nobis indulgeas,
 Ut ad veram pœnitentiam nos perducere digneris,
 Ut Ecclesiam tuam sanctam regere et conser-
 vare digneris,
 Ut Domnum Apostolicum et omnes Ecclesiasti-
 cos Ordines in sancta Religione conservare
 digneris,
 Ut inimicos sanctæ ecclesiæ humiliare digneris,
 Ut Regibus et Principibus Christianis pacem et
 veram concordiam donare digneris,
 Ut cuncto populo Christiano pacem et unitatem
 largiri digneris,
 Ut nosmetipsos in tuo sancto servitio confor-
 tare et conservare digneris,
 Ut mentes nostras ad cœlestia desideria erigas,
 Ut omnibus benefactoribus nostris sempiterna
 bona retribuas,
 Ut animas nostras, fratrum, propinquorum et
 benefactorum nostrorum ab æterna damna-
 tione eripias,

Libera nos, Domine.

Te rogamus audi nos.

Ut fructus terræ dare et conservare digneris, Te rogamus, audi nos.

Ut omnibus fidelibus defunctis requiem æternam donare digneris, Te rogamus, audi nos.

Ut nos exaudire digneris, Te rogamus, audi nos.

Fili Dei, Te rogamus, audi nos.

Agnus Dei, qui tollis peccata mundi, Parce nobis Domine.

Agnus Dei, qui tollis peccata mundi, Exaudi nos Domine.

Agnus Dei, qui tollis peccata mundi, Miserere nobis.

Christe audi nos. Christe exaudi nos.

Kyrie eleison. Christe eleison. Kyrie eleison.

Pater noster. *Secreto.*

V. Et ne nos inducas in tentationem.

R. Sed libera nos a malo.

EXERCITIUM COMMUNIONIS.

Ante Communionem.

Dominus meus et Deus meus! grande est opus, quod aggredior; non enim homini mortali, sed Tibi Regi cœlorum immortalis et invisibilis, habitationem præparo. Orna Ipse domum, quam ingredieris; purifica animam meam, rumpe vincula peccatorum meorum, ut digne Te recipere valeam. Domine Jesu, vere Deus et vere homo, firma fide credo ac confiteor, Te, qui olim

nascens Te in socium, moriensque dedisti in pretium, et nunc regnans Te das in praemium, vere et realiter esse praesentem in hoc Sacramento. Vere sumus genus electum, regale sacerdotium, gens sancta, populus acquisitionis. Nec est alia natio tam grandis, quae habeat Deos appropinquantes sibi, sicut Tu Deus noster ades nobis. Tu enim, Veritas aeterna, dixisti: „Caro mea vere est cibus, et Sanguis meus vere est potus. Qui manducaverit ex hoc pane, non morietur. Panis, quem Ego dabo, caro mea est pro mundi vita. „Hoc est enim corpus meum.“ Certior sum, Te verum Deum et verum Hominem, carnem et sanguinem Tuum, corpus Tuum et animam Tuam, divinitatem sanctamque humanitatem Tuam contineri et velari his speciebus, quam si Te propriis viderem oculis.

Adoro Te Creatorem, Redemptorem ac summum Bonum. Si pro hac fide mori me oporteret, mortem eligerem potius, quam fidem meam fallerem. Ideo renuncio omni, quod sensus mei aut ratio mea contrarium huic fidei suggerere possint. Fac me per gratiam Tuam semper illud de tanto mysterio credere et intelligere, sentire et firmiter tenere, dicere et cogitare, quod Tibi placet, et expedit animae meae.

Domine virtutum, beatus homo, qui sperat in Te. Spero in Te omnis Boni fonte et gratiae auctore, quem in hoc Sacramento praesentem habeo. Idcirco ad mensam dulcissimi convivii Tui ego peccator de propriis meritis nihil praesumens, sed de Tua confidens misericordia et bonitate accedo. Suavis enim es Tu, et multae sunt misericordiae Tuae omnibus invocantibus Te. Tu solus dare potes omnia, quia omnipotens; Tu dare vis omnia, quia infinite bonus es. Tu es spes, salus, lux et vita mea. In Te Domine confido: non confundas me ab expectatione mea. Tu parasti in conspectu meo mensam adversus eos, qui tribulant me, adversus mundum carnem et diabolum. Propter hoc laetatur cor meum. Spero enim, nihil non daturum Te mihi, qui dare Te Ipsum non recusas. Venio ad Te, Domine, quia bonitas Tua me invitat dicens: Venite ad Me omnes, qui laboratis et onerati estis, et Ego reficiam vos.

Domine Jesu Christe! quanta fuit Tui vis amoris, quae Te, quem terra, pontus, sidera colunt, adorant et praedicant, Te, qui trinam, coelestium, terrestrium et infernorum regis machinam, Te, qui fuisti apud Patrem ante constitutionem mundi; Te traxit e sinu Patris, ut

formam servi accipiens, et habitu inventus ut homo, venires in hunc mundum, perambulares terram benefaciendo omnibus, innumerasque miserias ac injurias propter salutem nostram ferres! Quantus amor! Damnare nos poteras, et salvare voluisti; nos rei eramus, et Tu innocens supplicium subiisti. Tulisti clavos, lanceam, multamque ignominiam, sudores et angores, atrocissimam denique mortem, ut nos Patri reconciliares, ad reos liberares.

Denique pridie, quam patereris, abiturus ex hoc mundo ad Patrem, in pignus amoris Sacramentum hoc instituisti, praecipiens Apostolis: Hoc facite in Meam commemorationem, ut modo prorsus novo et mirabili maneres nobiscum, et sic monstrares, delicias Tuas esse cum filiis hominum.

Quanto amore dignus es Domine, qui tot ac tanto fecisti amore erga nos! Diligam itaque Te Domine, fortitudo mea, firmamentum meum, refugium meum ac liberator meus. Cupio Te suscipere in hoc Sacramento, ut Tibi firmiter uniar vinculo amoris. Tu es enim caritas; et qui manet in caritate, in Te manet, et Tu manes in illo.

Oratio ante Communionem.

Omnipotens sempiterne Deus, ecce accedo ad Sacramentum unigeniti Filii Tui Domini nostri Jesu Christi; accedo tamquam infirmus ad medicum vitae, immundus ad Fontem Misericordiae, cæcus ad Lumen claritatis aeternae, pauper et egenus ad Dominum cœli et terrae. Rogo ergo immensae largitatis Tuae abundantiam, quatenus meam curare digneris infirmitatem, lavare fœditatem, illuminare cœcitatem, vestire nuditatem; ut Te, Panem Angelorum, Regem regum, Dominum dominantium, tanta suscipiam reverentia et humilitate, tanta contritione et devotione, tanta puritate et fide, tali proposito et intentione, sicut expedit saluti animae meae.

Da mihi, quaeso, Dominici corporis et sanguinis non solum suscipere Sacramentum, sed etiam rem et virtutem Sacramenti. O mitissime Deus, da mihi corpus Unigeniti Filii Tui Domini nostri Jesu Christi, quod traxit de Virgine Maria, sic suscipere, ut corpori Suo mystico merear incorporari, et inter Ejus membra connumerari. O amantissime Pater, concede mihi dilectum Filium Tuum, quem nunc velatum in via suscipere propono, revelata tandem facie perpetuo contemplari. Qui Tecum vivit et regnat etc.

Aspirationes ante Communionem.

Cum summa devotione, et ardenti amore, cum toto cordis affectu et fervore, desidero Te, Domine, suscipere, quemadmodum multi Sancti, et devotae personae in communicando Te desideraverunt, qui Tibi maxime in sanctitate vitae placuerunt, et in ardentissima devotione fuerunt. O Deus meus, amor aeternus, totum Bonum meum, felicitas interminabilis, cupio Te suscipere cum vehementissimo desiderio, et dignissima reverentia, quam aliquis sanctorum unquam habuit, et sentire potuit.

Domine Deus meus, creator meus et Redemptor meus, cum tali affectu, reverentia, laude et honore; cum tali gratitudine, dignitate et amore; cum tali fide, spe et puritate, Te affecto hodie suscipere, sicut Te suscepit, et desideravit Sanctissima mater Tua, gloriosa virgo Maria, quando Angelo, evangelizanti sibi Incarnationis mysterium, humiliter et devote respondit: „Ecce ancilla Domini, fiat mihi secundum verbum Tuum.“

Accipe vota mea, Domine Deus meus, et desideria infinitae laudationis ac immensae benedictionis, quae Tibi secundum multitudinem ineffabilis magnitudinis Tuae, jure debentur: haec Tibi reddo, et reddere desidero per singulos

dies, et momenta temporum, atque ad reddendum mecum Tibi gratias et laudes, omnes cœlestes Spiritus, et cunctos fideles Tuos, precibus et affectibus invito, et exoro. Amen.

Dies beata, qua Te, Jesu mi, fruar! Panis sancte, panis cor hominis confirmans, quem qui manducat, vivet in æternum, qui non manducat, vitam non habebit. Quam dilecta tabernacula Tua, Domine virtutum! Concupiscit et deficit anima mea in atria Tua. Refice esurientem animam meam, ut in fortitudine cibi illius ambulem per hunc mundum usque ad montem sanctum Tuum, donec in regno Tuo satier ab ubertate domus Tuæ.

Desiderio desiderasti manducare Pascha cum discipulis Tuis. Quemadmodum desiderat cervus ad fontes aquarum, ita desiderat et anima mea ad Te, Deus.

Veni, Domine, et noli tardare; sed veniat, obsecro, Tecum illa multum desiderabilis bonitas, mansuetudo et caritas Tua, per quam excusetur et juvetur miseria mea. Veni desiderate cunctis gentibus, veni ad docendum me viam prudentiæ, et salvandum me in manu forti et brachio extento. Sanctifica animam meam desiderantem Te, quaerentem Te, properantem ad Te. Veni, Domine

Jesu, et veniant super me universae benedictiones Tuae. Amen.

Domine non sum dignus, ut intres sub tectum meum, sed tantum dic verbo, et sanabitur anima mea. (ter repet.)

Corpus Domini nostri Jesu Christi custodiat animam meam in vitam aeternam. Amen.

Post Communionem.

Quod concupivi, jam video; quod speravi, jam teneo; quod desideravi, jam habeo; possideo Eum, qui potest et possidet omnia. Vivo ego, jam non ego; vivit vero in me Christus. O me felicem! quam potentem suscepi Dominum! quam dilectum induxi hospitem! quam fidelem acceptavi amicum! omnipotens, qui es ante saecula, Filius Dei, Redemptor meus, Judex meus, Deus meus requiescit in corde meo. Quam suavis est, Domine, spiritus Tuus, qui, ut dulcedinem Tuam in filios demonstrares, pane suavissimo de coelo praestito esurientes reple bonis!

Quid retribuam Tibi pro omnibus, quae retribuisti mihi? Vere, quos dilexisti, in finem dilexisti eos. Cum non essem, e nihilo eduxisti me; cum per peccatum inimicus Tuus essem, in gratiam recepisti me; cum viverem abjectus in

domo mea, de pulvere eduxisti me, et constituisti me cum principibus populi Tui, ut comederem panem in mensa Tua, in qua ineffabili prorsus amore carnem Tuam in cibum mihi dare dignatus es. Et ego Te non redamem, o Jesu amantissime? Utinam eo erga Te flagrarem amore, quo flagrarunt devoti, qui debita praeparatione ac fructu hoc Sacramentum unquam receperunt, quo flagrarunt omnes Sancti, quo Tu Ipse in nos flagrasti! Utinam ita unus essem Tecum, ut Tu cum Patre unus es! Utinam adhaererem Tibi, ut palmes adhaeret viti! Utinam neque vita, neque mors, neque instantia, neque futura, neque creatura ulla unquam me separarent a caritate Tua! Hoc volo, hoc desidero, hoc tota mente concupisco; hoc et maxima cum fiducia spero. Memini enim benedictionum, quibus cumulasti eos, qui Te aliquando susceperunt! Imple igitur et me, Domine, spiritu Tuo, et benedic domui, quam ingressus es. Concede mihi Spiritus Tui fervorem, amoris Tui suavitatem, fraternae dilectionis sinceritatem, in tentationibus fortitudinem, in adversis patientiam, in prosperis humilitatem, in ore veritatem, in opere stabilitatem, in moribus gravitatem. Gratia Tua mecum sit, mecum laboret, et mecum usque in finem perseveret.

Auge in me fidem, spem et caritatem, quae non resideat in lingua, sed quae se prodat servando mandata Tua. Sanctifica, conforta ac defende me. Sis dux meus in via, in dubio magister, solamen in angustiis, salus in agone. Custodi me, ne diligam mundum; — protege me contra eos, qui me seducere, et, quae impia sunt, student docere. Da mihi castitatem. Fac, ut quotidie in virtute proficiam, ut tranquilla et pura conscientia Tibi serviam, ut superioribus meis prompto animo obediam, ut semper voluntatem Tuam faciam. Perceptio corporis Tui non sit mihi reatus ad poenam, sed intercessio salutaris ad veniam; sit scelerum meorum ablutio; sit peccatorum meorum remissio; sit fragilitatis meae fortitudo; sit omnium virtutum augmentatio; sit in Te uno ac vero Deo firma adhaesio. Domine, salva animam meam, quam pretioso sanguine Tuo redemisti, ac toties hoc amoris pabulo refecisti. Hora denique mortis voca me, dimitte me in pace, ac jube me venire ad Te, ut Te, quem nunc speciebus velatum peregrinans video, facie ad faciem intuear in patria, et cum omnibus Sanctis Tuis laudem Te in saecula saeculorum. Amen.

Gratiarum actio post Communionem.

Gratias Tibi ago Domine sancte, Pater, omnipotens, aeternae Deus, qui me peccatorem, indignum famulum Tuum nullis meis meritis, sed sola dignatione misericordiae Tuae, satiare dignatus es pretioso corpore et sanguine Filii Tui Domini nostri Jesu Christi. Et precor, ut haec sancta communio non sit mihi reatus ad poenam, sed intercessio salutaris ad veniam. Sit mihi armatura fidei, et scutum bonae voluntatis. Sit viliorum meorum evacuatio, concupiscentiae et libidinis exterminatio, caritatis et patientiae, humilitatis et obedientiae, omniumque virtutum augmentatio; contra insidias inimicorum omnium tam visibilium, quam invisibilium, firma defensio; motuum meorum, Tam carnalium, quam spiritualium, perfecta quietatio; in Te uno ac vero Deo firma adhaesio; atque finis mei felix consummatio. Et precor Te, ut ad illud ineffabile convivium me peccatorem perducere digneris, ubi Tu cum Filio Tuo et Spiritu Sancto, Sanctis Tuis es lux vera, satietas plena, gaudium sempiternum, jucunditas consummata, et felicitas perfecta. Per eundem Christum Dominum nostrum. Amen.

PRECES

pro lucrandis indulgentiis.

Omnipotens sempiterne Deus, misericordia Tua a peccatis meis omnibus aeternaeque damnationis reatu me absolutum confido, quamvis temporalibus poenis obnoxius maneam. Cum vero his diluendis opera mea non sufficiant, ad inexhaustum meritorum Unigeniti Filii Tui Domini nostri Jesu Christi Sanctorumque thesaurum confugio, ut hujus abundantia tenuitati ac indigentiae meae subveniatur. Promptum me ad omnia, quae hunc in finem praestanda sunt, offero. Suscipe ea, o Pater misericordiarum, in unione Passionis et Mortis ejusdem Filii Tui, plenariaeque hujus indulgentiae me licet indignum fac participem.

Memento, Pater aeternae, congregationis Tuæ, quam possedisti ab initio. Agnosce Ecclesiam velut sponsam Unigeniti Filii Tui, pro qua Ipse sanguinem Suum profundere non dubitavit. Hanc, obsecro, sanctitatis decore, gratiarum opibus, haereditatis amplitudine ita exalta, ut digna compareat tali sponso tantoque redemptionis pretio. Respice benigne ejusdem sanctae Matris filios,

eorumque numero universas gentes associa, ut omnes Te, Deum Patrem, et quem misisti, Jesum Christum, una cum Spiritu Sancto fide viva agnoscant, spe firma invocent, et caritate perfecta complectantur. Amen.

O Jesu lux vera, quae illuminat omnem hominem venientem in hunc mundum! fac, oro, per inaeestimabilem Passionis et mortis Tuae virtutem, ut pulsis haeresum et errorum tenebris, veritatis Tuae lumen omnes amplectantur, et in optatum Ecclesiae Tuae gremium confluant. O Pastor bone, qui animam Tuam pro ovibus Tuis posuisti; gregem Tuum protege, et contra vim insidiasque eorum defende, qui veniunt in vestimentis ovium, intrinsecus autem sunt lupi rapaces. Fac, ut unum omnes pastorem admittant, et unum omnium sit ovile. Mane nobiscum Domine, quoniam dixisti; „Ecce Ego vobiscum sum omnibus diebus usque ad consummationem saeculi.“ Ostende, Ecclesiam Tuam aedificatam esse super petram, et portas inferi non praevalere adversus eam. Amen.

O Sancte Spiritus, Spiritus amoris et pacis, qui tot tamque diversas gentes in unitate fidei congregasti! Largire christianis Principibus eorumque consiliariis abundantiam Tuae gratiae,

novoque caritatis mandato, quod Jesus abiens ex hoc mundo discipulis Suis dedit, eorum corda imbue, ut ex hoc omnes cognoscant, eos in numero filiorum Dei censendos et christiano nomine dignos. Fac, ne ulla unquam cupiditate abducti quidquam moliantur, quod divinae Tuae gloriae, concordiaeque Ecclesiae adversetur, sed unitis potius viribus ad pacis aeternae visionem, ad coelestem Hierusalem populum sibi subjectum una secum perducere nitantur. Amen.

Suscipe nunc, o sanctissima Trinitas, preces et opera, quae ad plenariam debitarum poenarum Indulgentiam impetrandam quomodocunque praestiti, et fac, ut horum defectus Passione et Morte Domini nostri Jesu Christi ejusdemque pro nobis pretiosissimo effuso sanguine suppleantur. Fac me (vel animam istam N. N.) hujus magni beneficii participem; pro quo Tibi coelum et terra mecum laudes et gratiarum actiones cantent nunc et in perpetuum. Amen.

Adde septem Pater et Ave cum symbolo apostol. pro „Exaltatione S. Matris Ecclesiae,“ „pro extirpatione haeresum,“ et „pro catholicorum Principum concordia et christiani populi salute et tranquillitate.“

Devotiones erga Ss. Trinitatem.

O Summa Trinitas, una virtus, indiscreta Majestas, unus Deus in substantia, trinus in Personis, numerabiliter innumerabilis, mensurabiliter immensurabilis, invisibilis, ineffabilis, admirabilis, incomprehensibilis, inperscrutabilis! Deus magnus sine quantitate, sine qualitate bonus, sine tempore sempiternus, sine situ ubique praesens, sine loco ubique totus, omnia implens sine extensione, sine indigentia omnia creans, sine motu omnia movens; in magnitudine infinitus, summus in bonitate, in virtute omnipotens, in sapientia inaestimabilis, terribilis in consiliis, in verbis verax, in operibus sanctus, justus in judiciis, in misericordia patientissimus erga delinquentes, piissimus erga poenitentes; cui nec praeterita transeunt, nec futura succedunt; cui nec origo initium dedit, nec tempora dant incrementum; quem nec spatia dilatant, nec voluntas variat, nec mœsta perturbant, nec laeta demulcent, Deus sancte Sanctorum, Deus Spirituum et cunctae carnis, a cujus conspectu tremit cœlum et terra, cujus nutui obediunt elementa; vita vivificans me, lumen illuminans me! aperi

mihi clamanti portas justitiae, et ingressus in eas confitebor Tibi. Te adoro, Te laudo, Te glorifico labiis et corde, omnique, qua valeo, virtute Te benedico; et procumbens humiliter sub pedibus magnificentiae Tuae gratias ago Tibi, quia per illustrationem gratiae Tuae illuminasti me, et per matris Ecclesiae documenta in fide Tua confirmasti me. Et unde hoc mihi, factor cœli et terrae, qui bonorum meorum non eges, unde mihi hoc, quod amasti me? Quid Tibi dedi, et retribuisti? Ubi eram, antequam fierem, et ut inciperem bonum? Sed Tua gratia factus sum, et innumerabilibus donis Tuis ornatus sum. Perfice ergo me, qui fecisti me; perfice usque ad formam plenam imaginis Tuae et similitudinis, ad quam formasti me.

Te invoco, o beata Trinitas! ut venias in me, et templum me facias dignum gloriae Tuae. Rogo Patrem per Filium, rogo Filium per Patrem, rogo Spiritum Sanctum per Patrem et Filium, ut omnia vitia elongentur a me, et omnes sanctae virtutes plantentur in me. Deus immense, a quo omnia, et per quem omnia facta sunt! custodi me, opus manuum Tuarum, in Te sperantem et in Tua solummodo misericordia confidentem; custodi me, quaeso, hic et ubique, nunc et

semper, ita ut in me nullus pateat locus insidiis inimicorum. In Te speravi, Domine, aeterne Pater, auctor bonorum, fons Deitatis, ac totius entitatis origo! Deitas Tua me totum repleat, ejusque gloriae participem faciat, quam Filius Tuus mihi promeruit; sanctifica me in veritate, et Tui praesentia imple memoriam meam, ut cum timore et tremore semper stem in conspectu Tuo, nec unquam mens mea a Te avertatur. Fili unigenite, Deus de Deo, lumen de lumine, Verbum incarnatum, virtus omnipotens, splendor gloriae! illumina intellectum meum, roboram infirmitatem meam, ut Te cognoscam et diligam! Sanctissime Spiritus, a Patre et Filio procedens, utriusque amor et arcissimum vinculum, caritas essentialis, et totius caritatis principium, flamma vitalis, donum superans omne donum, a quo omnia bona in nos descendunt! inflamma voluntatem meam ferventissimo Tui amore et constanti caritate, ut Te solum quaeram, et universa despiciam; adstringe me Tibi et Patri ac Filio, ut nec intellectu, nec affectu a vobis divellar, in saecula saeculorum. Amen.

Devotiones ergo S. S. Eucharistiae Sacramentum.

Salve nobilissimum corpus et pretiosissime sanguis Domini mei Jesu Christi sub hac panis specie vere praesens! Te adoro tali cultu et devotione, qua novem Angelorum Chori Te adorant et colunt. Coram Te procido in spiritu humilitatis, credens et confitens, quod Tu, Dominus meus ac Deus meus, vere hic continearis.

Salve nobilissimum corpus Salvatoris mei Jesu Christi, vera hostia in cruce immolata. Adoro Te in unione istius adorationis, qua Humanitas Tua adoravit Divinitatem; et cum affectu totius universitatis ago Tibi gratias, quod pro salute nostra hic delitescere digneris.

Salve pie Jesu, Verbum Patris, splendor gloriae, fons pietatis, salus mundi, sacra Hostia. Salve Jesu Christe, princeps pacis, janua cœli, panis vivus, Virginis partus, vas Deitatis.

Credo firmissime, quod Tu Deus meus, hic praesens, meque ex hoc Sacramento intuearis atque intima cordis mei perspicias. Credo, quod sub hac panis specie non solum caro et Sanguis Tuus, verum etiam Deitas et Humanitas Tua

contineantur. Quod licet intelligere nequeam, adeo tamen firmiter credo, ut vitam et sanguinem meum pro ea veritate profundere paratus sim.

Glorifico et magnifico sapientem et benignam omnipotentiam Tuam; laudo et adoro omnipotentem et benignam sapientiam Tuam; benedico et gratias ago omnipotenti et sapienti benignitati Tuae, Christe Jesu, quod dignatus es in salutis nostrae subsidium hoc praemagnificum Sacramentum instituere.

O Jesu Christe, dulcis et unicus amor meus! oculis piissimae misericordiae Tuae respice me indignissimum humiliter coram Te prostratum, atque peccatorum meorum veniam toto corde poscentem. Per ineffabilem amorem praedulcissimi cordis Tui miserere mei, et recipe me in gratiam Tuam, propter gloriam nominis Tui.

O Pater amantissime! offero Tibi hunc dilectum Filium Tuum in perpetuae laudis Tuae holocaustum, et in propitiationis peccatorum nostrorum iuge sacrificium. Respice, quaeso, in faciem Christi Tui; memento illius copiosissimae satisfactionis, quam Tibi pro peccatis nostris pependit in Cruce, et miserere nostri.

Commendo me Tibi, o bone Jesu; intra mellifluum Cor Tuum absconde me, nec permitte,

me in aeternum separari a Te. Sis mihi in vita solatium, in morte viaticum, in aeternitate prae-mium. Id rogo Te pro me et omnibus amicis meis, per lacrymas, sudorem et sanguinem Tuum.

Benedic mihi, Domine Jesu, cum Patre et sancto Spiritu, uberemque largire gratiam, amplectendi semper et in omnibus, nunc et in hora mortis, Tuam sanctissimam voluntatem. Amen.

Devotiones erga Jesum Christum passum et crucifixum.

Gratias Tibi, Pater, referat omnis lingua pro superabundantia caritatis Tuae, qua unico Filio cordis Tui non pepercisti, sed pro nobis omnibus Illum tradidisti in mortem, ut Eum tanquam fidelem Advocatum haberemus in cœlis. Ecce enim gloria et honore coronatus, in dextera Majestatis Tuae adsistit vultui Tuo pro nobis; caro enim et frater noster est. Respice Domine in faciem Christi Tui, qui Tibi usque ad mortem obediens factus est; nec recedant ab oculis Tuis cicatrices Ejus in perpetuum, ut memineris, quantam ab Eodem satisfactionem receperis.

Et Tibi Domine Jesu, fortissime zelotes. quid gratiarum retribuam, ego homo pulvis et

vile figmentum? Quid enim pro mea salute facere debuisti, et non fecisti? Ab imo pedis usque ad summum verticis Te totum in aquis passionum demersisti, ut me totum extraheres de illis, et intraverunt usque ad animam Tuam; nam et animam Tuam in mortem perdidisti, ut meam perditam mihi redderes.

Et ecce me duplici debito obligasti. Nam et pro eo, quod dedisti animam Tuam, debitor Tibi sum; et pro mea quidem anima bis a Te mihi data, semel in creatione et semel in redemptione, quod magis juste Tibi reddam, quam ipsam, non habeo.

Pro Tua autem pretiosa anima, ita contribulata, quid ab homine digne rependi possit, non invenio. Nam etsi cœlum et terram et omnem ornatum eorum pro ea possem rependere, certe nec sic usque ad mensuram debiti ullatenus attingere possem. Ut autem ipsum, quod et debeo et possibile mihi est, retribuam, Tui, Domine, muneris est.

Diligendus es, mi Domine, toto corde, tota anima, tota virtute, et Tua mihi sequenda vestigia, qui pro me mori dignatus es. Et quomodo fiet istud in me, nisi per Te? Adhæreat anima mea post Te, quia tota virtus ejus pendet ex Te.

Et nunc Domine, redemptor meus, Te ut verum Deum adoro, in Te confido, in Te spero, et quibus possum, desideriis ad Te suspiro; adjuva imperfectum meum. Ad Tuae Passionis gloriosa insignia, in quibus salutem meam operatus es, totum me inclino. Tuae victoriosae Crucis regale vexillum in nomine Tuo, Christe, adoro. Tuum spineum diadema, Tuo rubentes sanguine clavos, Tuo sacro lateri immersam lanceam, Tua vulnera, Tuum sanguinem, Tuam sepulturam, Tuam gloriosam et victoriosam resurrectionem et glorificationem, Christe, supplex adoro et glorifico.

Odor enim vitae spirat mihi in omnibus his. Horum vivifico odore spiritum meum, Domine, a peccati morte resuscita. Horum virtute ab astutiis satanae me custodi, ac me conforta, ut jugum mandatorum Tuorum suave fiat mihi, et onus crucis, quod post Te bajulare me jubes, humeris animae meae sit leve. Quae est enim fortitudo mea, ut juxta praeceptum Tuum mundi pressuras tam multiplices invicto animo sustineam? Numquid pedes mei tanquam cervorum, ut Te velocem cursorem per spinas et confragosa passionum consequi valeam? Sed audi vocem meam, et inclina super servum Tuum suavem crucem illam, quae lignum vitae est iis, qui

apprehendunt eam; curram alacriter, portabo infatigabiliter eam, quae ab inimicis est, crucem post Te. Illam, inquam, divinissimam crucem humeris meis impone, cujus latitudo est caritas, cujus longitudo est aeternitas, cujus sublimitas est omnipotentia, cujus profundum est inscrutabilis sapientia. Confige illi manus meas et pedes meos, et totum passioni Tuae conforma servum Tuum, Domine. Amen.

Devotiones erga B. V. Mariam.

Oratio.

Salve Regina misericordiae, Domina mundi, Regina cœlorum, Virgo virginum, Sancta Sanctorum, Lumen coecorum, justorum Gloria, peccatorum Venia, desperatorum Reparatio, deficientium Fortitudo, salus Orbis, speculum totius Integritatis. Sit pietatis Tuae, ipsam quam apud Deum gratiam invenisti, notam facere mundo, reis veniam, medelam aegris, pusillis corde robur, afflictis consolationem, periclitantibus adjutorium obtinendo sanctis Tuis precibus.

Per Te accessum habeamus ad Filium, o Benedicta inventrix gratiae, genitrix vitae, mater

salutis, ut per Te nos suscipiat, qui per Te datus est nobis. Excuset apud ipsum integritas Tua culpam nostrae corruptionis; humilitas Deo grata nostrae veniam impetret vanitatis Copiosa caritas Tua nostrorum cooperiat multitudinem peccatorum; et fœcunditas Tua gloriosa fœcunditatem nobis conferat meritorum.

O Domina nostra, Mediatrix nostra, Advocata nostra! Tuo Filio nos reconcilia, Tuo Filio nos commenda, Tuo Filio nos repraesenta.

Fac o Benedicta, per gratiam quam invenisti, per praerogativam quam meruisti, per misericordiam quam peperisti; ut, qui Te mediante fieri dignatus est particeps infirmitatis et miseriae nostrae, Te quoque intercedente, participes nos faciat gloriae et beatitudinis Suae, Jesus Christus Filius Tuas Dominus noster, qui est super omnia Benedictus in saecula. Amen.



ORATIONES ET HYMNI

Dominicales et Festivales

per Annum.

Dominica prima Adventus.

Excita, quaesumus, Domine, potentiam Tuam et veni: ut ab imminentibus peccatorum nostrorum periculis, Te mereamur protegente eripi, Te liberante salvari. Qui vivis et regnas cum Deo Patre in unitate Spiritus sancti Deus per omnia saecula saeculorum. Amen.

In Solemnitate Conceptionis immaculatae Beatissimæ Virginis Mariæ.

H y m n u s.

Salve mundi Domina,
Cœlitum Regina;
Salve Virgo Virginum,
Stella matutina.

Ab æterno Dominus
Te præordinavit
Matrem Unigeniti
Verbi, quo creavit

Terram, Pontum, Aethera;
Pulchram Te ornavit
Sibi Sponsam, macula
Nulla quem fœdavit.

Elegit Eam Dominus et praelegit Eam;
In tabernaculo suo habitare fecit Eam.
Domina, protege orationem meam,
Et clamor meus ad Te veniat.

O r e m u s.

Sancta Maria, Regina coelorum, Mater Domini nostri Jesu Christi, et Mundi Domina, quæ nullum derelinquis, et nullum despicias: respice me Domina clementer oculo Tuæ pietatis et impetra mihi apud Tuum dilectum Filium cunctorum veniam peccatorum, ut qui nunc Tuam sanctam et immaculatam Conceptionem devoto affectu recolo, aeternae in futurum beatitudinis bravium capiam, ipso, quem Virgo peperisti, donante D. N. J. Chr., qui cum Patre et Spiritu Sancto vivit et regnat per omnia saecula saeculorum. Amen.

Dominica secunda Adventus.

Excita, Domine, corda nostra ad praeparandas Unigeniti Tui vias: ut per Ejus adventum, purificatis Tibi mentibus servire mereamur. Qui Tecum vivit et regnat in unitate Spiritus sancti Deus per omnia saecula saeculorum. Amen.

Dominica tertia Adventus.

Aurem Tuam, quaesumus, Domine precibus nostris accomoda: et mentis nostrae tenebras

gratia Tuae Visitationis illustra. Qui vivis et regnas etc.

Dominica quarta Adventus.

Excita, quaesumus, Domine potentiam Tuam et veni, et magna nobis virtute succurre: ut per auxilium Gratiae Tuae, quod nostra peccata praepediunt, indulgentia Tuae Propitiationis acceleret, Qui vivis et regnas etc.

In Nativitate Domini Nostri Jesu Christi.

H y m n u s.

Gloria in Excelsis Deo, et in Terra pax hominibus bonae voluntatis. Laudamus Te. Benedicimus Te. Glorificamus Te. Gratias agimus Tibi propter magnam Gloriam Tuam, Domine Deus rex coelestis. Deus Pater omnipotens. Domine Fili Unigenite Jesu Christe. Domine Deus, agnus Dei, Filius Patris. Qui tollis peccata Mundi, suscipe deprecationem nostram. Qui sedes ad dextram Patris, miserere nobis. Quoniam Tu solus Sanctus: Tu solus Dominus: Tu solus Altissimus Jesu Christe, cum sancto Spiritu in gloria Dei Patris. Amen.

Ad primam Missam.

Deus, qui hanc Sacratissimam noctem veri Luminis fecisti illustratione clarescere: da quaesumus, ut cujus Lucis mysteria in terra cogno-

vimus, ejus quoque gaudiis in coelo perfruamur.
Qui Tecum vivit et regnat etc.

Ad secundam Missam.

Da nobis, quaesumus, omnipotens Deus; ut
qui nova incarnati Verbi Tui Luce perfundimur,
hoc in nostro resplendeat opere, quod per fidem
fulget in mente. Per eundem Dominum Jesum
Christum, qui Tecum etc.

Ad tertiam Missam.

Concede, quaesumus, omnipotens Deus: ut
nos Unigeniti Tui nova per carnem nativitas liberet,
quos sub peccati jugo vetusta servitus tenet. Per
eundem Dominum nostrum etc.

In Festo S. Stephani Proto-Martyris.

Da nobis, quaesumus, Domine imitari, quod
colimus, ut discamus et inimicos diligere: quia
ejus Natalitia celebramus, qui novit etiam pro
persecutoribus exorare Dominum nostrum Jesum
Christum qui Tecum vivit etc.

**In Festo sancti Joannis Apostoli et
Evangelistae.**

Ecclesiam Tuam, Domine, benignus illustra:
ut beati Joannis Apostoli Tui et Evangelistae
illuminata doctrinis, ad dona perveniat sempiterna.
Per Dominum nostrum Jesum Christum etc.

In Festo SS. Innocentium.

Deus, cujus hodierna die praeconium Innocentes Martyres non loquendo, sed moriendo confessi sunt, omnia in nobis vitiorum mala mortifica: ut fidem Tuam, quam lingua nostra loquitur, etiam moribus vita fateatur. Per Dominum nostrum etc.

Dominica infra Octavam Nativitatis Domini.

Omnipotens sempiterne Deus, dirige actus nostros in beneplacito Tuo: ut in nomine dilecti Filii Tui mereamur bonis operibus abundare. Qui Tecum vivit et regnat etc.

Gratiarum Actio anno incunte.

„Te Deum Laudamus.“

Te Deum laudamus, Te Dominum confitemur.

Te aeternum Patrem, omnis Terra veneratur.

Tibi omnes Angeli, Tibi coeli et universae Potestates.

Tibi Cherubim et Seraphim incessabili voce proclamant.

Sanctus, Sanctus, Sanctus, Dominus Deus Sabaoth!

Pleni sunt Cœli et Terra, Majestatis Gloriæ Tuæ!

Te gloriosus Apostolorum Chorus.

Te Prophetarum laudabilis Numerus.

Te Martyrum candidatus laudat Exercitus.
Te per orbem Terrarum sancta confitetur Ecclesia.
Patrem immensae Majestatis.
Venerandum Tuum verum et Unicum Filium.
Sanctum quoque Paraclitum Spiritum.
Tu Rex Gloriae Christe.
Tu Patris sempiternus es Filius.
Tu ad liberandum suscepturus hominem non hor-
ruisti Virginis uterum.
Tu devicto mortis aculeo, aperuisti Credentibus
regna Coelorum.
Tu ad dexteram Dei sedes in Gloria Patris.
Judex crederis esse venturus.
Te ergo quaesumus, Tuis famulis subveni, quos
pretioso sanguine redemisti.
Aeterna fac cum Sanctis Tuis in Gloria numerari.
Salvum fac populum Domine, et benedic haere-
ditati Tuae.
Et rege eos, et extolle illos usque in Aeternum.
Per singulos dies benedicimus Te.
Et laudamus Nomen Tuum in saeculum, et in
saeculum saeculi.
Dignare Domine die isto sine peccato Nos custodire.
Miserere nostri Domine, miserere nostri.
Fiat misericordia Tua, Domine, super nos, quem-
admodum speravimus in Te,

**In Te Domine speravi, non confundar in Aeternum,
Benedicamus Patrem, et Filium cum sancto Spiritu.
Laudemus et superexaltemus Eum in saecula.**

Domine exaudi orationem meam,

Et clamor meus ad Te veniat.

Orationes.

**Deus, cujus misericordiae non est Numerus,
et Bonitatis infinitus est Thesaurus, piissimae
Majestati Tuae pro collatis Donis Gratias agi-
mus, Tuam semper Clementiam exorantes; ut
qui Petentibus postulata concedis, eosdem non
deserens ad Praemia futura disponas. Per Chri-
stum Dominum nostrum.**

**Deus, qui nobis sub sacramento mirabili
Passionis Tuae memoriam reliquisti, tribue, quæ-
sumus, ita nos Corporis et Sanguinis Tui sacra
mysteria venerari: ut Redemptionis Tuae fructum
in nobis jugiter sentiamus. Qui vivis etc.**

**Quaesumus, omnipotens Deus, ut Famulus
Tuus Ludovicus Rex noster, qui Tua miseratione
suscepit Regni gubernacula, virtutum etiam om-
nium percipiat incrementa: quibus decenter orna-
tus, et vitiorum monstra devitare, et ad Te, qui
Via, Veritas et Vita es, gratosus valeat pervenire.**

**Deus, refugium nostrum, et Virtus, adesto
piis Ecclesiae Tuae precibus Auctor ipse pietatis**

et praesta: ut, quod fideliter petimus, efficaciter consequamur. Per Dominum nostrum etc.

Deus, qui salutis aeternae, Beatae Mariae Virginitate foecunda, humano generi praemia praestitisti, tribue, quaesumus: ut ipsam pro nobis intercedere sentiamus, per quam meruimus Auctorem Vitae suscipere, Dominum nostrum Jesum Christum Filium Tuum, qui Tecum vivit et regnat in Unitate Spiritus sancti Deus per omnia saecula saeculorum. Amen.

Domine exaudi orationem meam.

Et clamor meus ad Te veniat.

Benedicamus Domino.

Deo Gratias.

Fidelium animae per misericordiam Dei requiescant in pace. Amen.

In Circumcisione Domini N. J. Chr.

A cunctis nos quaesumus, Domine, mentis, et corporis defende periculis; et intercedente Beata et gloriosa semper virgine Dei Genitrice Maria, cum beatis Apostolis Tuis Petro et Paulo, atque Beato N. et omnibus Sanctis, salutem nobis tribue benignus, et pacem: ut destructis adversitatibus, et erroribus universis, Ecclesia Tua secure serviat Tibi libertate. Per eundem Dominum nostrum etc.

In Epiphania Domini.

Deus, qui hodierna die Unigenitum Tuum
Gentibus stella duce revelasti: concede propitius,
ut qui jam Te ex Fide cognovimus, usque ad
contemplandam speciem Tuæ celsitudinis per-
ducamur. Per eundem Dominum etc.

H y m n u s.

O Sola magnarum urbium
Major Bethlehœm, cui contigit,
Ducem salutis coelitus
Incorporatum gignere.

Quem stella, quæ solis rotam
Vincit decore ac lumine,
Venisse terris nuntiat
Cum carne terrestri Deum.

Videre postquam illum Magi,
Eoa promunt munera,
Stratique votis offerunt
Thus, myrrham et aurum regium.

Regem Deumque annuntiant
Thesaurus, et fragrans odor
Thuris Sabaei, ac myrrheus
Pulvis sepulchrum prædocet.

Jesu Tibi sit Gloria,
Qui apparuisti Gentibus
Cum Patre et almo Spiritu,
In sempiterna sæcula. Amen.

Dominica secunda post Epiphaniam.

Omnipotens sempiterne Deus, qui coelestia
simul et terrena moderaris: supplicationes Populi
Tui clementer exaudi, et pacem Tuam nostris

concede temporibus. Per Dominum nostrum Jesum Christum etc.

In Festo Ss. Nominis Jesu.

Deus, qui Unigenitum Filium Tuum constituisti humani generis Salvatorem, et Jesum vocari jussisti: concede propitius, ut cujus sanctum Nomen veneramur in Terris, Ejus quoque aspectu perfruamur in coelis. Per eundem Dominum nostrum J. Chr. etc.

Hymnus de sanctissimo Nomine Jesu.

Jesu! dulcis memoria,
Dans vera cordi gaudia;
Sed super mel et omnia,
Ejus dulcis præsentia.

Nil canitur suavius,
Auditur nil jucundius,
Nil cogitatur dulcius,
Quam Jesus Dei Filius.

Jesu! Spes Pœnitentibus,
Quam Pius es Petentibus!
Quam Bonus, Te Quærentibus!
Sed quid Invenientibus?

Nec lingua valet dicere,
Nec litera exprimere,
Expertus potest credere,
Quid sit Jesum diligere.

Jesu! Dulcedo cordium,
Fons vivus, Lumen mentium,
Excedens omne gaudium
Et omne desiderium.

Jesu! Decus angelicum,
In aure dulce canticum,
In ore mel mirificum,
In corde Nectar cœlicum!

Qui Te gustant, esuriunt,
Qui bibunt, adhuc sitiunt,
Desiderare nesciunt,
Nisi Jesum, quem diligunt.

O Jesu mi dulcissime!
Spes suspirantis animæ,
Te quærunt piæ lacrymæ,
Te clamor mentis intimæ.

Mane nobiscum, Domine,
Et nos illustra Lumine,
Pulsa mentis caligine,
Mundum reple dulcedine.

Jesu mi Bone! sentiam
Amoris Tui copiam!
Da mihi per præsentiam
Tuam videre gloriam.

Jesu! nostrum sis gaudium,
Qui es futurus Præmium,
In Te sit nostra gloria,
Salus, qui es in Patria!

Dominica tertia post Epiphaniam.

Omnipotens sempiterne Deus infirmitatem nostram propitius respice: atque ad protegendum nos dexteram Tue Majestatis extende. Per Dominum nostrum. etc.

Dominica quarta post Epiphaniam.

Deus, qui nos in tantis periculis constitutos, pro humana scis fragilitate non posse subsistere:

da nobis salutem mentis et corporis, ut ea, quæ pro peccatis nostris patimur, Te adjuvante vincamus. Per Dominum nostrum etc.

Dominica quinta post Epiphaniam.

Familiam Tuam, quaesumus Domine, continua pietate custodi: ut quae in sola spe gratiae coelestis innititur, Tua semper protectione muniat. Per Dominum nostrum J. Chr. etc.

Dominica sexta post Epiphaniam.

Praesta, quaesumus omnipotens Deus, ut semper rationabilia meditantes, quae Tibi sunt placita, et dictis exequamur, et factis. Per Dominum nostrum Jesum Christum etc.

Dominica in Septuagesima.

Preces populi Tui, quaesumus Domine, clementer exaudi: ut qui juste pro peccatis nostris affligimur, pro Tui Nominis Gloria misericorditer liberemur. Per Dominum etc.

In Festo Conversionis S. Pauli Apostoli.

Deus, qui universum Mundum Beati Pauli Apostoli praedicatione docuisti: da nobis, quaesumus: ut qui ejus hodie Conversionem colimus, per ejus ad Te exempla gradiamur. Per Dominum nostrum etc.

In Festo Cathedrae S. Petri Apostoli.

Deus, qui Beato Petro Apostolo Tuo collatis clavibus Regni coelestis ligandi atque solvendi Pontificium tradidisti: concede, ut intercessionis ejus auxilio, a peccatorum nostrorum nexibus liberemur. Qui vivis et regnas etc.

In Festo S. Sebastiani Martyris.

Infirmi-
tatem nostram respice omnipotens Deus: et quia pondus propriae actionis gravat, Beati Martyris Tui Sebastiani intercessio gloriosa nos protegat. Per Dominum nostrum etc.

**In Festo Beati Francisci Salesii
Episcopi et Confessoris.**

Deus, qui ad animarum salutem Beatum Franciscum Confessorem Tuum atque Pontificem, Omnibus omnia factum esse voluisti: concede propitius, ut caritatis Tuae dulcedine perfusi, ejus dirigentibus monitis, ac suffragantibus meritis, aeterna gaudia consequamur. Per Dominum nostrum Jesum Christum etc.

Dominica in Sexagesima.

Deus, qui conspicias, quia ex nulla actione nostra confidimus: concede propitius; ut contra adversa omnia Doctoris Gentium protectione muniamur. Per Dominum nostrum etc.

Dominica in Quinquagesima.

Preces nostras, quaesumus Domine, clementer exaudi: atque a peccatorum vinculis absolutos, ab omni nos adversitate custodi. Per Dominum nostrum Jesum Christum etc.

In Festo Purificationis Beatissimae Virginis Mariae.

Omnipotens sempiterne Deus, Majestatem Tuam supplices exoramus, ut sicut Unigenitus Filius Tuus hodierna die cum nostra carnis substantia in templo est praesentatus: ita nos facias purificatis Tibi mentibus praesentari. Per eundem Dominum nostrum etc.

H y m n u s.

Ave Maris Stella,
Dei Mater alma,
Atque semper Virgo
Felix cœli Porta.

Sumens illud ave
Gabrielis ore,
Funda nos in pace,
Mutans Hevæ nomen.

Solve vincla reis,
Profer Lumen cæcis
Mala nostra pelle,
Bona cuncta posce.

Monstra Te esse matrem,
Sumat per Te preces,
Qui pro nobis natus,
Tulit esse Tuus.

Virgo singularis,
Inter omnes mitis,
Nos culpis solutos,
Mites fac, et castos.

Vitam præsta puram,
Iter para tutum,
Ut videntes Jesum,
Semper collætémur.

Sit laus Deo Patri,
Summo Christo decus,
Spiritus sancto,
Tribus honor unus. Amen.

Feria quarta Cinerum.

Praesta, Domine, fidelibus Tuis, ut jejuni-
um veneranda Solemnia, et congrua pietate sus-
cipiant, et segura devotione percurrant. Per
Dominum nostrum Jesum Christum etc.

Dominica prima in Quadragesima.

Deus, qui Ecclesiam Tuam annua Quadra-
gesimali observatione purificas: praesta Familiae
Tuae, ut quod a Te obtinere abstinendo nititur,
hoc bonis operibus exequatur. Per Dominum etc.

Dominica secunda in Quadragesima.

Deus, qui conspicias, omni nos virtute destitui,
interius, exteriusque custodi: ut ab omnibus
adversitatibus muniamur in corpore, et a pravis
cogitationibus mundemur in mente. Per Domi-
num etc.

Dominica tertia in Quadragesima.

Quaesumus omnipotens Deus, vota humilium respice, atque ad defensionem nostram dexteram Tuae Majestatis extende. Per Dominum etc.

Dominica quarta in Quadragesima.

Concede, quaesumus omnipotens Deus: ut qui ex merito nostrae actionis affligimur, Tuae gratiae consolatione respiremus. Per Dominum etc.

Dominica quinta in Quadragesima.

De Passione.

Quaesumus omnipotens Deus, Familiam Tuam propitius respice: ut Te largiente, regatur in corpore, et Te servante, custodiatur in mente. Per Dominum nostrum etc.

Dominica in Palmis.

Omnipotens sempiterne Deus, qui humano generi, ad imitandum humilitatis exemplum, Salvatorem nostrum carnem sumere, et crucem subire fecisti: concede propitius, ut et patientiae Ipsius habere documenta, et Resurrectionis consortia mereamur. Per eundem Dominum etc.

In Festo V. Vulnerum D. N. Jesu Christi.

. Deus, qui Unigeniti Tui Filii passione, et per quinque vulnera Ejus sanguinis effusione, humanam naturam peccato perditam reparasti:

tribue nobis, quaesumus, ut, qui ab Eo suscepta vulnera veneramus in Terris, Ejusdem pretiosissimi Sanguinis fructum consequi mereamur in Cœlis. Per eundem Dominum nostrum etc.

In Festo Sancti Thomae de Aquino.

Deus, qui Ecclesiam Tuam Beati Thomae Confessoris Tui mira eruditione clarificas, et sancta operatione fœcundas: da nobis quaesumus, et quae docuit intellectu conspiceri, et quae egit, imitatione complere. Per Dominum etc.

In Festo Sancti Gabrielis Archangeli.

Deus, qui inter ceteros angelos ad annuntiandum Incarnationis Tuae mysterium, Gabrielem Archangelum elegisti: concede propitius, ut qui festum ejus celebramus in terris, ipsius patrocinium sentiamus in cœlis. Qui vivis et regnas etc.

H y m n u s.

Christe, Sanctorum decus Angelorum,
Gentis humanæ Sator et Redemptor,
Cœlitus nobis tribuas beatas
Scandere sedes.

Angelus pacis Michael in ædes
Cœlitus nostras veniat, serenæ
Auctor ut pacis lacrymosa in orcum
Bella releget.

Angelus fortis Gabriel ut hostes
Pellat antiquos, et amica cœlo,
Quæ triumphator statuit per orbem,
Templa revisat.

Angelus nostræ medicus salutis
 Adsit e cælo Raphael, ut omnes
 Sanet ægrotos, dubiosque vitæ
 Dirigat actus.

Virgo dux pacis, Genitrixque Lucis,
 Et sacer nobis Chorus angelorum
 Semper assistat, simul et micantis
 Regia cæli.

Præstet hoc nobis Deitas beata
 Patris ac Nati, pariterque sancti
 Spiritus, cujus resonat per omnem
 Gloria mundum. Amen.

In Festo Sancti Josephi.

Sanctissimæ Genitricis Tuæ sponsi, quæsumus Domine, meritis adjuvemur: ut, quod possibilitas nostra non obtinet, ejus nobis intercessionem donetur. Qui vivis et regnas etc.

Hymnus.

Te, Joseph, celebrent agmina cœlitum,
 Te cuncti resonent Christiadum Chori,
 Qui clarus meritis, junctus et inclytæ
 Casto sœdere Virgini.

Almo cum tumidam germine conjugem
 Admirans, dubio tangeris anxius,
 Afflatu superi Flaminis Angelus
 Conceptum puerum docet.

Tu natum Dominum stringis, ad exteras
 Aegypti profugum tu sequeris plagas;
 Amissum Solymis quæris, et invenis,
 Miscens gaudia fletibus.

Post mortem reliquos mors pia consecrat,
 Palmamque emeritos gloria suscipit;
 Tu vivens, Superis par frueris Deo,
 Mira sorte beatior.

Nobis, summa Trias, parce precantibus,
Da Joseph meritis sidera scandere;
Ut tandem liceat nos tibi perpetim
Gratum promere canticum. Amen.

In Festo Sancti Benedicti.

Intercessio nos, quaesumus Domine, Beati
Benedicti Abbatis commendet: ut quod nostris
meritis non valemus, ejus patrocinio assequamur.
Per Dominum nostrum Jesum Christum etc.

In Festo Annuntiationis Beatiss. Virg. Mariae.

Deus, qui de beatæ Mariæ Virginis utero
Verbum Tuum, Angelo nuntiante, carnem sus-
cipere voluisti, præsta supplicibus Tuis, ut qui
vere eam Genitricem Dei credimus, ejus apud Te
intercessionibus adjuvemur. Per Dominum etc.

H y m n u s.

Gloriosa Virginum,
Sublimis inter sidera,
Qui te creavit, parvulum
Lactente nutris ubere.

Quod Heva tristis abstulit,
Tu reddis almo germine:
Intrent ut astra flebiles,
Cæli recludis cardines.

Tu regis alti janua,
Et aula Lucis fulgida:
Vitam datam per Virginem
Gentes redemptæ plaudite.

Jesu Tibi sit gloria,
Cum natus es de Virgine
Cum Patre et almo Spiritu,
In sempiterna sæcula. Amen.

In Festo sacrae Coronae D. N. Jesu Christi.

Deus, qui Unigenitum Tuum in Passione sua spinea Corona decorari, et Regem adorari voluisti: da nobis, quaesumus, ob piam venerationem sacrae illius spineae Coronae in cœlesti Ejus Regno coronam gloriae suae et aeterni Regis majestatem perpetuo contemplari. Per eundem Dominum etc.

In Festo septem Dolorum Beatiss. Virg. Mariae.

Deus, in cujus Passione secundum Simeonis prophetiam, dulcissimam Animam gloriosae Virginis et Matris Mariae doloris gladius pertransivit: concede propitius, ut qui transfixionem ejus et passionem venerando recolimus, gloriosis meritis et precibus omnium Sanctorum Cruci fideliter astantium intercedentibus, passionis Tuae effectum felicem consequamur. Qui vivis et regnas etc.

Hymnus.

Stabat Mater dolorosa,
Juxta Crucem lacrymosa,
Dum pendebat Filius.

Cujus animam gementem
Contristatam et dolentem
Pertransivit Gladius.

O quam tristis et afflicta
Fuit illa Benedicta,
Mater Unigeniti!

Quæ mœrebat et dolebat,
Pia Mater dum videbat
Nati pœnas inclyti.

Quis est homo, qui non fleret,
Matrem Christi si videret
In tanto supplicio?

Quis non posset contristari,
Christi Matrem contemplari
Dolentem cum Filio?

Pro peccatis suæ gentis
Vidit Jesum in tormentis,
Et flagellis subditum.

Vidit suum dulcem Natum
Moriendo desolatum,
Dum emisit Spiritum.

Eja Mater Fons amoris,
Me sentire vim doloris
Fac, ut tecum lugeam.

Fac, ut ardeat cor meum
In amando Christum Deum,
Ut Sibi complaceam! Amen.

Solemnnitas de Lancea et Clavis D. N. Jesu Christi.

Deus, qui in assumptae carnis infirmitate
Clavis affigi, et Lancea vulnerari pro mundi
salute voluisti: concede propitius, ut, qui eorum-
dem Clavorum et Lanceae solemnnia veneramur
in terris, de glorioso victoriae Tuae triumpho
gratulemur in coelis. Qui vivis et regnas etc.

Feria sexta in Parasceve.

Respice, quaesumus, Domine super hanc
Familiam Tuam, pro qua Dominus noster Jesus

Christus non dubitavit manibus tradi nocentium et Crucis subire Tormentum. Qui Tecum vivit et regnat etc.

Omnipotens sempiterne Deus, qui gloriam Tuam omnibus in Christo Gentibus revelasti; custodi opera misericordiae Tuae, ut Ecclesia Tua toto orbe diffusa stabili fide in Confessione Tui Nominis perseveret. Per Dominum etc.

Oremus et pro beatissimo Papa nostro N., ut Deus et Dominus noster, qui elegit eum in ordine Episcopatus, salvum atque incolumem custodiat Ecclesiae Suae sanctae, ad regendum populum sanctum Dei.

Omnipotens sempiterne Deus, cujus iudicio universa fundantur: respice propitius ad preces nostras, et electum nobis Antistitem Tua pietate conserva, ut Christiana Plebs, quae Te gubernatur auctore, sub tanto Pontifice credulitatis suae meritis augeatur. Per Dominum etc.

Oremus et pro omnibus Episcopis, Presbyteris, Diaconis et Subdiaconis, Acolythis, Exorcistis, Lectoribus, Ostiariis, Confessoribus, Virginibus, Viduis; et pro omni populo sancto Dei.

Omnipotens sempiterne Deus, cujus spiritu totum corpus Ecclesiae sanctificatur et regitur, exaudi nos pro universis ordinibus supplicantes:

ut gratiae Tuae munere ab omnibus Tibi gradibus fideliter serviatur. Per Dominum etc.

Oremus Deum Patrem omnipotentem, ut cunctis mundum purget erroribus; morbos auferat; famem depellat; aperiatur carceres; vincula dissolvat; peregrinantibus reditum; infirmantibus sanitatem; navigantibus portum salutis indulgeat.

Omnipotens sempiterne Deus, moestorum consolatio, laborantium fortitudo: perveniant ad Te preces de quacumque tribulatione clamantium, ut omnes sibi in necessitatibus suis misericordiam Tuam gaudeant affuisse. Per Dominum etc.

Oremus et pro haereticis, et schismaticis; ut Deus et Dominus noster eruat eos ab erroribus universis; et ad sanctam matrem Ecclesiam catholicam, atque Apostolicam revocare dignetur.

Omnipotens sempiterne Deus, qui salvos omnes, et neminem vis perire: respice ad animas diabolica fraude deceptas, ut omni haeretica pravitae deposita, errantium corda resipiscant, et ad veritatis Tuae redeant unitatem. Per Dominum etc.

Oremus et pro perfidis Judaeis; ut Deus, et Dominus noster auferat velamen de cordibus eorum, ut et ipsi agnoscant Jesum Christum Dominum nostrum.

Oremus et pro Paganis; ut Deus omnipotens auferat iniquitatem a cordibus eorum; ut relictis idolis suis, convertantur ad Deum vivum et verum, et unicum Filium Ejus Jesum Christum Deum, et Dominum nostrum.

Omnipotens sempiterne Deus, qui non mortem peccatorum, sed vitam semper inquis: suscipe propitius orationem nostram, et libera eos ab Idolorum cultura, et aggrega Ecclesiae Tuae sanctae ad laudem et gloriam Nominis Tui. Per Dominum nostrum etc.

Sabbato Sancto.

Deus, qui hanc sacratissimam Noctem gloria Dominicae Resurrectionis illustras: conserva in nova Familiae Tuae progenie adoptionis Spiritum, quem dedisti; ut corpore, et mente renovati, puram Tibi exhibeant servitutem. Per eundem Dominum nostrum Jesum Christum etc.

Dominica Resurrectionis.

Deus, qui hodierna die per Unigenitum Tuum, aeternitatis nobis aditum devicta morte reserasti: vota nostra, quae praeveniendo aspiras, etiam adjuvando proseguere. Per Dominum etc.

Feria secunda Resurrectionis.

Deus, qui solemnitate Paschali, mundo remedia contulisti; populum Tuum, quaesumus,

coelesti dono proseguere; ut et perfectam libertatem consequi mereatur, et ad vitam proficiat sempiternam. Per Dominum nostrum etc.

Dominica in Albis.

Praesta, quaesumus, omnipotens Deus, ut qui Paschalia festa peregrimus: haec Te largiente, moribus et vita teneamus. Per Dominum etc.

Dominica secunda post Pascha.

Deus, qui in Filii Tui humilitate jacentem mundum erexisti: fidelibus Tuis perpetuam concede laetitiam: ut quos perpetuae mortis eripuisti casibus, gaudiis facias perfrui sempiternis. Per eundem Dominum etc.

Inventio sanctae Crucis.

Deus, qui in praeclara salutiferae Crucis Inventione Passionis Tuae miracula suscitasti: concede, ut vitalis ligni praetio, aeternae vitae suffragia consequamur. Qui vivis et regnas etc.

In Festo Sancti Joannis Nepomuceni.

Deus, qui ob invictum Beati Joannis Sacramentale silentium nova Ecclesiam Tuam Martyrii corona decorasti: da nobis ejus intercessione, et exemplo, linguam caute custodire, ac omnia potius mala, quam animae detrimentum in hoc saeculo tolerare. Per Dominum nostrum etc.

Dominica tertia post Pascha.

Deus, qui errantibus, ut in viam possint redire justitiae, veritatis Tuae Lumen ostendis, da cunctis, qui Christiana professione censentur, et illa respuere, quae huic inimica sunt Nomini, et ea, quae sunt apta, sectari. Per Dominum etc.

In Festo Sancti Georgii.

Deus, qui nos Beati Georgii Martyris Tui meritis, et intercessione laetificas, concede propitius, ut qui Tua per eum beneficia poscimus, dono Tuae gratiae consequamur. Per Dominum etc.

In Festo Sancti Marci Evangelistae.

Deus, qui Beatum Marcum Evangelistam Tuum Evangelicae praedicationis gratia sublimasti: tribue, quaesumus, Ejus nos semper et eruditione proficere, et oratione defendi. Per Dominum etc.

In Festo SS. Philippi et Jacobi Apostolorum.

Deus, qui nos annua Apostolorum Tuorum Philippi et Jacobi solemnitate laetificas: praesta, quaesumus, ut quorum gaudemus meritis, instruamur exemplis. Per Dominum etc.

In Festo Sancti Bonifacii.

Deus, qui populo Tuo in multis periculis constituto Sancti Bonifacii Confessoris Tui atque

Pontificis mira vigilantia providisti; concede propitius; ut cujus gloriosa merita veneramur, perennibus auxiliis muniamur. Per Dominum etc.

Dominica quarta post Pascha.

Deus, qui fidelium mentes unius efficis voluntatis: da populis Tuis id amare, quod praecipis, id desiderare, quod promittis; ut inter mundanas varietates ibi nostra fixa sint corda, ubi vera sunt gaudia. Per Dominum etc.

Dominica quinta post Pascha.

Deus, a Quo bona cuncta procedunt, largire supplicibus Tuis: ut cogitemus Te inspirante, quae recta sunt, et Te gubernante eadem faciamus. Per Dominum nostrum etc.

In Rogationibus.

Praesta, quaesumus, omnipotens Deus: ut qui in afflictione nostra de Tua pietate confidimus, contra adversa omnia Tua semper protectione muniamur. Per Dominum etc.

Litaniae Majores vid. pag. 108.

In Ascensione

Domini nostri Jesu Christi.

Concede, quaesumus, omnipotens Deus: ut, qui hodierna die Unigenitum Tuum Redemptorem nostrum ad coelos ascendisse credimus, ipsi quo-

que mente in coelestibus habitemus. Per Dominum nostrum etc.

H y m n u s.

Salutis humanæ Sator,
Jesu voluptas cordium,
Orbis redempti Conditor,
Et casta lux amantium.

Qua victus es clementia,
Ut nostra ferres crimina;
Mortem subires innocens,
A morte nos ut tolleres.

Perrumpis infernum Chaos,
Vinctis catenas detrahis,
Victor triumpho nobili
Ad dexteram Patris sedes.

Te cogat indulgentia,
Ut damna nostra sarcias,
Tuique vultus compotes
Dites beato lumine.

Tu Dux ad astra et semita,
Sis meta nostris cordibus,
Sis lacrymarum gaudium,
Sis dulce vitæ præmium.

Jesu, Tibi sit gloria,
Qui victor in cælum redis,
Cum Patre, et almo Spiritu.
In sempiterna sæcula. Amen.

Dominica sexta post Pascha.

Omnipotens, sempiterne Deus, fac nos Tibi
semper et devotam gerere voluntatem, et Majestati
Tuae sincero corde servire. Per Dominum etc.

In Festo Pentecostes.**Hymnus.**

Veni, creator Spiritus,
Mentes Tuorum visita,
Imple superna gratia,
Quæ Tu creasti, pectora.

Qui diceris Paraclytus,
Altissimi donum Dei,
Fons vivus, Ignis, Caritas
Et spiritalis unctio.

Tu septiformis munere,
Digitus Paternæ dexteræ,
Tu rite promissum Patris,
Sermone ditans guttura.

Aecende Lumen sensibus,
Infunde amorem cordibus,
Infirma nostri corporis
Virtute firmans perpeti.

Hostem repellas longius,
Pacemque dones protinus.
Ductore sic de prævio
Vitemus omne noxium.

Per Te sciamus da Patrem,
Noscamus atque Filium;
Te utriusque Spiritum
Credamus omni tempore.

Deo Patri sit Gloria,
Et Filio qui a mortuis
Surrexit, ac Paraclyto,
In sæculorum sæcula. Amen.

Deus, qui hodierna die corda Fidelium sancti Spiritus illustratione docuisti: da nobis in eodem Spiritu recta sapere, et de Ejus semper consolatione gaudere. Per Dominum etc.

Feria secunda post Pentecosten.

Deus, qui Apostolis Tuis sanctum dedisti Spiritum: concede plebi Tuae piae petitionis effectum; ut quibus dedisti fidem, largiaris et pacem. Per Dominum etc.

Feria quarta post Pentecosten.

Quat. Temp.

Mentes nostras, quaesumus Domine, Paraclitus, qui a Te procedit, illuminet, et inducat in omnem, sicut Tuus promisit Filius, veritatem. Qui Tecum vivit et regnat etc.

In Festo Ss. Trinitatis.

Hymnus.

Jam Sol recedit igneus,
Tu Lux perennis Unitas.
Nostris, Beata Trinitas,
Infunde amorem cordibus.

Te mane laudum carmine
Te deprecamur vespere:
Digneris, ut Te supplices
Laudemus inter Cœlites.

Patri, simulque Filio,
Tibique sancte Spiritus
Sicut fuit, sit jugiter,
Sæclum per omne gloria. Amen.

Oratio.

Omnipotens, sempiternæ Deus, qui dedisti famulis Tuis in Confessione verae Fidei, æternæ Trinitatis gloriam agnoscere, et in potentia Ma-

jestatis adorare Unitatem: quæsumus, ut Ejusdem Fidei firmitate, ab omnibus semper muniamur adversis. Per Dominum etc.

Festum Corporis Christi.

Hymnus.

Pange lingua gloriosi
Corporis Mysterium
Sanguinisque pretiosi,
Quem in mundi pretium
Fructus ventris generosi
Rex effudit Gentium.

Nobis datus, Nobis natus,
Ex intacta Virgine,
Et in mundo conversatus,
Sparso Verbi semine,
Sui moras incolatus
Miro clausit ordine.

In supremæ nocte Cœnæ
Recumbens cum fratribus,
Observata lege plene
Cibis in legalibus,
Cibum turbæ duodenæ
Se dat Suis manibus.

Verbum caro, panem verum
Verbo carnem efficit;
Fitque Sanguis Christi merum,
Et si sensus deficit,
Ad firmandum, cor sincerum
Sola Fides sufficit.

Tantum ergo Sacramentum
Veneremur cernui,
Et antiquum Documentum
Novo cedat Ritui;
Præstet Fides supplementum
Sensuum defectui.

Genitori, Genitoque
 Laus et Jubilatio,
 Salus, Honor, Virtus quoque
 Sit et Benedictio;
 Procedenti ab utroque
 Compar sit Laudatio. Amen.

O r a t i o.

Deus, qui nobis sub Sacramento mirabili,
 Passionis Tuae memoriam reliquisti: Tribue quæ-
 sumus, ita nos Corporis et Sanguinis Tui sacra
 Mysteria venerari, ut Redemptionis Tuae fructum
 in nobis jugiter sentiamus. Qui vivis et regnas
 cum Deo Patre etc.

**Dominica infra Octavam Corporis
 Christi.**

H y m n u s.

Lauda, Sion, Salvatorem,
 Lauda Ducem, et Pastorem
 In hymnis et canticis.

Quantum potes, tantum aude,
 Quia major omni laude,
 Nec laudare sufficis.

Laudis thema specialis,
 Panis vivus et vitalis
 Hodie proponitur.

Quem in sacræ mensa Cœnæ,
 Turbæ fratrum duodenæ
 Datum non ambigitur.

Sit laus plena sit sonora,
 Sit jucunda, sit decora,
 Mentis Jubilatio.

Dies enim solemnus agitur,
In qua mensæ prima recolitur
Hujus Institutio.

In hac mensa novi Regis,
Novum Pascha novæ Legis,
Phase vetus terminat.

Vetustatem novitas,
Umbram fugat Veritas,
Noctem Lux climinat.

Quod in Cœna Christus gessit,
Faciendum hoc expressit
In Sui memoriam.

Docti sacris institutis,
Panem, vinum in salutis
Consecramus Hostiam.

Dogma datur Christianis,
Quod in carnem transit panis,
Et vinum in Sanguinem.

Quod non capis, quod non vides,
Animosa firmat Fides,
Præter rerum ordinem.

Sub diversis speciebus,
Signis tantum, et non rebus
Latent res eximiae.

Caro cibus, sanguis potus:
Manet tamen Christus totus
Sub utraque specie.

A sumente non concisus,
Non confractus, non divisus,
Integer accipitur.

Sumit Unus, sumunt Mille,
Quantum isti, tantum ille:
Nec sumptus consumitur.

Sumunt Boni, sumunt Mali:
Sörte tamen inæquali,
Vitæ vel interitus.

Mors est Malis, Vita Bonis:
Vide paris sumptionis,
Quam sit dispar exitus.

Fracto demum Sacramento,
Ne vacilles, sed memento,
Tantum esse sub fragmento,
Quantum toto tegitur.

Nulla rei fit scissura:
Signi tantum fit fractura:
Qua nec status, nec statura,
Signati minuitur.

Ecce panis Angelorum,
Factus cibus viatorum:
Vere panis filiorum,
Non mittendus canibus.

In figuris præsignatur,
Cum Isaac immolatur:
Agnus Paschæ deputatur:
Datur Manna Patribus.

Bone Pastor, panis vere,
Jesu nostri miserere:
Tu nos pasce, nos tuere:
Tu nos bona fac videre
In Terra Viventium.

Tu, qui cuncta scis, et vales:
Qui nos pascis hic mortales:
Tuos Tibi commensales,
Cohæredes et Sodales
Fac Sanctorum civium. Amen.
Alleluja!

O r a t i o.

Deus, qui nobis sub Sacramento mirabili, Passionis Tuae etc.

Sancti, Nominis Tui, Domine, timorem pariter, et amorem fac nos habere perpetuum: quia nunquam Tua gubernatione destituis, quos in soliditate Tuae dilectionis instituis. Per Dominum etc.

Dominica tertia post Pentecosten.

Protector in Te Sperantium Deus, sine quo nihil est validum, nihil sanctum, multiplica super nos misericordiam Tuam: ut Te rectore, Te duce, sic transeamus per bona temporalia, ut non amittamus aeterna. Per Dominum etc.

Dominica quarta post Pentecosten.

Da nobis, quaesumus Domine, ut et mundi cursus pacifice nobis tuo ordine dirigatur; et Ecclesia Tua tranquilla devotione laetetur. Per Dominum etc.

Dominica quinta post Pentecosten.

Deus, qui diligentibus Te bona invisibilia praeparasti, infunde cordibus nostris Tui amoris affectum: ut Te in omnibus, et super omnia diligentes, promissiones Tuas, quae omne desiderium superant, consequamur. Per Dominum etc.

In Festo S. Cordis D. N. J. Chr.

Concede, quaesumus, omnipotens Deus, ut
qui in sanctissimo dilecti Filii Tui corde gloriantes,
praecipua in nos caritatis Ejus beneficia recoli-
mus, eorum pariter, et actu delectemur, et fructu.
Per eundem Dominum etc.

Hymnus.

Cor, Arca legem continens
Non servitutis veteris,
Sed gratiæ, sed veniæ,
Sed et misericordiæ.

Cor, Sanctuarium novi
Intemeratum fœderis,
Templum vetusto sanctius,
Velumque scissum utilius.

Te vulneratum Caritas
Ictu patenti voluit:
Amoris invisibilis
Ut veneremur vulnera.

Hoc sub amoris symbolo
Passus cruenta, et mystica,
Utrumque sacrificium
Christus sacerdos obtulit.

Quis non amantem redamet?
Quis non redemptus diligit?
Et corde in isto seligat
Aeterna tabernacula?

Decus Parenti, et Filio,
Sanctoque sit Spiritui,
Quibus potestas, gloria,
Regnumque in omne est sæculum. Amen.

In Festo Sancti Antonii de Padua.

Ecclesiam Tuam, Deus beati Antonii Confessoris Tui solemnitas votiva laetificet: ut spiritualibus semper muniatur auxiliis, et gaudiis perfrui mereatur aeternis. Per Dominum etc.

In Festo Sancti Aloysii Gonzagæ.**Oratio.**

Coelestium donorum Distributor Deus! qui in angelico juvene Aloysio miram vitae innocentiam pari cum poenitentia sociasti: ejus meritis et precibus concede: ut innocentem non secuti, poenitentem imitemur. Per Dominum etc.

In Nativitate Sancti Joannis Baptistæ.

Deus, qui praesentem diem honorabilem nobis in Beati Joannis nativitate fecisti: da populis Tuis spiritualium gratiam gaudiorum, et omnium fidelium mentes dirige in viam salutis aeternae. Per Dominum etc.

In Festo SS. Apostolorum Petri et Pauli.

Deus, qui hodiernam diem Apostolorum Tuorum Petri et Pauli martyrio consecrasti: da Ecclesiae Tuae, eorum in omnibus sequi praeceptum, per quos religionis sumpsit exordium. Per Dominum etc.

Hymnus.

Beate Pastor Petre clemens accipe
 Voces precantum, criminumque vincula
 Verbo resolve, cui potestas tradita,
 Aperire terris cælum, apertum claudere.

Egregie Doctor Paule mores instrue,
 Et nostra tecum pectora in cælum trahe:
 Velata dum meridiem cernat Fides,
 Et Solis instar sola regnet caritas.

Sit Trinitati sempiterna gloria,
 Honor, potestas, atque jubilatio,
 In unitate, quæ gubernat omnia,
 Per universa æternitatis sæcula. Amen.

In Festo Visitationis B. V. Mariæ.**Oratio.**

Famulis Tuis, quaesumus, Domine, coelestis gratiae munus impertire: ut quibus Beatæ Virginis partus extitit salutis exordium, Visitationis ejus votiva solemnitatis, pacis tribuat incrementum. Per Dominum etc.

In Festo Sancti Udalrici.

Deus, qui conspicias, quia ex nulla nostra virtute subsistimus: concede propitius, ut intercessionem Beati Udalrici confessoris Tui atque pontificis contra omnia adversa muniamur. Per Dominum nostrum.

In Festo Sancti Henrici.

Deus, qui hodierna die Beatum Henricum confessorem Tuum, e terreni culmine imperii ad

regnum aeternum transtulisti: Te supplices exoramus, ut sicut illum gratiae Tuae ubertate praeventum, illecebras saeculi superare fecisti: ita nos facias, ejus imitatione, mundi hujus blandimenta vitare, et ad Te puris mentibus pervenire. Per Dominum etc.

In Festo S. Jacobi Apostoli.

Praesta quaesumus, omnipotens Deus: ut intercedente Beato Jacobo Apostolo et Martyre Tuo, et a cunctis adversitatibus liberemur in corpore, et a pravis cogitationibus mundemur in mente. Per Dominum etc.

In Festo Transfigurationis. D. N. J. Chr.

Deus, qui fidei sacramenta in Unigeniti Tui gloriosa Transfiguratione, Patrum testimonio roborasti, et adoptionem filiorum perfectam, voce delapsa in nube lucida, mirabiliter praesignasti: concede propitius, ut ipsius Regis gloriae nos cohaeredes efficias, et ejusdem gloriae tribuas esse consortes. Per Dominum etc.

In Festo Sancti Laurentii.

Da nobis, quaesumus omnipotens Deus, victiorum nostrorum flammam extinguere, qui Beato Laurentio tribuisti tormentorum suorum incendia superare. Per Dominum etc.

**In Festo Assumptionis D. Virginis
Mariæ.****H y m n u s.**

Ave maris stella,
Dei mater alma,
Atque semper Virgo,
Felix cæli porta.

Sumens illud ave
Gabrielis ore
Funda nos in pace,
Mutans Hevæ nomen.

Solve vincla reis,
Profer lumen cæcis,
Mala nostra pelle,
Bona cuncta posce!

Monstra te esse matrem,
Sumat per te preces,
Qui pro nobis natus
Tulit esse tuus.

Virgo singularis,
Inter omnes mitis,
Nos culpis solutos,
Mites fac, et castos.

Vitam præsta puram,
Iter para tutum,
Ut videntes Jesum,
Semper collætémur.

Sit laus Deo Patri,
Summo Christo decus,
Spiritus Sancto
Tribus honor unus. Amen.

O r a t i o.

**Famulorum Tuorum, quaesumus Domine, de-
lictis ignosce; ut qui Tibi placere de actibus**

nostris non valemus, Genitricis Filii Tui, Domini nostri intercessione salvemur. Qui Tecum vivit etc.

In Festo Sancti Bartholomaei.

Omnipotens sempiterne Deus, qui hujus diei venerandam sanctamque lætitiā, in B. Apostoli Tui Bartholomæi festivitate tribuisti: da Ecclesiæ Tuæ, quaesumus, et amare, quod credidit, et prædicare, quod docuit. Per Dominum.

In Festo S. Ludovici.

Deus, qui B. Ludovicum confessorem Tuum, de terreno regno ad coelestis regni gloriam trans-
tulisti: ejus, quaesumus, meritis et intercessione, Regis regum Jesu Christi Filii Tui facias nos esse consortes. Qui Tecum.

Dominica sexta post Pentecosten.

Deus virtutum, cujus est totum, quod est optimum: inserte pectoribus nostris amorem Tui nominis, et præsta in nobis religionis augmentum; ut, quae sunt bona, nutrias; ac pietatis studio, quae sunt nutrita, custodias. Per Dominum.

Dominica septima post Pentecosten.

Deus, cujus providentia in sui dispositione non fallitur: Te supplices exoramus; ut noxia cuncta submoveas, et omnia nobis profutura concedas. Per Dominum.

Dominica octava post Pentecosten.

Largire nobis, quaesumus Domine, semper Spiritum cogitandi quae recta sunt, propitius et agendi: ut qui sine Te esse non possumus, secundum Te vivere valeamus. Per Dominum.

Dominica nona post Pentecosten.

Pateant aures misericordiae Tuae, Domine, precibus supplicantium: et ut petentibus desiderata concedas, fac eos, quae Tibi sunt placita, postulare. Per Dominum.

Dominica X. post Pentecosten.

Deus, qui omnipotentiam Tuam parcendo maxime, et miserando manifestas, multiplica super nos misericordiam Tuam; ut ad Tua promissa currentes coelestium bonorum facias esse consortes. Per Dominum.

Dominica XI. post Pentecosten.

Omnipotens sempiterne Deus, qui abundantia pietatis Tuae et merita supplicum excedis et vota: effunde super nos misericordiam Tuam; ut dimittas, quae conscientia metuit, et adjicias, quod oratio non praesumit. Per Dominum.

Dominica XII. post Pentecosten.

Omnipotens et misericors Deus, de cujus munere venit, ut Tibi a fidelibus Tuis digne et

laudabiliter serviatur: tribue, quaesumus, nobis, ut ad promissiones Tuas sine offensione curramus. Per Dominum.

Dominica XIII. post Pentecosten.

Omnipotens sempiterne Deus, da nobis fidei, spei et caritatis augmentum: et ut mereamur assequi, quod promittis, fac nos amare, quod praecipis. Per Dominum.

Dominica XIV. post Pentecosten.

Custodi Domine, quaesumus, Ecclesiam Tuam propitiatione perpetua: et quia sine Te labitur humana mortalitas: Tuis semper auxiliis et abstrahatur a noxiis, et ad salutaria dirigatur. Per Dominum nostrum.

Dominica XV. post Pentecosten.

Ecclesiam Tuam, Domine, miseratio continuata mundet et muniat: et quia sine Te non potest salva consistere, Tuo semper munere gubernetur. Per Dominum.

Dominica XVI. post Pentecosten.

Tua nos, quaesumus Domine, gratia semper et praeveniat, et sequatur: ac bonis operibus jugiter praestet esse intentos. Per Dominum,

Dominica XVII. post Pentecosten.

Da, quaesumus Domine, populo Tuo diabolica vitare contagia; et Te solum Deum pure mente sectari. Per Dominum.

Dominica XVIII. post Pentecosten.

Dirigat corda nostra, quaesumus Domine. Tuae miserationis operatio: quia Tibi sine Te placere non possumus. Per Dominum.

Dominica XIX. post Pentecosten.

Omnipotens et misericors Deus, universa nobis adversantia propitiatus exclude: ut mento et corpore pariter expediti, quae Tua sunt, liberis mentibus exequamur. Per Dominum.

Dominica XX. post Pentecosten.

Largire, quaesumus Domine, fidelibus Tuis indulgentiam, placatus et pacem: ut pariter ab omnibus mudentur offensis, et segura Tibi mente deserviant. Per Dominum.

Dominica XXI. post Pentecosten.

Familiam Tuam, quaesumus Domine, continua pietate custodi; ut a cunctis adversitatibus Te protegente sit libera, et in bonis actibus Tuo nomini sit devota. Per Dominum.

Dominica XXII. post Pentecosten.

Deus refugium nostrum, et virtus, adesto piis Ecclesiae Tuae precibus auctor ipse pietatis

et praesta; ut quod fideliter petimus, efficaciter consequamur. Per Dominum.

Dominica XXIII. post Pentecosten.

Absolve, quaesumus Domine, Tuorum delicta populorum: ut a peccatorum nexibus, quae pro nostra fragilitate contraximus, Tua benignitate liberemur. Per Dominum.

Dominica XXIV. post Pentecosten.

Excita, quaesumus Domine, Tuorum fidelium voluntates: ut divini operis fructum propensius exequentes, pietatis Tuae remedia majora percipiant. Per Dominum.

In Festo S. S. Angelorum custodum.

Deus, qui ineffabili providentia sanctos Angelos Tuos ad nostram custodiam mittere dignaris: largire supplicibus Tuis, et eorum semper protectione defendi, et aeterna societate gaudere. Per Dominum.

Hymnus de S. Angelo custode.

O! custos mi dulcissime,
Cæcam mentis caliginem
Tuo splendore discute,
Et me divina edoce.
Huc custos igitur pervigil advola,
Ad cæli semitam errantem revoca.

12*

Meas preces, et lacrimas,
Quamvis indignas excipe,
Et summo Patri tradito,
Supplex pœnas avertito.
Afflictum clementissime favore Tuo recrea,
Ad virtutis officia semisopitum excita.

Cum sancto mens in opere
Nutarit, promptus adjuva,
Flagello pigrum excita,
Et reluctantem increpa.

Dissolve mentis glaciem,
Frange cordis duritiem,
Peccati pressum onere
Præsenti manu subleva!

In pugna mortis ultima,
Adsis mihi fortissime,
Ut Tuo sub præsidio
Victor ab hoste redeam.

Deo Patri sit gloria,
Qui quos redemit Filius,
Et sanctus unxit Spiritus,
Per angelos custodiat. Amen.

In Festo Nativitatis B. V. Mariae.

Famulis Tuis, quaesumus Domine, cœlestis gratiae munus impertire: ut quibus B. Virginis partus extitit salutis exordium, Nativitatis ejus votiva solemnitates, pacis tribuat incrementum. Per Dominum etc.

In Festo Ss. Nominis. B. V. Mariae.

Concede, quaesumus omnipotens Deus, ut fideles Tui, qui sub sanctissimae Virginis Mariæ

Nomine, et protectione laetantur: ejus pia intercessionem a cunctis malis liberentur in terris, et ad gaudia aeterna pervenire mereantur in cœlis. Per Dominum etc.

In Festo Exaltationis S. Crucis.

Deus, qui nos hodierna die Exaltationis sanctæ Crucis annua solemnitate lætificas: præsta, quaesumus, ut cujus mysterium in terra cognovimus, ejus redemptionis præmia in coelis mereamur. Per eundem Dominum etc.

In Festo S. Matthæi Apost. et Evangel.

Beati Apostoli et Evangelistæ Matthæi Domine, precibus adjuvemur; ut, quod possibilitas nostra non obtinet, ejus nobis intercessionem donetur. Per Dominum etc.

In Festo Dedicationis S. Michaëlis Archangeli.

Deus, qui miro ordine Angelorum ministeria, hominumque dispensas: concede propitius, ut a quibus Tibi ministrantibus in coelo semper assistitur, ab his in terra vita nostra muniatur. Per Dominum etc.

In Festo S. Hieronymi.

Deus, qui Ecclesiae Tuae in exponendis sacris Scripturis Beatum Hieronymum Confesso-

rem Tuum, Doctorem maximum, providere dignatus es: praesta, quaesumus, ut ejus suffragantibus meritis, quod ore simul et opere docuit, Te adjuvante, exercere valeamus. Per Dom. etc.

In Solemnitate S. S. Rosarii B. V. Mariae.

Deus, cujus Unigenitus, per Vitam, Mortem et Resurrectionem suam, nobis salutis aeternae praemia comparavit: concede, quaesumus, ut haec mysteria sanctissimo Beatae Mariae Virginis Rosario recolentes, et imitemur, quod continent, et quod promittunt, assequamur. Per eundem.

In Festo S. Francisci d' Assisi.

Deus, qui Ecclesiam Tuam Beati Francisci meritis, foetu novae prolis amplificas: tribue nobis ex ejus imitatione terrena despicere, et coelestium donorum semper participatione gaudere. Per Dominum etc.

In Festo Ss. Apost. Simonis et Judae.

Deus, qui nos per Beatos Apostolos Tuos Simonem et Judam ad agnitionem Tui nominis venire tribuisti: da nobis eorum gloriam sempiternam, et proficiendo celebrare, et celebrando proficere. Per Dominum etc.

In Feste omnium Sanctorum.

Omnipotens sempiterne Deus, qui nos omnium Sanctorum Tuorum merita sub una tribuisti celebritati venerari: quaesumus, ut desideratam nobis Tuae propitiationis abundantiam, multiplicatis intercessoribus largiaris. Per Dominum etc.

In Commemoratione omnium Fidelium defunctorum.

Fidelium Deus omnium Conditor et redemptor, animabus famulorum famularumque Tuarum remissionem cunctorum tribue peccatorum: ut indulgentiam, quam semper optaverunt, piis supplicationibus consequantur. Qui vivis etc.

Deus, veniae Largitor, et humanae salutis Amator: quaesumus clementiam Tuam, ut nostrae congregationis fratres, propinquos et benefactores, qui ex hoc saeculo transierunt, Beata Maria semper Virgine intercedente cum omnibus Sanctis Tuis, ad perpetuae Beatitudinis consortium pervenire concedas. Qui vivis et regnas etc.

In Feste S. Caroli.

Ecclesiam Tuam Domine, Sancti Caroli confessoris Tui atque Pontificis continua protectione custodi: ut sicut illum pastoralis sollicitudo gloriosum reddidit, ita nos ejus intercessio in Tuo semper faciat amore ferventes. Per Dominum etc.

In Festo S. Martini.

Deus, qui conspicias, quia ex nulla nostra virtute subsistimus; concede propitius: ut intercessione B. Martini Confessoris Tui atque Pontificis, contra omnia adversa muniamur. Per Dominum etc.

In Festo S. Stanislai Kostcae.

Deus, qui inter caetera sapientiae Tuae miracula etiam in tenera aetate maturae Sanctitatis gratiam contulisti: da quaesumus, ut Beati Stanislai exemplo tempus instanter operando redimentes, in aeternam ingredi requiem festinemus. Per Dominum etc.

In Festo S. Caeciliae.

Deus, qui nos annua Beatae Caeciliae Virginis et martyris Tuae solemnitate laetificas; da, ut quam veneramur officio, etiam pia conversationis sequamur exemplo. Per Dominum etc.

In Festo Praesentationis B. V. Mariae.

Deus, qui Beatam Mariam semper Virginem, Spiritus Sancti habitaculum, hodierna die in templo praesentari voluisti: praesta, quaesumus, ut ejus intercessione, in templo gloriae Tuae praesentari mereamur. Per Dominum etc.

In Festo S. Andreae Apostli.

Majestatem Tuam, Domine suppliciter exoramus, ut sicut Ecclesiae Tuæ Beatus Andreas Apostolus extitit prædicator et rector, ita apud Te sit pro nobis perpetuus intercessor. Per Dominum etc.

Orationes Diversæ.

Actus Fidel.

Domine Deus! firma fide credo et profiteor omnia et singula, quæ sancta Ecclesia catholica credenda proponit: quia tu Deus ea omnia revelasti, qui es æterna veritas et sapientia, quæ nec fallere nec falli potest. In hac fide vivere et mori statuo.

Actus Spel.

Domine Deus! spero, per gratiam tuam remissionem omnium peccatorum, et post hanc vitam, æternam felicitatem me esse consecuturum: quia tu promisisti, qui es infinite potens, fidelis, benignus et misericors. In hac spevivere et mori statuo.

Actus Caritatis.

Domine Deus! amo te super omnia (et proximum meum propter te): quia tu es summum, infinitum et

perfectissimum Bonum, omni dilectione dignum. In hac caritate vivere et mori statuo.

Actus Contritionis.

Domine Deus! pœnitet me ex toto corde meo, quod te, summum ac infinitum Bonum, a me super omnia dilectum, unquam offenderim. Detestor omne peccatum, et firmiter propono, vitam meam emendare, et te non amplius offendere.

Actus Oblationis.

Domine Deus! offero tibi omnia verba, cogitationes et opera ad majorem tui gloriam, in unione passionis ac mortis Jesu Christi Redemptoris mei.

Pro Ecclesia.

Dirige Domine, quæsumus, Ecclesiam tuam dispensatione cœlesti: ut, quæ ante mundi principium in tua semper est præsentia præparata, usque ad plenitudinem gloriamque promissam te moderante perveniat.

Pro Papa.

Da, quæsumus. Domine, famulo tuo N., quem pascendis agnis et ovibus tuis præfecisti, Spiritum consilii et fortitudinis, Spiritum scientiæ, et pietatis: ut sub tanto Pontifice crescat devotio sancta fidelium, et salus Ecclesiæ gaudium sit et corona Pastoris.

Pro Diœcesi.

Ecclesiam tuam, Domine, sub sancti N. (sanctorum N. et N.) patrocinio supplicantem paterna pietate custodi: ut cujus (quorum) prædicatione plantata

est et sudore (ac sanguine) irrigata, ejus (eorum) precibus crescat semper in cognitione et amore Domini nostri Jesu Christi.

Pro Antistite Diœceseos.

Deus, qui famuli tui N. humeris onus imposuisti ipsis angelicis spiritibus formidandum: da ei robur majoris auxilii, ut pondus illud ad consummationem sanctorum et in ædificationem corporis Christi valeat te adjuvante sustinere.

Pro Sacerdotibus.

Deus, qui Unigenitum tuum dedisti summum Sacerdotem, eique ad sacrificandum tibi hostiam mundam Sacerdotes ministros sociasti: quæsumus, ut omnes, qui vocatione tam sancta dignati sunt. Altari tuo devote ministrent, et se ipsos hostiam vivam et sanctam offerre mereantur.

Pro Omni Gradu Ecclesiæ.

Exaudi nos, Deus humiliter deprecantes: ut, diffusa in singulos Ordines gratia tua, suum quisque ministerium fideliter adimpleat, et Ecclesia tua in omnium oculis gloriosa semper appareat.

Pro Rege.

Deus, qui facis mirabilia magna solus: prætende super famulum tuum N. Regem nostrum, ac super totam Domum regiam omnesque provincias ipsi commissas, spiritum gratiæ tuæ salutaris; et ut in veritate tibi complaceat, ei rorem benedictionis tuæ clementer infunde.

Pro Patria.

Omnipotens sempiterne Deus, qui regnis omnibus æterna potestate dominaris: respice ad nostram benignus patriam, ut Rex juste imperando, et populus fideliter obediendo, ad gloriam tui nominis et regni tranquillitatem unanimi pietate conspirent.

Pro Regni Hærede.

Famulum tuum N., quæsumus Domine, cœlesti pietate proseguere: ut, paterno succedens imperio, Ecclesiæ protector, legum vindex, et populi pater appellari mereatur.

Pro Domicilio et Incolis Ejus.

Custodi, quæsumus Domine, intercedente beata Maria semper Virgine cum omnibus Sanctis, locum istum et habitatores ejus, ac perpetuo gubernamoderamine: ut et necessaria percipiant mortalis vitæ solatia, et proficiant ad immortalitatis effectum.

Pro Amicis.

Concede, quæsumus Domine, famulis tuis, quibus dedisti in nos caritatem, indulgentiam peccatorum, consolationem vitæ, gubernationemque perpetuam: qua tibi fideliter servientes, ad tuam jugiter misericordiam pervenire mereantur.

Pro Inimicis.

Deus, qui nobis præcepisti pro inimicis orare: dimitte, quæsumus, peccantibus in nos peccata sua, ut, tibi reconciliati, vera pace et caritate hic et in æternum perfui mereantur.

In Quacumque Necessitate.

Da, quæsumus Domine, populo tuo et mentem, qua tibi devotus existat, et intellectum, quo justa deprecatur, et propitiationem tuam, qua pie desiderantibus, quæ sunt profutura, concedas.

Tempore Pestis (Et Famis).

Da nobis, quæsumus Domine, piæ supplicationis effectum, et pestem (ac famem) propitiatus averte: ut mortalium corda cognoscant, et te indignante talia flagella prodire, et te miserante cessare.

Tempore Belli.

Deus, qui conteris bella, et impugnatores in te sperantium potentia tuæ defensionis expugnas: auxiliare famulis tuis implorantibus misericordiam tuam; ut inimicorum suorum feritate depressa, incessabili te gratiarum actione laudemus.

Pro Pace Obtinenda.

Deus, a quo sancta desideria, recta consilia, et justa sunt opera: da servis tuis illam, quam mundus dare non potest, pacem; ut et corda nostra mandatis tuis dedita, et hostium sublata formidine, tempora sint tua protectione tranquilla.

Pro Tentatis et Tribulatis.

Deus, qui justificas impium, et non vis mortem peccatoris, majestatem tuam suppliciter deprecamur: ut famulos tuos, de tua misericordia confidentes, cælesti protegas benignus auxilio, et assidua protectione conserves; ut tibi jugiter famulentur, et nullis tentationibus a te separentur.

Pro Infirmis.

Omnipotens sempiterne Deus, salus æterna credentium: exaudi nos pro famulis tuis infirmis, pro quibus misericordiæ tuæ imploramus auxilium; ut reddita sibi sanitate, gratiarum tibi in Ecclesia tua referant actiones.

Pro Infirmo Morti Proximo.

Omnipotens et misericors Deus, qui humano generi et salutis remedia, et vitæ æternæ munera contulisti: respice propitius famulum tuum infirmitate corporis laborantem, et animam refove, quam creasti; ut in hora exitus illius absque peccati macula tibi Creatori suo per manus sanctorum Angelorum repræsentari mereatur.

Pro Fide Augenda.

Deus veritas et lux sempiterna, qui fidem constituisti salutis humanæ principium et omnis justitiæ fundamentum: illumina per Spiritum tuum, et confirma corda nostra; ut credentes verbo tuo, et quod credimus confidentes, reportemus finem fidei nostræ, salutem animarum.

Pro Spe Impetranda.

Consolator in te sperantium, Deus: infunde cordibus nostris christianæ spei donum, qua omnia de tua misericordia expectantes, salutem nostram cum humili fiducia incessanter operemur.

Ad Postulandam Caritatem.

Deus, qui diligentibus te facis cuncta prodesse: da cordibus nostris inviolabilem tuæ caritatis affe-

ctum; ut desideria, de tua inspiratione concepta, nulla possint tentatione mutari.

Ad Postulandam Contritionem.

Omnipotens et mitissime Deus, qui sitiienti populo fontem viventis aquæ de petra produxisti: educ de cordis nostri duritia lacrymas compunctionis; ut peccata nostra plangere valeamus, remissionemque eorum te miserante mereamur accipere.

Ad Postulandam Humilitatem.

Deus, qui superbis resistis, et gratiam præstas humilibus: concede nobis veræ humilitatis virtutem, cujus in se formam fidelibus Unigenitus tuus exhibuit; ut nunquam indignationem tuam provocemus elati, sed potius gratiæ tuæ capiamus dona subjecti.

Ad Postulandam Continentiam.

Concede nobis Domine, salutaris continentiae donum: et castificatis animabus nostris, corpora quoque sanctifica, quæ membra Christi sunt et templum Spiritus sancti.

Ad Postulandam Patientiam.

Domine Jesu, qui patientia tua nos docuisti et a pœna liberasti: da nobis, quæsumus, donum patientiæ in laboribus hujus vitæ, sine quo non potest custodiri spes futuræ.

Pro Felici Morte.

Deus, qui nos salutarī providentiā, ut a mortifero sopore excitareris, diem et horam mortis nescire voluisti: concede nobis ita vigilare et orare, omni tempore, ut absque peccati macula de hoc mundo exire, et in sinu misericordiæ tuæ requiescere mereamur.

Pro Vivis Et Defunctis.

Omnipotens sempiterne Deus, qui vivorum dominaris simul et mortuorum, omniumque misereris, quos tuos fide et opere futuros esse prænoscis: te supplices exoramus, ut, pro quibus effundere preces decrevimus, quosque vel præsens sæculum adhuc in carne retinet, vel futurum jam exutos corpore suscepit, intercedentibus omnibus Sanctis tuis pietatis tuæ clementia omnium delictorum suorum veniam consequantur. Per Christum Dominum nostrum. Amen.

Oratio pro felici morte.

O Domine Jesu Christe, cum statutum sit omnibus hominibus semel mori, et cum ex mortis momento pendeat tota aeternitatis causa: rogo Te, ut beatæ mortis curæ viriliter studeam, ne, heu! in æternum peream pessima et irreparabili peccatorum morte.

O Bone Jesu, qui dixisti: Vigilate, quia nescitis diem neque horam: libera me a subitanea et improvisa morte. Quapropter rogo Te, ut, de mortis adventu incertus, mature domui meae disponam, et moriar quotidie exemplo Apostoli, ut ad mortem semper paratus possim in prima, secunda aut tertia vigilia, ac singulis momentis mori, Te propitio, morte justorum.

O Bone Jesu, qui nobis præcipis, ut tanquam advenæ et peregrini abstineamus a carnalibus desideriis, et ut utamur hoc mundo tanquam non utentes, quia præterit figura hujus mundi: rogo Te, ut, non habens hic manentem civitatem futuram tanto arden-

tius inquiram, et ut, relictis omnibus saltem corde et animo, antequam moriar, liberius et avidius cupiam dissolvi et esse Tecum.

O Bone Jesu, qui es veritas et bonitas et protector vitæ meæ: da mihi, præsertim in hora mortis, fidei, spei et caritatis augmentum; ut, firmiter credens, securius sperans, et ardentius amans, merear propter nimiam caritatem Tuam assequi, quod promittis.

O Bone Jesu, qui cor contritum et humiliatum nunquam despicias, et qui sanas contritos corde; rogo Te, ut per totam vitam, et præcipue in hora mortis, recogitem Tibi et propter Te omnes annos meos in amaritudine animæ; et ut remittas mihi peccata mea multa et magna, et laves me, ut super nivem dealber. Tunc mundus corde, dimittar in pace, et Te videbo in gloria; et interim dicam semper: Confitemini Domino, quoniam bonus, quoniam in sæculum misericordia Ejus!

O Bone Jesu, qui instituisti Sacramenta, ut per illa omnis vera justitia vel incipiat, vel incepta augeatur, vel amissa recuperetur: concede mihi spatium digne suscipiendi ante horam mortis Sacramentum Pœnitentiæ, Eucharistiæ et extremæ Unctionis, ut, hauriens in gaudio de his fontibus Tuis aquam salientem in vitam æternam, gustem in cœlo illa gaudia plena, quorum pignus in his Sacramentis nobis, misericors et miserator Domine, reliquisti.

O Bone Jesu, qui potestatem habens ponendi animam Tuam et iterum sumendi eam, factus tamen es obediens usque ad mortem, mortem autem crucis; concede mihi gratiam, ut aspiciens in Te auctorem

fidei et consummatorem voluntarie sacrificem Tibi vitam meam, et dicam semper: Magnificeris, o Jesu Christe, in corpore meo, sive per vitam, sive per mortem; non mea voluntas, sed Tua semper fiat!

O Bone Jesu, per illum zelum, quo languores nostros Tuo livore sanasti; per angustias cordis Tui, cum Te a Patre derelictum clamasti; per agonias, quas in hora mortis sustinuisti; miserere animae meae in egressu suo, et perduc eam in vitam aeternam. Amen.

Litaniæ de Venerabili Sacramento.

Kyrie eleison. Christe eleison. Kyrie eleison.

Christe audi nos. Christe exaudi nos.

Pater de cœlis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Panis vivus, qui de cœlo descendisti,

Deus absconditus et Salvator,

Frumentum electorum,

Vinum germinans virgines,

Panis pinguis et deliciæ regum,

Juge Sacrificium,

Oblatio munda,

Agnus absque macula,

Mensa purissima,

Angelorum esca,

Manna absconditum,

Memoria mirabilium Dei,

Panis supersubstantialis,

Miserere nobis.

Verbum caro factum,
 Habitans in nobis,
 Hostia sancta,
 Calix benedictionis,
 Mysterium fidei,
 Præcelsum et venerabile Sacramentum,
 Sacrificium omnium sanctissimum,
 Vere propitiatorium pro vivis et defunctis,
 Cæleste antidotum, quo a peccatis præservamur,
 Stupendum supra omnia miraculum,
 Sacratissima Dominicæ Passionis commemoratio,
 Donum transcendens omnem plenitudinem,
 Memoriale præcipuum divini amoris,
 Divinæ affluentia Largitatis,
 Sacrosanctum et augustissimum mysterium,
 Pharmacum immortalitatis,
 Tremendum ac vivificum Sacramentum,
 Panis omnipotentia Verbi caro factus,
 Incruentum Sacrificium,
 Cibus et conviva,
 Dulcissimum convivium, cui assistunt Angeli
 ministrantes,
 Sacramentum pietatis,
 Vinculum caritatis,
 Offerens et oblatio,
 Spiritualis dulcedo in proprio fonte degustata,
 Refectio animarum Sanctarum,
 Viaticum in Domino morientium,
 Pignus futuræ gloriæ,
 Propitius esto, Parce nobis Domine.
 Propitius esto, Exaudi nos Domine.
 Ab indigna Corporis et Sanguinis tui susceptione,
 Libera nos Domine.
 A concupiscentia carnis,
 A concupiscentia oculorum,
 A superbia vitæ,
 Ab omni peccandi occasione,
 Per desiderium illud, quo hoc Pascha cum disci-
 pulis manducare desiderasti,

Miserere nobis.

Libera nos Domine.

Per summam humilitatem, qua discipulorum pedes lavasti,
 Per ardentissimam caritatem, qua hoc divinum Sacramentum instituisti,
 Per Sanguinem tuum pretiosum, quem nobis in Altari reliquisti,
 Per quinque Vulnera hujus tui Corporis sacratissimi, quæ pro nobis suscepisti;
 Peccatores, Te rogamus audi nos.

Libera nos Domine.

Ut nobis parcas,
 Ut nobis indulgeas,
 Ut nobis fidem, reverentiam et devotionem hujus admirabilis Sacramenti augere et conservare digneris,

Te rogamus audi nos.

Ut ad frequentem usum Eucharistiæ per veram peccatorum confessionem nos perducere digneris,

Ut nos ab omni hæresi, perfidia, ac cordis cæcitate liberare digneris,

Ut sanctissimi hujus Sacramenti pretiosos et coelestes fructus nobis impertiri digneris,

Ut in hora mortis nostræ hoc coelesti viatico nos confortare et munire digneris,

Ut nos exaudire digneris,

Fili Dei,

Agnus Dei, qui tollis peccata mundi, Parce nobis Domine,

Agnus Dei, qui tollis peccata mundi, Exaudi nos Domine.

Agnus Dei, qui tollis peccata mundi, Miserere nobis.

Christe audi nos. Christe exaudi nos.

Kyrie eleison. Christe eleison. Kyrie eleison.

Pater noster.

V. Et ne nos inducas in tentationem.

R. Sed libera nos a malo.

V. Domine exaudi orationem meam.

R. Et clamor meus ad te veniat.

O r e m u s.

Deus, qui nobis sub Sacramento mirabili passionis tuæ memoriam reliquisti: tribue quæsumus, ita

nos Corporis et Sanguinis tui sacra mysteria venerari,
 ut Redemptionis tuæ fructum in nobis jugiter sentiamus.
 Qui vivis et regnas in sæcula sæculorum. Amen.

Litanie de SS. Nomine Jesu.

Kyrie eleison. Christe eleison. Kyrie eleison.

Christe audi nos. Christe exaudi nos.

Pater de cœlis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Jesu Fili Dei vivi,

Jesu Fili David,

Jesu Fili Mariæ Virginis,

Jesu sanctissime,

Jesu potentissime,

Jesu fortissime,

Jesu perfectissime,

Jesu gloriosissime,

Jesu mirifice,

Jesu jucundissime,

Jesu carissime,

Jesu clarior sole,

Jesu pulchrior luna,

Jesu splendidior stellis,

Jesu admirabilis,

Jesu delectabilis,

Jesu honorabilis,

Jesu humillime,

Jesu pauperrime,

Jesu mitissime,

Jesu patientissime,

Jesu obedientissime,

Jesu castissime,

Jesu amator castitatis,

Jesu amator pacis,

Jesu amor noster,

Miserere nobis.

Jesu speculum vite,
 Jesu exemplar virtutum,
 Jesu decus morum,
 Jesu zelator animarum,
 Jesu refugium nostrum,
 Jesu pater pauperum,
 Jesu consolatio afflictorum,
 Jesu thesaurus fidelium,
 Jesu gemma pretiosa,
 Jesu armarium perfectionis,
 Jesu bone Pastor ovium,
 Jesu stella maris,
 Jesu Lux vera,
 Jesu Sapientia æterna,
 Jesu Bonitas infinita,
 Jesu gaudium Angelorum,
 Jesu rex Patriarcharum,
 Jesu inspirator Prophetarum,
 Jesu magister Apostolorum,
 Jesu doctor Evangelistarum,
 Jesu fortitudo Martyrum,
 Jesu lumen Confessorum,
 Jesu sponse Virginum,
 Jesu corona Sanctorum omnium,
 Propitius esto, Parce nobis Jesu.
 Propitius esto, Exaudi nos Jesu.
 Ab omni malo, Libera nos Jesu.

Miserere nobis.

Ab omni peccato,
 Ab ira tua,
 Ab insidiis diaboli,
 A peste, fame et bello,
 A transgressione mandatorum tuorum,
 Ab incursu omnium malorum,
 Per Incarnationem tuam,
 Per Adventum tuum,
 Per Nativitatem tuam,
 Per Circumcisionem tuam,
 Per Dolores tuos,
 Per Flagella tua,

Libera nos Jesu.

Per Mortem tuam,
 Per Resurrectionem tuam,
 Per Ascensionem tuam,
 Per Gaudia tua,
 Per Gloriam tuam,
 Per dulcissimam Virginem Matrem tuam,
 Per intercessionem omnium Sanctorum tuorum,
 Agnus Dei, qui tollis peccata mundi, Parce nobis
 Jesu.

Libera nos Jesu.

Agnus Dei, qui tollis peccata mundi, Exaudi nos Jesu.
 Agnus Dei, qui tollis peccata mundi, Miserere nobis.
 Jesu Christe audi nos.

Jesu Christe exaudi nos.

Kyrie eleison. Christe eleison. Kyrie eleison.

Pater noster.

V. Et ne nos inducas in tentationem.

R. Sed libera nos a malo.

V. Benedic anima mea Domino.

R. Et omnia, quæ intra me sunt, Nomini sancto ejus.

V. Sit Nomen Domini benedictum.

R. Ex hoc, nunc, et usque in sæculum.

V. Adjutorium nostrum in Nomine Domini.

R. Qui fecit cælum et terram.

V. Domine exaudi orationem meam.

R. Et clamor meus ad te veniat.

O r e m u s.

Deus, qui gloriosissimum Nomen Jesu Christi
 Filii tui Domini nostri fidelibus tuis summo suavita-
 tis affectu fecisti amabile, et malignis spiritibus tre-
 mendum atque terribile: concede propitius, ut omnes,
 qui hoc Nomen Jesu devote venerantur in terris,
 sanctæ consolationis dulcedinem in præsentī perci-
 piant, et in futuro gaudium exultationis et intermina-
 bilis beatitudinis obtineant in cœlis. Per eundem
 Dominum nostrum Jesum Christum Filium tuum, qui
 tecum vivit et regnat in unitate Spiritus sancti Deus,
 per omnia sæcula sæculorum. **R.** Amen.

Litaniæ de Passione Domini.

Kyrie eleison. Christe eleison. Kyrie eleison.
 Christe audi nos. Christe exaudi nos.
 Pater de cœlis Deus, Miserere nobis.
 Fili Redemptor mundi Deus, Miserere nobis.
 Spiritus sancte Deus, Miserere nobis.
 Jesu rex mitis Jerusalem ingresse,
 Jesu triginta argenteis vendite,
 Jesu ad lavandos Discipulorum pedes inclinate,
 Jesu Pascha cum Discipulis manducans,
 Jesu Corpus tuum in cibum et Sanguinem in
 potum largite,
 Jesu in oratione prostrate,
 Jesu in agonia sanguineo sudore perfuse,
 Jesu ab angelo confortate,
 Jesu osculo a Juda tradite,
 Jesu a ministris ligate,
 Jesu a Discipulis derelictæ,
 Jesu Annæ et Caiphæ præsentate,
 Jesu alapa a ministro percusse,
 Jesu a falsis testibus accusate,
 Jesu te Christum Filium Dei confesse,
 Jesu reus mortis judicate,
 Jesu in faciem conspue,
 Jesu oculis velate,
 Jesu colaphis cæse,
 Jesu a Petro ter negate,
 Jesu vinctus Pilato tradite,
 Jesu ab Herode sprete et illuse,
 Jesu veste alba indute,
 Jesu Barrabbæ postposite,
 Jesu flagellis cæse,
 Jesu propter scelera nostra attrite,
 Jesu quasi leprosus putate,
 Jesu veste purpurea indute,
 Jesu spinis coronate,
 Jesu arundine pro sceptro donate,
 Jesu arundine percusse,

Miserere nobis.

Jesu a Judeis ad crucem postulate,
 Jesu morte turpissima condemnate,
 Jesu voluntati Judæorum tradite,
 Jesu crucis pondere gravate,
 Jesu tanquam ovis ad occisionem ducte,
 Jesu vestibus exute,
 Jesu clavīs in cruce confixe,
 Jesu propter iniquitates nostras vulnerate,
 Jesu pro inimicis Patrem deprecate,
 Jesu cum iniquis reputate,
 Jesu opprobrium hominum facte,
 Jesu a prætereuntibus blasphemate,
 Jesu a Judæis derise,
 Jesu a militibus in cruce illuse,
 Jesu a latrone convitiis lacessite,
 Jesu latroni pœnitenti Paradisum pollicite,
 Jesu Joannem Matri tuæ in filium commendans,
 Jesu te a Patre derelictum attestate,
 Jesu felle et aceto in siti potate,
 Jesu omnia de te scripta consummans,
 Jesu spiritum tuum in manus Patris commendans,
 Jesu usque ad mortem crucis obediens facte,
 Jesu lancea transfixe,
 Jesu propitatio nobis facte,
 Propitius esto, Parce nobis Jesu.
 Propitius esto, Exaudi nos Jesu.
 Ab omni malo, Libera nos Jesu.

Miserere nobis.

Ab omni peccato,
 Ab insidiis diaboli,
 Ab ira et odio et omni mala voluntate,
 A peste, fame et bello,
 A cunctis mentis et corporis periculis,
 A morte perpetua,
 Per agoniam et sanguineum sudorem tuum,
 Per flagellationem et coronationem tuam,
 Per crucem et Passionem tuam,
 Per sitim, lacrymas et nuditatem tuam,
 Per sacratissima quinque vulnera tua,
 Per mortem et sepulturam tuam,

Libera nos Jesu.

Peccatores, Te rogamus audi nos.
 Ut peccatis mortui, justitiæ vivamus,
 Ut gloriari nobis non libeat, nisi in Cruce Do-
 mini nostri Jesu Christi,
 Ut amore tui mundus nobis crucifixus sit, et
 nos mundo.
 Ut crucis mortificationem jugiter in corpore nostro
 circumferamus.
 Ut carnem nostram cum vitiis et concupiscentiis
 suis crucifigere studeamus,
 Ut te passo in carne, et nos eadem cogitatione
 armemur,
 Ut crucem nostram quotidie tollere, et te sequi
 valeamus,
 Ut quæ nobis lucra sunt, propter te detrimenta
 arbitremur,
 Ut te Jesum crucifixum scire ante omnia studeamus,
 Ut Sanguis tuus emundet nos ab operibus mor-
 tuis ad serviendum Deo viventi,
 Ut emti pretio magno glorificemus Deum in cor-
 pore nostro,
 Ut mortui peccato et consepulti, deinceps tecum
 in novitate vitæ ambulemus;
 Ut semel emundati ab operibus mortuis rursum
 te Filium Dei crucifigere et ostentui habere
 caveamus,
 Ut ad relictum a te nobis exemplum intuentes,
 sequamur vestigia tua,
 Ut sicut socii passionum sumus, ita simus et
 consolationis,

Te rogamus audi nos.

Fili Dei,

Agnus Dei, qui tollis peccata mundi, Parce nobis Jesu.

Agnus Dei, qui tollis peccata mundi, Exaudi nos Jesu.

Agnus Dei, qui tollis peccata mundi, Miserere nobis.

Christe audi nos. Christe exaudi nos.

Kyrie eleison. Christe eleison. Kyrie eleison.

V. Christus factus est pro nobis obediens usque
ad mortem.

R. Mortem autem crucis.

O r e m u s.

Deus, qui pro redemptione mundi voluisti nasci, circumcidi, a Judæis reprobari, a Juda osculo tradi, vinculis alligari, sicut agnus innocens ad victimam duci, atque conspectibus Annæ, Caiphæ, Pilati et Herodis indecenter offerri, a falsis testibus accusari, flagellis et colaphis cædi, opprobriis vexari, conspui, spinis coronari, arundine percuti, facie velari, vestibus spoliari, cruci clavis affigi, inter latrones reputari, felle et aceto potari: tu Domine, per has sanctissimas pœnas tuas, quas ego indignus recolo, et per sanctissimam Crucem et Mortem tuam, libera me a pœnis inferni, et perducere digneris, quo perduxisti latronem tecum crucifixum. Qui vivis et regnas cum Deo Patre in unitate Spiritus sancti Deus, per omnia sæcula sæculorum.

R. Amen.

Litanie in Honorem B. V. Mariæ.

Kyrie eleison. Christe eleison. Kyrie eleison.

Christe audi nos. Christe exaudi nos.

Pater de cœlis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Sancta Maria, Ora pro nobis.

Sancta Dei Genitrix,

Sancta Virgo Virginum,

Virgo Patribus promissa,

Virgo Prophetarum oraculis prænunciata,

Virgo genita ex stirpe David,

Virgo justo Joseph desponsata,

Virgo cujus humilitatem respexit Deus,

Virgo ab Angelo salutata,

Virgo gratia plena,

Virgo benedicta in mulieribus,

Virgo ancillam Domini te confessa,

} Ora pro nobis.

Virgo Altissimi virtute obumbrata,
 Virgo concipiens de Spiritu sancto,
 Virgo pariens Emmanuel,
 S. Maria, de qua natus est Jesus, qui vocatur
 Christus,
 S. Maria, a pastoribus et Magis visitata,
 S. Maria, legi purificationis sponte subdita,
 S. Maria, in Aegyptum cum Filio et Sponso
 profuga,
 S. Maria, ex Aegypto in terram Israel reversa,
 S. Maria, cum Jesu puero Jerusalem ascendens,
 S. Maria, Filium in dolore triduo quærens,
 S. Maria, Filium in templo cum gaudio inveniens,
 S. Maria, cui subditus erat Jesus,
 S. Maria, ad cujus preces Dominus fecit initium
 signorum,
 S. Maria, stans juxta crucem Filii morientis,
 S. Maria, dilecto Discipulo qua mater commendata,
 S. Maria, in passione Filii doloris gladio trans-
 fixa,
 S. Maria, in ejus gloriosa resurrectione summo
 gaudio affecta,
 S. Maria, in die Pentecostes Spiritu sancto repleta,
 S. Maria, in cælum assumpta,
 S. Maria, in cælo coronata,
 Tu gloria Jerusalem,
 Tu lætitia Israel,
 Tu quam beatam dicent omnes generationes,
 Agnus Dei, qui tollis peccata mundi, Parce nobis
 Domine.
 Agnus Dei, qui tollis peccata mundi, Exaudi nos
 Domine.
 Agnus Dei, qui tollis peccata mundi, Miserere nobis.
 Christe audi nos. Christe exaudi nos.
 Kyrie eleison. Christe eleison. Kyrie eleison.
 Ave Maria.
V. Ora pro nobis sancta Dei Genitrix.
R. Ut digni efficiamur promissionibus Christi.

Ora pro nobis.

O r e m u s.

Domine Jesu, qui sanctissimam Matrem tuam super omnes creaturas in gloria sublimatam nobis insignem apud te Advocatam constituisti: concede, ut, cujus gloriamur patrocínio, virtutes quoque imitemur. Qui vivis et regnas in sæcula sæculorum.

R. Amen.

Litanie Lauretanæ.

Kyrie eleison. Christe eleison. Kyrie eleison.

Christe audi nos. Christe exaudi nos.

Pater de cœlis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Sancta Maria, Ora pro nobis.

Sancta Dei Genitrix,

Sancta Virgo virginum,

Mater Christi,

Mater divinæ gratiæ,

Mater purissima,

Mater castissima,

Mater inviolata,

Mater intemerata,

Mater amabilis,

Mater admirabilis,

Mater Creatoris,

Mater Salvatoris,

Virgo prudentissima,

Virgo veneranda,

Virgo prædicanda,

Virgo potens,

Virgo clemens,

Virgo fidelis,

Speculum justitiæ,

Sedes sapientiæ.

Causa nostræ lætitiæ;

Ora pro nobis.

Vas spirituale,
 Vas honorabile,
 Vas insigne devotionis,
 Rosa mystica,
 Turris Davidica,
 Turris eburnea,
 Domus aurea,
 Fœderis arca,
 Janua cœli,
 Stella matutina,
 Salus infirmorum,
 Refugium peccatorum,
 Consolatrix afflictorum,
 Auxilium Christianorum,
 Regina Angelorum,
 Regina Patriarcharum,
 Regina Prophetarum,
 Regina Apostolorum,
 Regina Martyrum,
 Regina Confessorum,
 Regina Virginum,
 Regina Sanctorum omnium.

Oro pro nobis.

Agnus Dei, qui tollis peccata mundi, Parce nobis Domine.

Agnus Dei, qui tollis peccata mundi, Exaudi nos Domine.

Agnus Dei, qui tollis peccata mundi, Miserere nobis. Christe audi nos. Christe exaudi nos.

Kyrie eleison. Christe eleison. Kyrie eleison.

Ave Maria.

Sub tuum præsidium confugimus, sancta Dei Genitrix: nostras deprecationes ne despicias in necessitatibus nostris, sed a periculis cunctis libera nos, semper Virgo gloriosa et benedicta. Domina nostra, Mediatrix nostra, Advocata nostra: tuo Filio nos reconcilia, tuo Filio nos commenda, tuo Filio nos repræsentâ.

V. Ora pro nobis, sancta Dei Genitrix.

R. Ut digni efficiamur promissionibus Christi.

O r e m u s.

Gratiam tuam, quæsumus Domine, mentibus nostris infunde: ut, qui Angelo nuntiante Christi Filii tui Incarnationem cognovimus, per Passionem ejus et Crucem ad Resurrectionis gloriam perducamur. Per eundem Christum Dominum nostrum.

R. Amen.

V. Ora pro nobis, beatissime Joseph.

R. Ut digni efficiamur promissionibus Christi.

O r e m u s.

Sanctissimæ Genitricis tuæ Sponsi, quæsumus Domine, meritis adjuvemur: ut, quod possibilitas nostra non obtinet, ejus nobis intercessione donetur. Qui vivis et regnas Deus in sæcula sæculorum.

R. Amen.

1. Ave Maria. — O Domina mea, sancta Maria! sicut Deus Pater per omnipotentiam suam te potentissimam efficit: ita mihi, quæso, adsis nunc et in hora mortis meæ, expellendo a me omnem contrariam potestatem.

2. Ave Maria. — O Domina mea, sancta Maria! sicut Filius Dei tanta te sui cognitione et claritate illustrare dignatus est, ut totum cælum illuminares: ita nunc et in hora mortis meæ animam meam cognitione fidei sic illustres et corroborea, ut nullo errore aut ignorantia pervertatur.

3. Ave Maria. — O Domina mea, sancta Maria! sicut Spiritus sanctus suum amorem tibi plene infudit ita nunc et in hora mortis meæ dulcedinem amoris divini mihi instilla, ex quo omnis amaritudo mihi reddatur suavissima.

O sancta Maria! sicut sacratissima Trinitas purissimum spiritum tuum ex hoc mundo exeuntem eum gaudio totius Curie cœlestis excepit: ita etiam tua intercessione suscipiat animam meam Pater qui eam creavit, Filius qui eam redemit, Spiritus sanctus qui eam sanctificavit. Amen.

Litaniæ de omnibus Sanctis.

Kyrie eleison. Christe eleison. Kyrie eleison.

Christe audi nos. Christe exaudi nos.

Pater de cœlis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Sancta Maria, Ora pro nobis.

Sancta Dei Genitrix, Ora pro nobis.

Sancta Virgo Virginum, Ora pro nobis.

Sancte Michael, Ora pro nobis.

Sancte Gabriel, Ora pro nobis.

Sancte Raphael, Ora pro nobis.

Omnes sancti Angeli et Archangeli, Orate pro nobis.

- **Omnes sancti beatorum Spirituum ordines, Orate pro nobis.**

Sancte Joannes Baptista, Ora pro nobis.

Sancte Joseph, Ora pro nobis.

Omnes sancti Patriarchæ et Prophetæ, Orate pro nobis.

Sancte Petre,

Sancte Paule,

Sancte Andrea,

Sancte Jacobe,

Sancte Joannes,

Sancte Thoma,

Sancte Jacobe,

Sancte Philippe,

Sancte Bartholomæe,

Sancte Matthæe,

Sancte Simon,

Sancte Thaddæe,

Sancte Matthia,

Sancte Barnaba,

Sancte Luca,

Sancte Marce,

Omnes sancti Apostoli et Evangelistæ, Orate pro nobis.

Omnes sancti Discipuli Domini, Orate pro nobis.

Ora pro nobis.

Omnes sancti Innocentes, Orate pro nobis.

Sancte Stephane, Ora pro nobis.

Sancte Laurenti, Ora pro nobis.

Sancte Vincenti, Ora pro nobis.

Sancti Fabiane et Sebastiani, Orate pro nobis.

Sancti Joannes et Paule, Orate pro nobis.

Sancti Cosma et Damiane, Orate pro nobis.

Sancti Gervasi et Protasi, Orate pro nobis.

Omnes sancti Martyres, Orate pro nobis.

Sancte Sylvester,

Sancte Gregori,

Sancte Ambrosi,

Sancte Augustine,

Sancte Hieronyme,

Sancte Martine,

Sancte Nicolae,

Ora pro nobis.

Omnes sancti Pontifices et Confessores, Orate pro nobis.

Omnes sancti Doctores, Orate pro nobis.

Sancte Antoni,

Sancte Benedicte,

Sancte Bernarde,

Sancte Dominice,

Sancte Francisce,

Ora pro nobis.

Omnes sancti Sacerdotes et Levitæ, Orate pro nobis.

Omnes sancti Monachi et Eremitæ, Orate pro nobis.

Sancta Maria Magdalena,

Sancta Agatha,

Sancta Lucia,

Sancta Agnes,

Sancta Cæcilia,

Sancta Catharina,

Sancta Anastasia,

Ora pro nobis.

Omnes sanctæ Virgines et Viduæ, Orate pro nobis.

Omnes Sancti et Sanctæ Dei, Intercedite pro nobis.

Propitius esto, Parce nobis Domine.

Propitius esto, Exaudi nos Domine.

Ab omni malo, Libera nos Domine.

Ab omni peccato, Libera nos Domine.

Ab ira tua, Libera nos Domine.

A subitanea et improvisa morte,
 Ab insidiis diaboli,
 Ab ira et odio et omni mala voluntate,
 A spiritu fornicationis,
 A fulgure et tempestate,
 A peste, fame et bello,
 A morte perpetua,
 Per Mysterium sanctæ Incarnationis tuæ,
 Per Adventum tuum,
 Per Nativitatem tuam,
 Per Baptismum et sanctum Jejunium tuum,
 Per Crucem et Passionem tuam,
 Per Mortem et Sepulturam tuam,
 Per sanctam Resurrectionem tuam,
 Per admirabilem Ascensionem tuam,
 Per adventum Spiritus sancti Paralicti,
 In die judicii,
 Peccatores, Te rogamus, audi nos.
 Ut nobis parcas,
 Ut nobis indulgeas,
 Ut ad veram pœnitentiam nos perducere digneris,
 Ut Ecclesiam tuam sanctam regere et conser-
 vare digneris,
 Ut Domnum Apostolicum et omnes Ecclesiasti-
 cos Ordines in sancta Religione conservare
 digneris,
 Ut inimicos sanctæ ecclesiæ humiliare digneris,
 Ut Regibus et Principibus Christianis pacem et
 veram concordiam donare digneris,
 Ut cuncto populo Christiano pacem et unitatem
 largiri digneris,
 Ut nosmetipsos in tuo sancto servitio confor-
 tare et conservare digneris,
 Ut mentes nostras ad cœlestia desideria erigas,
 Ut omnibus benefactoribus nostris sempiterna
 bona retribuas,
 Ut animas nostras, fratrum, propinquorum et
 benefactorum nostrorum ab æterna damna-
 tione eripias,

Libera nos, Domine.

Te rogamus, audi nos.

Ut fructus terræ dare et conservare digneris, Te ro-
gamus, audi nos.

Ut omnibus fidelibus defunctis requiem æternam
donare digneris, Te rogamus, audi nos.

Ut nos exaudire digneris, Te rogamus, audi nos.

Fili Dei, Te rogamus, audi nos.

Agnus Dei, qui tollis peccata mundi, Parce nobis
Domine.

Agnus Dei, qui tollis peccata mundi, Exaudi nos
Domine.

Agnus Dei, qui tollis peccata mundi, Miserere nobis.

Christe audi nos. Christe exaudi nos.

Kyrie eleison. Christe eleison. Kyrie eleison.

Pater noster. *Secreto.*

V. Et ne nos inducas in tentationem

R. Sed libera nos a malo.

Psalmus LXIX.

Deus in adjutorium meum intende: Domine ad adju-
vandum me festina.

Confundantur et revereantur: qui quærun animam meam.
Avertantur retrorsum et erubescant: qui volunt mihi
mala.

Avertantur statim erubescences: qui dicunt mihi,
Euge; euge.

Exultent et lætentur in te omnes, qui quærun te:
et dicant semper, Magnificetur Dominus, qui di-
ligunt salutare tuum.

Ego vero egenus et pauper sum: Deus adjuva me.

Adjutor meus et liberator meus es tu: Domine ne
moreris.

Gloria Patri. Sicut erat.

V. Salvos fac servos tuos.

R. Deus meus sperantes in te.

V. Esto nobis Domine turris fortitudinis.

R. A facie inimici.

V. Nihil proficiat inimicus in nobis.

R. Et filius iniquitatis non apponat nocere nobis.

- V.** Domine, non secundum peccata nostra facias nobis.
R. Neque secundum iniquitates nostras retribuas nobis.
V. Oremus pro Pontifice nostro N.
R. Dominus conservet eum, et vivificet eum, et beatum faciat eum in terra, et non tradat eum in animam inimicorum ejus.
V. Oremus pro benefactoribus nostris.
R. Retribuere dignare, Domine, omnibus nobis bona facientibus propter nomen tuum vitam æternam, Amen.
V. Oremus pro fidelibus defunctis.
R. Requiem æternam dona eis Domine: et lux perpetua luceat eis.
V. Requiescant in pace.
R. Amen.
V. Pro fratribus nostris absentibus.
R. Salvos fac servos tuos, Deus meus, sperantes in te.
V. Mitte eis, Domine, auxilium de sancto.
R. Et de Sion tuere eos.
V. Domine exaudi orationem meam.
R. Et clamor meus ad te veniat.

O r e m u s .

Deus, cui proprium est misereri semper et parcere: suscipe deprecationem nostram, ut nos et omnes famulos tuos, quos delictorum catena constringit, miseratio tuæ pietatis clementer absolvat.

Exaudi, quæsumus Domine, supplicum preces, et confitentium tibi parce peccatis: ut pariter nobis indulgentiam tribuas benignus, et pacem.

Ineffabilem nobis, Domine, misericordiam tuam clementer ostende: ut simul nos et a peccatis omnibus exuas, et a pœnis, quas pro his meremur, eripias.

Deus qui culpa offenderis, pœnitentia placaris: preces populi tui supplicantis propitius respice, et flagellæ tuæ iracundiæ, quæ pro peccatis nostris meremur, averte.

Omnipotens sempiterne Deus, miserere famulo tuo Pontifici nostro N, et dirige eum secundum tuam clementiam in viam salutis æternæ: ut te donante tibi placita cupiat, et tota virtute perficiat.

Deus, a quo sancta desideria, recta consilia, et justa sunt opera: da servis tuis illam, quam mundus dare non potest, pacem: ut et corda nostra mandatis tuis dedita, et hostium sublata formidine, tempora sint tua protectione tranquilla.

Ure igne sancti Spiritus renes nostros et cor nostrum, Domine: ut tibi casto corpore serviamus, et mundo corde placeamus.

Fidelium Deus omnium Conditor et Redemptor, animabus famulorum famularumque tuarum remissionem cunctorum tribue peccatorum: ut indulgentiam, quam semper optaverunt, piis supplicationibus consequantur.

Actiones nostras, quæsumus Domine, aspirando præveni et adjuvando proseguere: ut cuncta nostra oratio et operatio a te semper incipiat, et per te cœpta finiatur.

Omnipotens sempiterne Deus, qui vivorum dominaris simul et mortuorum, omniumque misereris, quos tuos fide et opere futuros esse prænoscis: te supplices exoramus, ut, pro quibus effundere preces decrevimus, quosque vel præsens sæculum adhuc in carne retinet, vel futurum jam exutos corpore suscepit, intercedentibus omnibus Sanctis tuis, pietatis tuæ clementia omnium delictorum suorum veniam consequantur. Per Dominum nostrum Jesum Christum Filium tuum, qui tecum vivit et regnat in unitate Spiritus sancti Deus, per omnia sæcula sæculorum.

R. Amen.

V. Domine exaudi orationem meam.

R. Et clamor meus ad te veniat.

V. Exaudiat nos omnipotens et misericors Dominus.

R. Amen.

V. Et fidelium animæ per misericordiam Dei requiescant in pace. **R.** Amen.

Antiphonæ B. V. Mariæ.

I. Ab Adventu usque ad Purificationem.

Alma Redemptoris mater, quæ pervia cœli
Porta manes, et Stella maris, Succurre cadenti
Surgere qui curat populo: tu quæ genuisti
Natura mirante tuum sanctum Genitorem,
Virgo prius ac posterius, Gabrielis ab ore
Sumens illud Ave, peccatorum miserere.

In Adventu:

V. Angelus Domini nuntiavit Mariæ.

R. Et concepit de Spiritu Sancto.

Oremus. Gratiam tuam, quæsumus Domine,
mentibus nostris infunde: ut, qui Angelo nuntiante
Christi Filii tui incarnationem cognovimus, per pas-
sionem ejus et crucem ad resurrectionis gloriam
perducamur. Per eundem Christum Dominum no-
strum. **R.** Amen.

Post Adventum:

V. Post partum virgo inviolata permansisti.

R. Dei Genitrix, intercede pro nobis.

Oremus. Deus, qui salutis æternæ beatæ Mariæ
virginitate fœcunda humano generi premia præstitisti:
tribue quæsumus, ut ipsam pro nobis intercedere
sentiamus, per quam meruimus auctorem vitæ sus-
cipere Dominum nostrum Jesum Christum Filium
tuum **R.** Amen.

II. A Purificatione usque ad Pascha.

Ave Regina cœlorum,
Ave Domina Angelorum:
Salve radix, salve porta,
Ex qua mundo lux et orta.
Gaude Virgo gloriosa,
Super omnes speciosa:
Vale, o valde decora,
Et pro nobis Christum exora.

V. Dignare me laudare te, Virgo sacrata.

R. Da mihi virtutem contra hostes tuos.

Oremus. Concede misericors Deus, fragilitati nostræ præsidium: ut, qui sanctæ Dei Genitricis memoriam agimus, intercessionis ejus auxilio a nostris iniquitatibus resurgamus. Per eundem Christum Dominum nostrum. **R.** Amen.

**III. Tempore paschali usque ad Festum
Ss. Trinitatis.**

Regina cœli lætare, alleluja,
Quia, quem meruisti portare, alleluja.
Surrexit, sicut dixit, alleluja:
Ora pro nobis Deum, alleluja.

V. Gaude et lætare, Virgo Maria, alleluja.

R. Quia surrexit Dominus vere, alleluja.

Oremus. Deus, qui per resurrectionem Filii tui Domini nostri Jesu Christi mundum lætificare dignatus es: præsta quæsumus, ut per ejus Genitricem Virginem Mariam perpetua capiamus gaudiæ vitæ. Per eundem Christum Dominum nostrum.

R. Amen.

IV. A Festo Ss. Trinitatis usque ad Adventum.

Salve Regina, mater misericordiæ,
 Vita, dulcedo, et spes nostra, salve,
 Ad te clamamus, exules filii Hevæ.
 Ad te suspiramus gementes et flentes
 In hae lacrymarum valle.
 Eja ergo, Advocata nostra,
 Illos tuos miséricordes oculos ad nos converte.
 Et Jesum benedictum fructum ventris tui
 Nobis post hoc exilium ostende.
 O clemens, o pia, o dulcis Virgo Maria!

V. Ora pro nobis, sancta Dei Genitrix.

R. Ut digni efficiamur promissionibus Christi.

Oremus. Omnipotens sempiterne Deus, qui gloriosæ Virginis Matris Mariæ corpus et animam, ut dignum Filii tui habitaculum effici mereretur, Spiritu sancto cooperante præparasti: da, ut cujus commemoratione lætamur, ejus pia intercessione ab instantibus malis et a morte perpetua liberemur. Per eundem Christum Dominum nostrum. **R.** Amen.
V. Divinum auxilium maneat semper nobiscum.
R. Amen.



Index.

	Pagina
Pia aspiratio Matutina.	3
Dominica oratio	4
Ave Maria	4
Symbolum Apostolicum	5
Salutatio angelica	5
Oratio matutina	5
Matutina oblatio sui ad Beatam Virginem Mariam	7
Oratio ad sanctum Angelum custodem	7
Formula intentionis matutinæ	8
Petitio Benedictionis	9
Intentio ante quamvis actionem	9
Gratiarum actio post quamvis actionem	9
 Preces ante et post Studium.	
Oratio ante Studium	9
Oratio post Studium	10
Preces dicendæ in principio Scholarum et Studiorum	11
Observanda in Itu ad scholam	11
Observanda in schola.	12
 Ad Signum salutationis angelicæ.	
Matutinum, Meridianum et Vespertinum	13
Oremus	13
 Benedictio Mensæ.	
Ante Prandium	14
Post Prandium	14
Ante cœnam	15
Post cœnam	15

Exercitium Vespertinum.

Oratio vespertina	17
Gratiarum actio vespertina	19
Aspirationes ante Somnum	19
Oratio pro fidelibus defunctis	22

Actus virtutum Theologicarum.

Actus Fidei	23
Actus Spei	24
Actus Caritatis	24
Gratiarum actio	25
Actus Pœnitentiæ	25

Preces ante et post Missam.

Oratio ante Missam	26
Gratiarum actio post Missam	28
Oratio ad Sanctam B. V. Mariam post Missam	28
Conclusio post Missam	29

Preces Missæ, prout a Sacerdote recitantur 30**Orationes sub sacrificio Missæ** 50**Missa pro Defunctis** 64**Orationes Diversæ pro Defunctis.**

1. In die obitus seu depositionis Defuncti	79
2. In die tertio, septimo, et trigesimo depositionis Defuncti	79
3. In Anniversario Defunctorum	79
4. Pro def. summo Pontifice	79
5. Pro def. Episcopo vel Sacerdote.	80
6. Pro uno defuncto	80
7. Pro una defuncta	80
8. Pro def. patre et matre	80
9. Pro pluribus Defunctis	80
10. In depositione parvuli defuncti	81
11. Pro his, qui in cœmeterio requiescunt	81
12. Pro absoluteione Defuncti	81

Ad Vesperas.	82
----------------------	----

Exercitium Confessionis.

Oratio ante Confessionem	90
Invocatio Spiritus Sancti	91
Scrutatio Conscientiæ	92
Actus contritionis et Propositi	92
Actualis Confessio	93
Post Confessionem	94
Oratio post Confessionem	96
Altera Oratio	97
Gratiarum actio post Confessionem	98

Septem Psalmi poenitentiales	99
--	----

Litanæ Majores	108
--------------------------	-----

Exercitium Communionis.

Ante Communionem	111
Oratio ante Communionem	115
Aspirationes ante Communionem	116
Post Communionem	118
Gratiarum actio post Communionem	121

Preces pro lucrandis indulgentiis	122
---	-----

Devotiones erga Ss. Trinitatem	125
--	-----

Devotiones ergo S. S. Eucharistiæ Sacra- mentum	128
--	-----

Devotiones erga Jesum Christum passum et crucifixum	130
--	-----

Devotiones erga B. V. Mariam	133
--	-----

Orationes et Hymni Dominicales et Festi- vales per Annum.

Dominica prima Adventus	135
In Solemnitate Conceptionis immaculatæ Bea- tissimæ Virginis Mariæ	135
Dominica secunda Adventus	136
Dominica tertia Adventus	136

	Pagina
Dominica quarta Adventus	137
In Nativitate D. N. J. Chr.	137
In Festo S. Stephani Proto-Martyris	138
In Festo sancti Joannis Apostoli et Evangel.	138
In Festo S. S. Innocentium	139
Dominica infra Octavam Nativitatis Domini	139
Gratiarum Actio anno ineunte	139
In Circumcisione D. N. J. Chr.	142
In Epiphania Domini	143
Dominica secuuda post Epiphaniam	143
In Festo Ss. Nominis Jesu	144
Dominica tertia post Epiphaniam	145
Dominica quarta post Epiphaniam	145
Dominica quinta post Epiphaniam	146
Dominica sexta post Epiphaniam	146
Dominica in Septuagesima	146
In Festo Conversionis S. Pauli Apostoli	146
In Festo Cathedræ S. Petri Apostoli	147
In Festo S. Sebastiani Martyris	147
In Festo Beati Francisci Salesii Episcopi et Confessoris	147
Dominica in Sexagesima	147
Dominica in Quinquagesima	148
In Festo Purificationis Beatissimæ V. Mariæ	148
Feria quarta Cinerum	149
Dominica prima in Quadragesima	149
Dominica secunda in Quadragesima	149
Dominica tertia in Quadragesima	150
Dominica quarta in Quadragesima	150
Dominica quinta in Quadragesima	150
Dominica in Palmis	150
In Festo V. Vulnerum D. N. J. Chr.	150
In Festo Sancti Thomæ de Aquino	151
In Festo Sancti Gabrielis Archangeli	151
In Festo Sancti Josephi	152
In Festo Sancti Benedicti	153
In Festo Annuntiationis B. V. Mariæ	153
In Festo sacræ Coronæ D. N. J. Chr.	154
In Festo septem Dolorum B. V. Mariæ	154

	Pagina
Solemnitas de Lancea et Clavis D. N. J. Ch.	155
Feria sexta in Parasceve	155
Sabbato Sancto	158
Dominica Resurrectionis	158
Feria secunda Resurrectionis	158
Dominica in Albis	159
Dominica secunda post Pascha	159
Inventio sanctae Crucis	159
In Festo Sancti Joannis Nepomuceni	159
Dominica tertia post Pascha	160
In Festo Sancti Georgii	160
In Festo Sancti Marci Evangelistae	160
In Festo SS. Philippi et Jacobi Apostolorum	160
In Festo Sancti Bonifacii	160
Dominica quarta post Pascha	161
Dominica quinta post Pascha	161
In Rogationibus	161
In Ascensione Domini nostri Jesu Christi	161
Dominica sexta post Pascha	162
In Festo Pentecostes	163
Feria secunda post Pentecosten	164
Feria quarta post Pentecosten	164
In Festo Ss. Trinitatis	164
Festum Corporis Christi	165
Dominica infra Octavam Corporis Christi	166
Dominica tertia post Pentecosten	169
Dominica quarta post Pentecosten	169
Dominica quinta post Pentecosten	169
In Festo Ss. Cordis D. N. J. Chr.	170
In Festo Sancti Antonii de Padua	171
In Festo Sancti Aloysii Gonzagæ	171
In Nativitate Sancti Joannis Baptistae	171
In Festo Ss. Apostolorum Petri et Pauli	171
In Festo Visitationis B. V. Mariæ	172
In Festo Sancti Udalrici	172
In Festo Sancti Henrici	172
In Festo S. Jacobi Apostoli	173
In Festo Transfigurationis D. N. J. Chr.	173
In Festo Sancti Laurentii	173

	Pagina
In Festo Assumptionis B. V. Mariæ . . .	174
In Festo Sancti Bartholomæi . . .	175
In Festo Sancti Ludovici . . .	175
Dominica sexta post Pentecosten . . .	175
Dominica septima post Pentecosten . . .	175
Dominica octava post Pentecosten . . .	176
Dominica nona post Pentecosten . . .	176
Dominica X. post Pentecosten . . .	176
Dominica XI. post Pentecosten . . .	176
Dominica XII. post Pentecosten . . .	176
Dominica XIII. post Pentecosten . . .	177
Dominica XIV. post Pentecosten . . .	177
Dominica XV. post Pentecosten . . .	177
Dominica XVI. post Pentecosten . . .	177
Dominica XVII. post Pentecosten . . .	178
Dominica XVIII. post Pentecosten . . .	178
Dominica XIX. post Pentecosten . . .	178
Dominica XX. post Pentecosten . . .	178
Dominica XXI. post Pentecosten . . .	178
Dominica XXII. post Pentecosten . . .	178
Dominica XXIII. post Pentecosten . . .	179
Dominica XXIV. post Pentecosten . . .	179
 In Festo S. S. Angelorum Custodum . . .	 179
In Festo Nativitatis B. V. Mariæ . . .	180
In Festo Ss. Nominis B. V. Mariæ . . .	180
In Festo Exaltationis S. Crucis . . .	181
In Festo S. Matthæi Apost. et Evangel. . .	181
In Festo Dedicationis S. Michaelis Archangeli . . .	181
In Festo S. Hieronymi . . .	181
In Solemnitate S. S. Rosarii B. V. Mariæ . . .	182
In Festo S. Francisci d' Assisi . . .	182
In Festo Ss. Apost. Simonis et Judæ . . .	182
In Festo omnium Sanctorum . . .	183
In Commemoratione omnium Fidelium defun- ctorum . . .	183
In Festo S. Caroli . . .	183
In Festo S. Martini . . .	184
In Festo S. Stanislai Kostcæ . . .	184

	Pagina
In Festo S. Cæciliæ	184
In Festo Præsentationis B. V. Mariæ	184
In Festo S. Andreæ Apostoli	185
Orationes Diversæ.	
Actus Fidei	185
Actus Spei	185
Actus Caritatis	185
Actus Contritionis	186
Actus Oblationis	186
Pro Ecclesia	186
Pro Papa	186
Pro Diœcesi	186
Pro Antistite Diœceseos	187
Pro Sacerdotibus	187
Pro Omni Gradu Ecclesiæ	187
Oro Rege	187
Pro Patria	188
Pro Regni Hærede	188
Pro Domicilio et Incolis Ejus	188
Pro Amicis	188
Pro Inimicis	188
In Quacumque Necessitate	189
Tempore Pestis (et Famis)	189
Tempore Belli	189
Pro Pace Obtinenda	189
Pro Tentatis et Tribulatis	189
Pro Infirmis	190
Pro Infirmo Morti Proximo	190
Pro Fide Augenda	190
Pro Spe Impetranda	190
Ad Postulandnm Caritatem	190
Ad Postulandam Contritionem	191
Ad Postulandam Humilitatem	191
Ad Postulantam Continentiam	191
Ad Postulandam Patientiam	191
Pro Felici Morte	191
Pro Vivis Et Defunctis	192
Oratio pro felici morte	192

Litaniae.

Litaniae de venerabili Sacramento . . .	194
Litaniae de SS Nomine Jesu. . .	197
Litaniae de Passione Domini . . .	200
Litaniae in Honorem B. V. Mariae . . .	203
Litaniae Lauretanae . . .	205
Litaniae de omnibus Sanctis . . .	208

Antiphonae B. V. Mariae.

I. Ab Adventu usque ad Purificationem . . .	214
II. A Purificatione usque ad Pascha . . .	215
III. Tempore paschali usque ad Festum SS. Trinitatis . . .	215
IV. A Festo SS. Trinitatis usque ad Adventum . . .	216

